




LT



John Carter Brown.











Harper No. 98



# RELATION

DE CE QUI S'EST PASSE'  
EN LA MISSION DES PERES  
de la Compagnie de IESVS,

AV PAYS DE LA  
NOUVELLE FRANCE,  
depuis l'Ete de l'année 1651. jusques à  
l'Ete de l'année 1652.

*Enuoyée au R. P. Prouvincial de la Prouince  
de France.*

Par le Superieur des Missions de la mesme  
Compagnie.



A PARIS,

Chez { SEBASTIEN CRAMOISY,  
Imprimeur ordinaire du Roy,  
& de la Reyne.

ET  
GABRIEL CRAMOISY.

{ rue S.  
Jacques  
aux Ci-  
cognes.

M. DC. LIII.

AVEC PRIVILEGE DV ROY.

THE HISTORY OF

THE CHURCH OF ENGLAND

FROM THE REFORMATION

TO THE PRESENT TIME

BY JOHN HALL

OF THE CHURCH OF ENGLAND

AND OF THE CHURCH OF SCOTLAND

IN TWO VOLUMES

VOLUME THE FIRST

FROM THE REFORMATION

TO THE PRESENT TIME

BY JOHN HALL

OF THE CHURCH OF ENGLAND

AND OF THE CHURCH OF SCOTLAND

IN TWO VOLUMES


VOLUME THE FIRST

FROM THE REFORMATION





T A B L E  
DES CHAPITRES  
CONTENVS EN CE  
Liure.

 ELATION de ce qui s'est  
passé en la Mission des Peres de  
la Compagnie de IESVS, au  
pays de la Nouvelle France, depuis l'Eté  
de l'Année 1651. jusques à l'Eté de l'An-  
née 1652. page 1

CHAP. I. Lettre du Pere Superieur de la  
Mission au R. P. Prouincial,  
touchant la mort du P. Iac-  
ques Buteux. page 1

II. De la Residence de saint Ioseph. à Sil-  
lery. 10

III. De la Colonie Huronne en l'Isle  
d'Orleans. 25



## Table des Chapitres.

IV. De la Mission de sainte Croix à Tadoussac.	36.
V. De la Mission de saint Jean dans les Nations appellées du Porc-Epic.	56
VI. De la Mission de l'Ange Gardien au pays des Oumamious ou Bersiamites.	71
VII. De la Mission de l'Assomption au pays des Abnaquios.	76
VIII. Des bonnes dispositions qu'ont les Abnaquios pour la foy de Jesus-Christ.	92
IX. De la Guerre des Hiroquois.	112
X. De la vie & de la mort de la Mere Marie de saint Joseph, decedée au Seminaire des Ursulines de Kebec.	126
De son Enfance.	130
De son Novitiat & de sa Profession.	138
Comme Dieu l'appella & la fit passer en la Nouvelle France.	148
De son amour, & de son application à Jesus-Christ, & à ses souffrances.	160
De sa deuotion enuers la sainte Vierge &	



## Table des Chapitres:

<i>enuers saint Ioseph.</i>	167
<i>De quelques-vnes de ses Vertus.</i>	174
<i>De sa Patience &amp; de sa mort.</i>	188





*Extraict du Priuilege du Roy.*



AR grace & Priuilege du Roy, il est permis à SEBASTIEN CRAMOISY Marchand Libraire Iuré en l'Vniuersité de Paris, & Imprimeur ordinaire du Roy & de la Reyne, Bourgeois ancien Escheuin & ancien Iuge-Consul de cette Ville de Paris, d'imprimer ou faire imprimer vn Liure intitulé, *Relation de ce qui s'est passé en la Mission des Peres de la Compagnie de IESVS, aux Hurons pays de la Nouvelle France, es années 1651. & 1652. enuoyée au R. P. Prouincial de la Prouince de France.* Et cependant le temps & espace de neuf années consecutiues, avec deffenses à tous Libraires & Imprimeurs d'imprimer ou faire imprimer ledit Liure, sous pretexte de déguisement ou changement qu'ils y pourroient faire, à peine de confiscation & de l'amende portée par ledit Priuilege. Donné à Paris le 26. Ianuier 1653.

Signé, Par le Roy en son Conseil.

CRAMOISY.



*Permission du R. P. Prouincial.*

**N**OUS François Annat Prouincial de la Compagnie de IESVS en la Prouince de France, auons accordé pour l'aduenir au sieur Sebastien Cramoisy Marchand Libraire, Imprimeur ordinaire du Roy & de la Reyne, Bourgeois & ancien Escheuin de cette Ville de Paris, l'impression des Relations de la Nouvelle France. Fait à Paris ce 10. de Fevrier 1653.

FRANÇOIS ANNAT.

RELATION

Handwritten text in a cursive script, likely a letter or a page from a manuscript. The text is written in dark ink on aged, yellowed paper. The script is dense and fills the upper half of the page.

Handwritten text in a cursive script, continuing from the upper section. The text is written in dark ink on aged, yellowed paper. The script is dense and fills the lower half of the page.





# RELATION

DE CE QVI S'EST  
PASSE' EN LA MISSION  
DES PERES DE LA COMPAGNIE  
de IESVS, au Pays de la Nouvelle  
France, depuis l'Eté de l'Année  
1651. jusques à l'Eté de l'Année  
1652.

---

## CHAPITRE PREMIER.

*Lettre du Pere Superieur de la Mission  
au R. P. Prouincial, touchant la  
mort du P. Iacques Buteux.*



ON REVER. PERE,

PAX CHRISTI,

La presente lettre sera pour informer

A



2 *Relation de la Nouvelle France,*  
vostre Reuerence, de la glorieuse mort  
du Pere Iacques Buteux, massacré par les  
infideles Hiroquois, le dixiesme iour de  
May, de la presente année 1652.

Le Pere Iacques Buteux estoit d'Abbe-  
uille en Picardie, né dans le mois d'A-  
uril de l'année 1600. Il entra dans la  
Compagnie à Roüen, le deuxiesme d'O-  
ctobre 1620. Il fut enuoyé en ces Missions  
de la Nouvelle France l'année 1634.  
apres auoir acheué ses estudes de Theolo-  
gie.

Il a employé l'espace de dix-huit années  
en la conuersion des peuples Monta-  
gnetz & Algonquins. Dieu luy auoit  
donné vne grace toute particuliere ; de  
toucher les cœurs de ces pauvres gens,  
& de leur instiller les sentimens de pieté :  
de sorte qu'on reconnoissoit entre nos  
Neophytes, ceux qui estoient sortis de sa  
main, par vne tendresse de deuotion, &  
vn esprit de foy solide, & tout à fait extra-  
ordinaire.

C'estoit vn homme d'oraison, & d'une  
mortification si constante, que sa vie a  
esté vn ieusne quasi cōtinuel, il couchoit  
toujours sur la dure, & retranchoit de son  
sommeil, vne grande partie de la nuit : &



quoy qu'il fut d'une complexion fort delicate, & toujours dans les souffrances, de quelque maladie, il y adioustoit des mortifications volontaires au dessus de ses forces, ne pouuant rassasier les grands desirs qu'il auoit de souffrir.

Entendant quelques personnes, qui souhaittoient plustost la mort, que de tomber vifs entre les mains, des Hiroquois; Pour moy, (disoit-il à ceux à qui son cœur deuoit s'ouurer,) ie m'estimerois trop heureux, si Dieu auoit permis que ie tombasse en leurs mains, leur cruauté est grande, & de mourir à petit feu, c'est vn tourment horrible: mais la grace surmonte tout, & vn acte d'amour de Dieu, est plus pur au milieu des flammes, que ne le sont toutes nos deuotions separées des souffrances, & en effet, il a esté plus de mille fois dans des lieux, où l'Hiroquois estoit à craindre, sans iamais y auoir pally, & sans que iamais la veuë d'aucun danger l'ayt arresté de faire vn pas, lors qu'il y auoit esperance d'y faire quelque chose pour la gloire de Dieu.

Sa mort a esté le seau de sa vie. Il auoit conuerty à la Foy quantité de nations Sauvages, pour lesquelles il auoit des



#### 4 *Relation de la Nouvelle France,*

tendresses de Pere, & qui auoient toutes pour luy des amours de veritables enfans. Mais sur tout la Nation des Attikamegues, que nous nommons les Poissons-blancs; qui estoient les enfans de son cœur, & dans l'ame desquels il auoit imprimé des sentimens de deuotion si puissans, & si efficaces pour leur Salut, qu'il sembloit que ces bonnes gens ne fussent nez que pour le Ciel, que l'innocence fust leur partage, & que le peché fut banny de tout leur pais, depuis que la Croix du Sauueur du monde y estoit plantée, & que d'un peuple tout barbare, la Charité de ce bon Pere en auoit fait un peuple tout Chrestien. Il y auoit fait un voyage il y a un an avec des peines & des fatigues inconceuable, dont nous auons fait le recit en nostre derniere Relation.

Cette année, apres auoir passé l'hyuer aux trois Riuieres, avec quantité de Sauvages, qui s'y estoient assemblez pour y receuoir ses instructions; quelques familles de Poissons-blancs l'inviteront à les suiure dans leur Pais; où se deuoient trouuer quantité d'autres peuples plus esloignez entirant vers le Nort, qui auoient donné leur parole de se rendre



Chrestiens. Y eut-il mille vies à perdre, & mille Hiroquois en chemin, le zele de ce bon Pere l'engagea dans tous ces perils. Ils partirent le quatriesme iour d'Avril, voicy ce qu'il m'escrivit la veille de son départ.

Mon Reuerend Pere, c'est à ce coup qu'il faut esperer que nous partirons, Dieu veille que les resolutions soient fermes, & qu'enfin nous partions vne bonne fois, & que le Ciel soit le terme de nostre voyage. *Hæc spes reposita est in sinu meo.* Nostre equipage est foible; la plupart d'hommes languissans, ou de femmes & d'enfans: le tout enuiron soixante ames. Les viuandiers & les prouisions de cette petite troupe, sont entre les mains de celuy qui nourrit les oyseaux du Ciel. Je parts accompagné de mes miseres, i'ay grand besoin de prieres, ie demande en toute humilité celles de vostre Reuerence, & de nos Peres. Le cœur me dit que le temps de mon bonheur s'approche. *Dominus est, quod bonum est in oculis suis faciat.* Ce sont ses dernieres paroles.

Après vn mois; & plus, de beaucoup de fatigues, & sur tout de la faim, qui



6 *Relation de la Nouvelle France,*

les suiuiroit par tout en ce voyage; estans souuent plusieurs iours, sans que leur chasse leur donnast de quoy viure; ils se resolurent de se separer, & de prendre diuerses routes. *Si venerit Esau ad vnā turmā, & percusserit eam; alia turma, quæ reliqua est, saluabitur.* Toute-fois leur separation ne fut qu'au iour de l'Ascension, apres que le Pasteur eut Confessé, & eut repeu tout son Troupeau; & que leurs cœurs animez d'vne nouuelle deuotion, se furent disposez au voyage de l'eternité.

Les autres bandes ayant pris le deuant, le Pere resta en compagnie d'vn ieune François, accoustumé à la vie des Sauuages, & d'vn ieune Chrestien Huron. Les neiges estoient fonduës, & les riuieres déglacées. Ils s'embarquerent dans vn petit canot d'escorce, qu'ils auoient fait eux-mesmes; & ils cabanerent, où la nuit les obligea de s'arrester.

Le lendemain, qui estoit le dixiesme iour du mois de May, ils continuënt leur route; & ayans esté obligez de se débarquer par trois fois, en des endroits où la riuere va tombant dans des precipices, & où elle n'est plus nauigable, (c'est à dire qu'en ces rencontres, il faut porter sur ses



espaules, son canot & tout son bagage :) Lors qu'ils faisoient leur troisieme portage, chargez chacun de son fardeau: ils se virent inuesty d'une troupe d'Hiroquois, qui les attendoient au passage. Le Huron, qui marchoit le premier, fut faisy si subitement, qu'il n'eut pas le loisir de faire aucun pas en arriere. Les deux autres, vn peu plus esloignez, furent iettez par terre, les ennemis ayant fait sur eux la descharge de leur fuzils. Le Pere tomba blessé de deux balles à la poitrine, & d'une autre au bras droit, qui luy fut rompu. Ces barbares se ruèrent incontinent sur luy, pour le percer de leur espées, & pour l'assommer à coups de haches, avec son compagnon. Ils n'eurent point tous d'eux, d'autres parole en bouche, que celle de Iesus. Ils furent despoülllez tout nuds, & leurs corps furent iettez dans la riuiera.]

Deux iours apres, d'autres Chrestiens, qui tenoient le mesme chemin, tomberent dans les mesmes embusches, & vn ieune Algonquin, que les Hiroquois prirent vif, y fut bruslé cruellement sur le lieu mesme n'ayant point d'autre consolation, sinon de Dieu, qu'il inuoca ius-



8 *Relation de la Nouvelle France,*  
qu'au dernier soupir. Ils reseruoient le  
ieune Huron, pour le brusler en leur pais:  
mais Dieu luy donna le moyen de rompre  
ses liens, au bout de quelques iours; &  
s'estant eschappé tout nud de sa captiuité,  
il arriua heureusement aux trois Riuieres,  
le huitiesme iour de Iuin: & ce fut luy  
qui nous apporta ces tristes nouuelles: as-  
sez heureuses toutefois, puis qu'elles sont  
glorieuses à Dieu, dans la mort de ceux  
qui consomment leur vie pour le salut des  
ames.

Du depuis, les Sauvages Chrestiens al-  
lerent chercher le corps de leur bon Pere;  
mais quelque diligence qu'ils y ayent ap-  
portée, jamais ils ne l'ont pû trouuer, quoy  
qu'ils ayent rencontré celuy de son Com-  
pagnon demy mangé des Corbeaux, &  
des bestes.

*Deus venerunt gentes in hereditatem tuam.  
Posuerunt morticina seruorum tuorum, escas  
volatilibus cæli; carnes Sanctorum tuorum,  
bestijs terra: effuderunt sanguinem eorum tan-  
quam aquam. & non erat qui sepeliret.*

Je n'ay pû rien dresser que cette lettre  
pour la Relation. Les Peres qui ne font  
que de retourner de leurs Missions,  
m'ont rendu trop tard leurs memoires, ie



*des années 1651. & 1652.* 9

les enuoye au P. Paul le Jeune Procureur de nos Missions, qui les presentera à V. R. pour en estre fait selon sa volonté. On en peut tirer des sujets d'une bonne & d'une sainte edification.

S'il plaist à nostre Seigneur de preseruer le pays de la fureur des Hiroquois, nous auons de l'employ pour sa gloire, plus qu'il ne nous reste de vie: & nous verrons son nom adoré dans ce nouveau monde, où depuis cinq mille ans il n'auoit iamais esté conneu. Nous demandons pour cet effet l'assistance de vos prieres, & de tous ceux qui ont de l'amour pour le salut des ames.

Mon Reuerend Pere.

*De Kebec, ce 4. d'Octobre*

*1652.*

Vostre tres-humble & tres-obeissant  
seruiteur en nostre Seigneur PAVL  
RAGVENEAV de la Compagnie de  
IESVS.



## C H A P I T R E II.

*De la Residence de Saint Ioseph.  
à Sillery.*

**L**Es Chrestiens de cette Residence, ont donné de l'employ toute l'année, à deux de nos Peres : qui ont fait toutes les fonctions de bons pasteurs aupres de leurs ouailles; administrans les Sacramens de Baptême, de la Confession, de l'Eucharistie, de l'Extreme-onction, & de Mariage, consolans les malades, enterrans les morts, Catechisans & preschans les vivans: en vn mot, trauaillâs des deux mains: car il à fallu, notammēt cette année, ioin- dre le secours temporel au secours Spirituel, pour deux raisons.

L'vne est, que les Hiroquois estant toujours en campagne, font que ces bons Neophytes, ont peur de trouuer la mort dans les forests, où il vont chercher leur vie. Ils craignent d'estre massacrés, voulans aller massacrer des bestes, qui leur seruent de nourriture; la plus part de l'année, cette apprehension les a iettés dans



*des années 1651. & 1652.* 11

une extrême disette. L'autre est, qu'il y a eu si peu de neiges cet hyver passé. Que ceux qui ont hazardé leur vie, pour trouver de la chasse; ont pensé mourir de faim, & de froid, si bien qu'estans depourueus de toutes choses, ils seroient morts miserablement, ou du moins ils auroient souffert dans l'extremité, si la bonté de quelques personnes, d'ont la charité n'est point limitée par les bornes de la France, ne nous eut donné le moyen de les secourir.

Je voudrois qu'on pût voir, les sentimens de reconnoissance, qu'ont ces bons Neophytes pour leurs Bien-faïcteurs; & qu'on pût entendre les belles harangues, qu'ils font sur ce sujet, qui en vérité leur causent un estonnement d'autant plus grand, qu'ils ont naturellement moins d'amour, & de respect, pour ceux qui ne sont pas de leur nation. Ils s'ayment les uns les autres: mais ils n'ont que de l'importunité pour tous les Estrangers. Or quand ils voyent que des personnes, qu'on leur dit estre de mérite, & de condition, comme des Capitaines, ou des femmes de Capitaines, leur font du bien de mille lieux loing, cela les touche, &



12 *Relation de la Nouvelle France,*

leur en fait rechercher la raison : & comme ils apprennent , que tous ceux qui croient en Iesus-Christ se doiuent aimer comme des freres : puis qu'ils feront tous ensemble au Ciel ; & que cest dans cette veuë , & dans cette consideration qu'on les assiste : cela leur donne vne haute idée de la Foy. Je ne croiois pas , disoit vn iour, vn Capitaine , qu'il y eut au monde des gens si bons , que d'enuoier des presens , à ceux qu'ils n'ont iamais veus. La priere & la creance ont vne estrange force : puis que de plusieurs nations elles n'en font qu'une. Depuis que ie suis Baptisé, il me semble que i'ay aquis vne grande parenté. Quand i'entre dans l'Eglise des François, il m'est aduis que les François sont mes parens. Quand ie voy vn Huron baptisé, ie le regarde comme mon parent, & si les Hiroquois estoient baptisés, ie les tiendrois pour mes parens : car ils ne seroient plus meschans.

Vn autre disoit à vn Pere , puis que tu sçais peindre la parole, c'est à dire que tu sçais écrire, & que ces personnes d'importance , qui sont au dela du grand Lac, c'est à dire au de-là de l'Ocean, entendent des yeux , c'est à dire sçauent bien lire, dis leur



que nous croyons en Dieu, & que nous le priions pour eux toute nostre vie. Que nous sommes leurs enfans, & qu'ils sont nos peres & nos meres; & qu'ils parlent au grand Capitaine des François, afin qu'il nous secoure contre les Hiroquois, qui tuent, & qui massacrent, & qui brulent ceux qui prient, & qui croient en Dieu.

Le Pere Superieur de nos Missions, demandât à quelques femmes Chrestiennes si elles pouuoient bien aymer des personnes qu'elles n'auoient iamais veu ny connu, parlant de quelques Dames qui les ont secouruës. L'une d'entre-elles prit la parole, & luy dit, pourquoy non mon Pere. Ces saintes femmes de charité nous aimēt bien sans nous auoir veu; pourquoy ne les aimerions nous pas bien sans les voir? Elle n'ont rien deuant leurs yeux qui les porte à nous aimer, & nous voyons leurs presens, & leurs aumosnes. Elles nous aimēt pour l'amour de Dieu, qui leur à cōmandé, de faire du bien aux miserables, & nous les aimons aussi pour l'amour de Dieu, qui veut qu'on aime ceux qui font comme luy, c'est à dire, qui font du bien à tout le monde. Enfin nous aimons ces



14 *Relation de la Nouvelle France,*  
saintes femmes de Charité sans les voir,  
comme nous voulons aimer Dieu sans le  
voir. Nous les verrons dedans le Ciel lors  
que nous verrons Dieu qui leur donne  
ces compassions pour nous, & qui est no-  
stre Pere, comme elles sont nos meres,  
voilà la réponse d'une femme Sauvage,  
qui n'a rien de Sauvage.

On escrit que le Capitaine des Sauua-  
ges de cette Residence, imite genereuse-  
ment la bonté de ceux qui ne donnét aucu-  
nes limites à leurs cœurs, & à leurs mains:  
qui se croient redeuables aux Barbares  
aussi biẽ qu'aux Grecs. *Novi bona data da-  
re filiis suis.* Ce braue Neophyte sçait de-  
partir les biens que Dieu & les hommes  
luy ont donnés, aux pauvres Chre-  
stiens, qu'il considere comme ses enfans:  
Il secoure les vieilles femmes, les pauvres  
vesues, les orphelins, il leur donne du  
pain, des pois, du bled d'Inde, des an-  
guilles, des robes mesme. Voilà ce qu'on  
remarque de ce Capitaine.

Vne Dame Françoisse, qui s'est fait sa  
voisine en ce pais-là, en parle en ces ter-  
mes, dans vne lettre qu'elle a enuoiée à  
vne personne de vertu, & de condition.  
Noel Tekouerimat, qui se nommoit iadis



Negabamat grand Capitaine de Sillery, excellent Chrestien, qui n'a rien de Sauvage que le nom, vous remercie de l'honneur de vostre souuenir, en qualité de vostre tres-humble seruiteur : il espere, & nous aussi, que si Dieu donne la paix à l'ancienne France, que vous traouillerez pour leur secours contre les Hiroquois; ie laisse au R. Pere le Ieune, à vous dire le detail de nos afflictions, & de nos besoins. Ie parle au nom des Sauvages que j'aime tendrement, ce sont les propres mots de sa lettre.

Adioustons quelque chose, de ce qui s'est fait en cette Residēce, & qui n'a point encor paru dans les autres Relations. Voicy vn Paradoxe, qui aura peine de trouuer creance dans les esprits, qui ne cognoissent pas les Sauvages. On a Baptisé vne ieune femme,agée d'environ vingt-trois à vingt-quatre ans, qui est demeurée Vierge ayant eu trois maris successiuent, cette pauvre fille, pour la nommer ainsi, a esté nourrie dans l'innocence des premiers siecles, elle a tiré sa naissance, d'une nation fort esloignée de Kebec, comme elle fut en l'ance de Saint Ioseph, vn ieune homme, apres quelque temps de



16 *Relation de la Nouvelle France,*

sejour, la voulant rechercher en mariage, luy fit demander secrettemēt par vne personne de confiance, si son dernier mary, ne l'auoit point laissée enceinte, elle respondit avec vne pudeur, & avec vne simplicité si naturelle, qu'on donna facilement creance à ses paroles. Il est vray, dit-elle, que mes parens m'ont mariée trois fois, & neantmoins pas vn homme ne m'a encore touchée. Ce que ie vay dire pourra iustifier la verité de sa réponse.

Premierement, ces peuples se comportent ordinairement, les deux, trois, & quatre premiers mois de leur mariage, comme s'ils estoient freres & sœurs, donnans pour raison, de leur façon de faire, qu'ils s'entraimēt d'un amour de proches parens, qui ont horreur des actions de la chair. Cēt amour de parenté, est plus grand, & plus fort parmy les paiens, que l'amour du mariage, dans lequel enfin il degenerate. Que si dans ces premiers mois, ils viennent à se desgouter l'un de l'autre, ils s'esloignent sans bruit, demeurans comme ils estoient auparauant.

Secondement, si le Pere, ou le proche, parent d'une fille, luy commande de s'assembler auprès du ieune homme qui la recherche



cherche , c'est à dire de l'espouser , la fille obeïra sans mot dire : mais si elle ne l'aime pas , où si elle n'a pas encor envie d'estre mariée , il à beau demeurer auprès d'elle , iamaïs elle ne luy souffrira aucune action de mary. Et le ieune homme , n'oseroit quasi tesmoigner qu'il s'en fasche , autrement il feroit voir qu'il ne l'aime pas : mais enfin , comme il veut estre aymé reciproquement , & que ce n'est point la coustume des Sauvages de se violenter les vns les autres , la liberté estant le plus grand de tous leurs biens , il abandonne cette fille au bout de quelques mois , la laissant dans son premier estat , c'est en cette façon que celle dont nous parlons , auoit conserué sa pureté dans trois de leurs mariages. Il semble que nostre Seigneur la vouloit épouser au Saint Baptisme , deuant qu'elle eut donné son cœur & son affection à aucun homme.

Vne mere ayant perdu sa fille , qu'elle aimoit vniquement : vn François l'allât visiter , luy dit pour la consoler , qu'il se falloit soumettre à la volonté de Dieu , qui sçait bien quand il est temps de nous retirer de ce monde , & qu'il ne se faut iamaïs



laisser abbattre à la tristesse, hélas ! Dit-elle, ie ne suis pas triste de la mort de ma fille, puis que ma fille ne l'étoit pas de sa mort mesme; la pauvre enfant me disoit, au fort de sa maladie, ma mere ie suis biẽ aise de mourir, ie m'en vay au Ciel, ie verray celuy qui à tout fait. Je croy, disoit cette bonne mere, qu'elle y est maintenant : car elle aimoit bien la priere, c'est pourquoy ie n'ay garde de m'attrister, voyant que ma fille est en si bon lieu.

Vn ieune homme estant mort sainctement, vn sien camarade nous dit ; en verité ie sens bien, que ie ferois triste de la mort de mon amy, n'estoit que ie croy fermement qu'il est au Ciel ; car il alloit tout droit, il ne s'ecartoit point, il croioit fortement, il obeissoit promptement ; ie viens de prier pour luy en la Chappelle, mais mon cœur me disoit, c'est en vain que tu prie, il est au Ciel : il n'est point retenu en chemin ; car il marchoit tout droit. Cette foy, & cette simplicité sont ayables.

Voicy vne action qui fera voir que Dieu est le Docteur des ames simples. Vne bonne mere demandoit vn iour, si la priere qu'elle faisoit, n'estoit point mauuaise ; car disoit-elle, ie ne l'ay apprise de person-



ne. Quand ie couche ma petite fille dans son berceau, ie fay le signe de la Croix sur son front, puis i'adresse ces paroles à celui qui à tout fait. Ma petite fille te dit par ma bouche, & par mon cœur, car elle ne sçauroit encor parler, c'est toy qui m'as donné la vie, conserue la moy, éloigne de moy le meschant Manitou. Quand ie seray grande, ie croiray en toy, ie t'aimeray, ie t'obeiray. Voila ce que dit ma fille par ma bouche. Assiste moy afin que ie l'instruise bien, & qu'elle te dise vn iour par soy-mesme, ce qu'elle te dit par le cœur, & par la bouche de sa mere la foy & l'amour ont bien de l'industrie.

Cette bonne Chrestienne, ayant eu l'approbation de sa priere, adiouta ce qui suit. Mon cœur est bien méchant: nous auons en nostre Cabane vn ieune garçon, d'une nation estrangere, qui fera bien grossir le papier, où sont escrits mes péchés: on ne sçauroit le rassasier, Il mange incessamment, & il veut toujours manger (en effet il est trauaillé d'une faim canine) il derobe tout ce qu'il rencontre de bon à manger, cela me cause vne tristesse, qui à la verité ne vient pas iusques à la bouche, car ie ne dy mot, mais mon



20 *Relation de la Nouvelle France,*

cœur est méchant, ie voudrois bien qu'il n'eut point cette facherie. Il est vray que ie ne le hay pas: mais ie n'ayme point ses façons de faire. Cette bonne ame prenoit les sentimens d'Adam pour des consentemens de l'esprit.

Vn homme d'un naturel assez vif, ra-comptoit vn iour, les combats qu'il rendoit, quand la nature, ou les demons luy donnoient quelque pensée, ou luy causoient quelque dereglement dans les sens. Je me frappe moy-mesme, comme ie frapperois vne autre personne, qui voudroit offencer Dieu. Je me dy ces paroles, c'est le demon qui parle, le veux tu escouter? Es-tu encor de son party? N'es-tu pas Baptisé? N'as-tu pas dit ces paroles, ie hay, & ie renonce au méchant Manitou? le demon s'enfuit quand ie parle si haut, & ie demeure en paix.

Vne femme étant aupres du feu: quel-qu'un fit tomber sur elle vn tison ardent, qui la brusla bien fort, & qui l'offensa grandement; A mesme temps que son corps sentit la douleur, son cœur fut saisi d'un mouuement de colere: or comme il n'y a pas loing du cœur à la bouche, ce mouuement vint iusques sur le bout des levres pour



sortir avec éclat, mais cette pensée (N'est pas Chrestienne?) se iettant à la traaverse, l'arresta tout court, & fit rentrer sa colere sans que iamais elle dit vn seul mot. Ce sont ces violences qui rauissent le Ciel.

Quelques femmes Chrestiennes, s'entretenans des Religieuses hospitalieres & des Ursulines, qui sont en ce bout du monde, l'une d'entre elles dit aux autres, au suiet de leurs maladies, & de leurs trauaux, dont elles parloient, qu'importe-t'il à ces filles Vierges d'estre malades, où d'estre en santé? La vie & la mort leur est vne mesme chose, si elles sont malades, elles souffrent patiemment, & se rendent agreables à Dieu: si elles s'ont en santé, elles assistent nos malades, instruisent nos enfans, si elles meurent elles vont tout droit au Ciel, elles en sçauent le chemin. Il n'en est pas le mesme de nous autres, nous n'auons pas encor de bons yeux, nous ne connoissons pas tout ce qu'il faut faire, nous ne sçauons pas, comme elles, ce qu'il faut dire à Dieu, & comme il luy faut parler. Mais changeons de propos, voicy vn rencontre agreable.

Les Sauvages du quartier de Saint Ioseph estans tous à la Messe, on derou-



ba dans l'une de leurs cabanes, une robe de castor toute neuve; celui à qui elle appartenait, ne la trouvant point à son retour, assemble les principaux d'entre eux, qui conclurent tous par des conjectures très-apparentes, que ce vol n'auoit pas esté fait par un Sauvage, mais par quelque François. Les ieunes gens entendans cela, courent aussi-tost après deux François, qui venoient de passer, ils les attrappent, & les amènent en leur quartier, leurs voulans ôster leurs habits, & tout ce qu'ils auoient, iusques à ce que le Capitaine des François, eut fait retrouver la robe, où qu'il l'eut payée. Celui à qui elle appartenait leur dit, tout beaux ieunes gens, mettons bas nos coustumes, puis que nous en auons embrassé d'autres; nous ne sçauons pas comme il se faut comporter en ce rencontre, enuoyons querir l'un de nos Peres, & il nous dira ce qu'il faut faire. Aussi-tost dit, aussi-tost fait, le Pere estant venu, il luy exposa les raisons, qui leur faisoient conclurre, que ce Larcin, fut commis par un François; c'est nostre coustume, adiouta-t'il, de dépouiller les premiers qu'on rencontre, de la parenté, ou de la nation de celui qui à



fait le vol. On garde ses depouilles, iusques à ce que son Capitaine, ou ses parens, ayent donné satisfaction à celuy auquel on à fait tort. Voila nostre coustume: mais comme nous auons receu la foy, & que nous sommes Baptisés, nous les quitons pour suiure celles des Chrestiens. Que doiuent ils faire en ce cas là? Le Pere leur dit que les fautes estoient personnelles, & qu'il falloit punir ces deux François, s'ils estoient coupables, sinon qu'il les falloit mettre en liberté, & faire tout le possible, pour decouurir le larron. Or encore que ces bonnes gens vissent bien, que ce procedé ne leur estoit pas favorable, pour ce qu'on ne descouure pas facilement les larrons, si est-ce qu'ils s'y accorderent, & ayans reconnus que les deux François qu'ils tenoient, estoient innocens, ils les renuoyerent avec beaucoup d'humanité. Or comme ce vol estoit recent, & que le François, qui l'auoit commis, se voyoit en grand danger d'estre, decouuert, touché d'ailleurs d'un remords d'auoir offensé Dieu, il porta cette robe à son Confesseur, le suppliant de la restituer en sorte qu'il ne fut point connu. On reporta la robe aux Sauvages, & pour



24 *Relation de la Nouvelle France,*  
ce qu'ils sçauent que Monsieur le Gouverneur du pays , fait punir publiquement les crimes , on leur dit , que celuy qui estoit tombé dans cette offence , s'estoit venu confesser , qu'il auoit demandé pardon à Dieu , qu'il auoit rendu la robe , qu'on luy auoit donné vne bonne penitence. On leur adioute qu'ils sçauoient bien , que ce qui se passoit dans le Sacrement de Penitence , estoit vn secret de Dieu , à qui on declaroit ses pechés , & qu'on n'en parloit iamais aux hommes , que personne ne connoissoit le criminel. Ces bonnes gens furent ravis , voyans dans la pratique , ce qu'on leur auoit presché du secret de la Confession : admirans ce tribunal , & cette Iustice , si favorable à ceux qui reconnoissent , & qui detestent leurs offenses. Iamais ils ne demãderent & iamais ne parurent coniecturer , qui pourroit estre le coupable , afin des'en deffier ; s'imaginans qu'un homme , qui confesse son peché , ne le doit iamais plus commettre , notamment s'il est tant soit peu notable. Finissons ce Chapitre par la deuotion d'une Dame , qui ne veut estre connue , que de celuy , des yeux duquel elle ne se peut dérober. Voyant que le Pe-



re Eternel auoit mis son fils sous la conduite de Saint Ioseph, elle a creu que son amour l'obligeoit, de suiure cet original, elle a donc mis son fils entre les mains de Saint Ioseph, & afin d'obliger ce grand Saint (pour ainsi dire) à le favoriser plus particulièrement, elle donne tous les ans vne aumosne, pour nourrir vn enfant, baptisé en la Residence de Saint Ioseph. l'ay creu qu'en publiant cette deuotion, la personne qui la pratique, n'en seroit pas moins cachée; & que ceux qui aiment ces nouuelles Eglises, honoreront deuant Dieu, vne mere, si saintement amoureuse de son enfant.

---

### CHAPITRE III.

#### *De la Colonie Huronne en l'Isle d'Orleans.*

**I**e n'ay rien à mettre sous ce tiltre, que la Lettre d'un Pere de nostre compagnie, adressée à vn autre Pere de sa connoissance qui a esté en ce nouueau monde: ce sont les seuls memoires que i'ay receus touchant cette Colonie; qui à ses



26 *Relation de la Nouvelle France,*

tristesses & ses ioyes, ses mal-heurs & ses benedictions. Dieu vueille que ses afflictions soient limitées par cette vie, & que ses consolations soient eternelles, mais lisons nostre lettre, voicy comme parle le Pere, apres deux mots de preambule que j'ay obmis.

Pour nouvelle de nostre Colonie Huronne, ie vous diray, que le 26. iour du mois de Iuin passé, nous perdismes six de nos meilleurs Chrestiens, qui s'en alloient à Tadoussac, dans vn grand Canot que nous leur auions presté. Voicy leurs noms Pieer Ahandation, André Annenharisonk, Martin Honahahoianik, René Hondeánionhé, Dominique Onnhoudei, & le pieux Ioseph Taondechoren. Trois enfans se perdirent avec eux, Louys fils de Ioseph, Paul fils de Pierre, & Nicole fille de Martin. Ils estoient tous de nostre chere Mission de la Conception. Comme ils descendoient de l'Isle d'Orléans à Tadoussac, pour vendre de leurs farines de bled d'inde, aux Algonquins, & tirer d'eux quelques peaux, pour en faire des robes à leur usage, vne tempeste, les ayant surpris au milieu de la grande riuere, vis à vis de Tadoussac, les englouti



dans les eaux, sans qu'on ait iamais pû retrouver n'y hommes, ny Canot. Ah qu'elle perte ! Si les grandes occupations de nostre R. P. Superieur ne l'empeschoient point de dresser vne Relation, il diroit des merueilles de nostre bon Ioseph. Quoy que vous ayez esté tesmoins oculaires de ses vertus, lors que nous demeurions ensemble chez luy, en mesme cabane, à mesme feu, & à mesme table, où plustost à mesme pot, ou à mesme chaudiere, puis que les tables ne sont pas en vfrage en ce pays-là, quoy dis-je, que vous l'avez connu i'ay crû neantmoins que vous seriez bien-aise, que ie vous en parlasse, veu mesme-ment, que i'ay eu la consolation, de conuerfer avec luy iusques à la mort. Je vous diray donc.

En premier lieu, qu'il n'est iamais tombé en aucune faute notable, depuis son Baptisme, ce qui est d'autant plus remarquable, qu'il auoit esté fort adonné aux femmes, au ieu & aux superstitions du Pays. Iamais depuis qu'il a esté fait Chrestien, il n'est tombé dans cestrois vices, quoy que ses compatriotes, l'en ayent sollicité, au delà de ce qui s'en peut dire. Vne femme, deuant qu'il fat



28 *Relation de la Nouvelle France,*  
remarié , le sollicita plusieurs mois for-  
tément; non seulement il ne l'écouloit pas,  
mais il trembloit à son abord , me disoit-  
il , & n'en pouuoit supporter la veüe.  
Elle le surprit vne fois , dans les tenebres  
de la nuit , sous vn appanty , où ils n'a-  
uoient que Dieu pour tesmoing.

Je fus , racontoit-il, faisy soudainement  
d'une sueur , qui se respendit par tout mon  
corps , & d'une crainte qui troubloit mon  
esprit , dans l'apprehension que i'auois  
de succomber. La chair ne laissa pas de  
se reuolter , & de rendre vn si puissant  
combat contre mon esprit , que ie ne sçay  
lequel des deux , auroit remporté la vi-  
ctoire , sans vn petit rayon , qui me fit  
faire vne Oraison à Dieu bien courte,  
mais bien feruente : à la faueur de la-  
quelle , ie me tiray des mains de cette  
femme , où de ce tison d'enfer.

En second lieu , les sentimens qu'il a-  
uoit de la Foy , estoient si rauissans , que  
nos Peres en estoient estonnez. Il ne pou-  
uoit se souler de parler de nos mysteres,  
auec des termes , & auec des comparai-  
sons si proportionnées à ses Auditeurs,  
que luy mesme s'estonnoit , qu'ayant esté  
si ignorant , & si idiot deuant son Ba-



presme, il conceut, & parlast si bien des maximes de l'Euangile. De là vient qu'il faisoit assez souuent, des parenteses en ses discours, pour faire entendre qu'il n'estoit rien de son estoc. *Otsinonaka Iouei*. Je suis parent, & allié des vers, ie n'ay rien de moy, c'est Dieu qui me deslie la langue. On a remarqué que plus de quatre mois deuant sa mort, il parloit tousiours dans ses Harangues, de l'heure incertaine de nostre départ, tenons nous toujours prests, disoit-il, car nous serons surpris, & nous dirons avec estonnement, nous voila morts. Ses nieces m'ont fait faire cette reflexion. Il a montré disoient-elles, que ce qu'il inculquoit si souuent, s'est trouué veritable en sa personne; car il est mort en vn temps, & en vn lieu, qu'il n'auoit pas preueu.

En troisieme lieu, il estoit fort reconnoissant du benefice de la Foy, il commençoit le plus souuent, les discours qu'il tenoit à ses gens, par ces paroles. De graces, mes freres, faites estat de la Foy. O que ie suis obligé à Dieu de m'auoir retiré des tenebres de l'idolatrie, m'esclairant du flambeau de la Foy! Com-



30 *Relation de la Nouvelle France,*

bien y a-t'il maintenāt de mes compatriotes en enfer, faute d'auoir eu cette lumiere? Et pour comble de ses faueurs sa bonté m'a fait venir à Kebec, où ie suis au milieu de la Chrestienté, tant des François, que des Algonquins, qui par leurs bons exemples, me portent au bien. Au lieu que si i'eusse pris party ailleurs, apres la deroute de mon pays, i'eusse esté en danger d'estre peruertiy, par les façons de faire des infidelles, avec lesquels i'aurois conuersé, mais ce que ie prise davantage, c'est l'amour de nos Peres, qui nous instruisent à Kebec, aussi bien qu'aux Hurons.

Ils nous donnent le moyen de tenir nos ames toutes nettes du peché, & d'entrer, en suite dans de fortes esperances, que nous iurons au Ciel: quand quelqu'un luy rapportoit quelque, medifance proferée contre luy: Attendés, disoit-il, le iour du Iugement, & vous verrés ce qui en est. Ces calomnies me font du bien, car ie les offres à Nostre Seigneur en satisfaction, de mes offenses.

En quatriesme lieu, l'amour qu'il auoit pour l'oraison, le rendoit fort considerable. Vous vous souuenez bien, que l'hy-



des années 1651. & 1652. 31

uer que nous passâmes en sa cabane; qu'il se leuoit deuant le iour, à mesme temps que nous; qu'il faisoit oraison aussi longtemps que nous, qu'il entendoit en suite nos deux Messes, & qu'il donnoit sur le soir, vn bon espace de temps à la priere en nostre Chapelle. Et tout celà ne l'empeschoit pas, de se trouuer aux prieres publiques, & communes, qu'il faisoit faire tous les iours à sa famille. Sa deuotion enuers la Sainte Vierge estoit aymable. Il me disoit souuent, ô que i'ayme la couronne ou le Chapellet de la Sainte Vierge, iamais ie ne me lasse de le dire, elle m'a accordé tout ce que ie luy ay demandé, en luy offrant cette priere. C'est le bon Pere Isaac Jogues, adioutoit-il, qui m'a donné cette deuotion, lors que nous estions tous deux captifs au pays des Hiroquois, souuent nous recitions ensemble nostre Chapellet, dans les ruës même d'*An-niené*, c'est vn bourg des Hiroquois, sans que ces infideles s'en apperceussent. Il attribuoit sa deliurâce, & la benediction de sa famille à cette deuotion. Il prioit souuent pour ses biens-faiteurs, pour ceux qui se recommandoient à ses prieres, & pour les Chrestiens de France, qui don-



noient quelque secours à ces pauvres contrées. Quand il travailloit en son champ, s'il se relachoit de son travail, c'estoit pour s'occuper à l'oïson, & jamais il ne manquoit de dire quelques dizaynes de son Chappelet, depuis son champ iusques en sa maison.

En cinquiesme lieu, son zele pour le salut de ses compatriotes, a toujours paru grād dans sō pays, mais il s'étoit augmēté de beaucoup, depuis qu'il estoit icy. Vostre Reuerence se souvient-elle, que luy demandant vn iour, s'il auoit exhorté quelques personnes, qui ne faisoient pas leur deuoir, il nous repartit. I'ayme mieux parler à Dieu pour ceux-là, & le prier pour leur conuersion, que de parler à eux mesmes. Car ie sçay ce qu'il faut dire à Dieu, quand ie m'adresse à luy: mais ie ne sçay pas, comme il faut parler à ces gens-là, pour leur toucher le cœur. Reponse qui fait voir sa prudence, sa discretion, son discernement, & son zele. Depuis qu'il estoit à Kebec, où la foy tient le dessus, il ne manquoit pas de visiter quasi tous les iours les Cabanes, & d'exhorter vn chacun de tenir ferme en la foy, me rapportant avec vne candeur  
tres-aymable,



tres-aimable, les biens & les maux qu'il remarquoit; ce qui me seruoit fort pour la conduite de mon petit troupeau.

En sixième lieu, Nostre Seigneur qui auoit esprouué ce bon Chrestien par la perte de sa premiere femme, de ses enfans, & de tous ses biens, par de grandes maladies, par la captiuité, par la faim, & par vne infinité de mesaises, le voulut exercer les dernières années de sa vie, par la mauuaise humeur de sa seconde femme. Elle deuint ialouse vn an deuant sa mort, & le soupçonna si fortement d'aimer vne autre femme, qu'elle ne donnoit aucun repos à son pauvre mary.

Vn iour comme il faisoit festin à ses amis, ayant ietté les yeux par mégarde, vers le lieu où estoit cette femme, ce regard innocent qui luy donnoit de la ialousie, la icetta hors d'elle-mesme; elle prend ses enfans deuant toute la compagnie, & leur dit en pleurant: Allons, allons, mes enfans, allons chercher vne autre demeure, vous n'avez plus de pere; Ne voyez-vous pas bien qu'il vous desaduotie pour ses enfans, puis qu'il ne me recognoist plus pour sa femme, ayant de l'amour pour vne autre que pour vostre



34 *Relation de la Nouvelle France,*  
infortunée mere? A mesme temps elle  
quitte le festin, & la cabane, & s'en va  
dans les bois. Je vous laisse à penser quel-  
le affliction pour ce bon Neophyte: Il me  
vint trouver, & m'ayant raconté l'histoi-  
re, ie les remis ensemble. Quand ie tan-  
çois cette pauvre femme, elle m'escoutoit  
volontiers, auoüant que c'estoit vne forte  
tentation: Elle obeïssoit à tout ce que ie  
luy disois, mais c'estoit tous les iours à  
recommencer. Je vous confesse que j'ad-  
mirois la patience de ce grand homme,  
il souffroit ce martyre avec vne constan-  
ce admirable, taschant à tous momens de  
ne donner aucune occasion à cette fem-  
me de nourrir ses soupçons: mais il n'en  
pouuoit venir à bout, pour ce que Nostre  
Seigneur le vouloit purifier deuant sa  
mort, & le disposer pour sa gloire. Au  
reste, les Hurons qui sont descendus çà  
bas, sont, vne partie, aux Trois Riuieres,  
& l'autre partie à l'Isle d'Orleans, où ie de-  
meure avec le Pere Garreau, & quatre de  
nos anciens domestiques. Nous viuons à  
demy à la Huronne, mangeans de leur  
sagamité, sans toutefois nous priuer tout  
à fait du pain des François.

Nous auons aidé ces bonnes gens à dé-



fricher des terres, comme vous aurez appris: Ils ont recueilly cette année vne assez bonne quantité de bled d'Inde, tous neantmoins n'en auront pas suffisammēt pour leur prouision. Nous les secourerons comme nous auons secouru les autres, des charitez que l'on nous enuoyera de France. Nous auons fait bastir vn Reduit, ou vne espece de Fort, pour les defendre contre les Hiroquois; il est à peu pres de la grandeur de celuy qui estoit aux Hurons, au lieu nommé, *Ahouendaé*. Nous auons aussi fait dresser vne Chappelle assez gentille, & vne petite maison pour nous loger. Les Cabanes de nos bons Neophytes sont tout aupres de nous, à l'abry du Fort. Les Hiroquois nous obligent de secourir les corps, de ces pauvres exilez, pour sauuer leurs ames. Dieu les conduit d'vne façon estrange, & par des voyes estonnantes; il a sans doute enuie de les esleuer bien haut, puis qu'il les abbaisse si profondément. Qu'il soit beny dans les temps & dans l'eternité. Ces Barbares nous menassent d'vne ruine totale: *Si fuerit voluntas in celo, sic fiat.* Nous nous reuerrons au Ciel.



## CHAPITRE IV.

*De la mission de sainte Croix  
à Tadoussac.*

Nous auons desia remarqué dans les Relations précédentes, que Tadoussac n'est autre chose qu'une anse, ou comme un grand bassin d'eau, qui sert de Port aux Nauires François. La Nature luy a donné une assez belle entrée, & l'a abrié contre les vents, de hauts rochers, & de terres fort releuées qui l'environnent. Ce Port est au dessous de Kebec, esloigné d'environ quarante lieües. Il est voisin d'un beau fleuve, appelé par les François, *le Sagné*, qui se descharge en cet endroit dans la grande riuere de saint Laurens, dont la largeur est bien de dix ou douze lieües deuant ce Port. Les Sauvages qui se retirent ordinairement en ce lieu, voyans que les Algonquins & les Montagnets de la Residence de saint Joseph auoient receu la foy de Iesus Christ, de leguerent quelques-vns d'entr'eux en l'année 1640. pour tesmoigner à Mon-



sieur le Gouverneur du pays, & à nos Peres, qu'ils desiroient participer au bonheur de leurs compatriotes; & par conséquent qu'ils les supplioient de leur donner le Pere Paul le Jeune, pour leur apprendre vne doctrine qu'ils auoient condamnée deuant que de la connoistre; mais qu'ils en admiroient maintenant la beauté dans les mœurs de leurs parens, & de leurs alliez. Cōme le Pere estoit occupé ailleurs, & qu'on vouloit esprouuer leur constance, & fortifier ou eschauffer leur desir, on les remit à l'année suiuiante. Le Capitaine de Tadoussac ne manqua pas de se trouuer luy-mesme à Kebec, au temps qu'on luy auoit designé. Sa Requeste estant enterinée, le Pere alla donner commencement à cette Mission au mois de May de l'année mil six cens quarante & vn.

On n'a pas manqué depuis ce temps-là d'y enuoyer tous les ans vn ou deux Peres, qui passent l'Esté sur les riués de ce Port, assistans les François qui y abordent, & trauaillans à la conuersion des Sauvages qui s'y rencontrent. Le Pere Iean de Quen est celuy qui a cultiué plus ordinairement cette Mission, & qui en a



38 *Relation de la Nouvelle France,*  
commencé deux autres par l'entremise  
des Neophytes de cette nouvelle Eglise,  
comme nous dirons en son lieu. Au com-  
mencemēt de cette Mission, l'Eglise, & le  
logis des Peres n'estoient qu'une longue  
cabane d'escorces : mais en fin on a dressé  
une Chappelle, & une petite chambre de  
bois de charpente, où le Fils de Dieu, &  
deux de ses seruiteurs habitent, pendant  
que les François & les Sauvages font leur  
sejour en ce Port. Voicy l'ordre qui se  
garde dans cette Mission.

Lors que l'Hyuer commence ses appro-  
ches, & que toute la contrée se dispose à  
changer son habit vert en un habit blanc;  
& que le cristal se forme petit à petit sur le  
bord des riuieres, les Sauvages de Ta-  
doussac redoublent leurs deuotions; ils  
se confessent & se cōmunient avec beau-  
coup de pieté; ils font mille questions à  
leurs Peres, & à leurs maistres, desquels  
ils se vont separer pour aller faire la guer-  
re aux Elans, aux Cerfs, aux Caribous,  
aux Ours, aux Castors, & à quantité d'au-  
tres animaux plus petits, comme aux Ble-  
reaux, aux Porcs-Epics, aux Chats sauua-  
ges, aux Lièvres, aux Ecurieux, aux Per-  
drix, & autres especes dont ie ne me souuiés



pas. Comme cette chasse dure autant que l'Hyuer est long, ils demandent des Calendriers, pour reconnoistre les iours d'honneur & de respect, c'est à dire, les iours de festes & de Dimanches, qu'ils gardent fort soigneusement. Ils demandent la solution des difficultez qui se peuvent rencontrer, en l'absence de leur Pere. Quelques-vns prient qu'on leur fasse entendre comme il faut parler à Dieu dans la maladie; ce qu'il luy faut dire quand on est triste; quand on ne trouue point de chasse; quand on monte quelque montagne; quand on traaverse quelque riuiera, ou quelque lac; quand on est saisi de quelque crainte; quand Dieu leur accorde ce qu'ils ont demandé. En vn mot, chacun fait ses demandes à sa mode, & selon sa portée. Cela fait, ils troussent bagage, ils leuent le camp, & leur premier pas est vers la Cappelle, où ils vont prendre la benediction de Nostre Seigneur, & ensuite chacun tire vers son quartier d'Hyuer; n'allans neantmoins qu'aux endroits dont ils ont conuenu, deuant que de se separer les vns des autres. Pour les Peres, ils se retirent à Kebec. Quelques-vns se ioignent par fois aux



40 *Relation de la Nouvelle France,*  
plus grosses bandes, pour les instruire  
dans ces profondes forests, où on ne ren-  
contre que des arbres, des glaces, & des  
neiges; & quelques animaux; qu'il faut  
prendre à la course, sur peine de la vie:  
Car c'est la mort de ces bestes, qui donne  
la vie à ces pauvres peuples. Tous les  
lieux sont autant d'hostelleries basties de-  
dans les neiges, où l'on ne trouue jamais  
ny pain, ny vin, ny sel, ny sausse, ny ra-  
goust: mais vn grand appetit; à qui on ne  
donne quelquefois, pour l'appaiser, qu'un  
mets de patience, de quoy il se faut con-  
tenter les deux & les trois iours entiers. Il  
est vray que Dieu l'affaisonne si douce-  
ment, qu'il semble par fois qu'on soit en la  
table des Anges.

L'Hyuer quittant la place au Printemps,  
fait sortir ces chasseurs du bois, pour se  
ranger sur les riués du grand Fleuve, au  
lieu qu'ils recognoissent plus particulie-  
rement pour leur pais. Ceux dont nous  
parlons, se rassemblent à Tadoussac, où  
les Peres qui ont charge de cette Mission,  
les vont trouuer. C'est en ce rencontre  
que la ioye se fait paroistre de tous costez:  
Ils reuiennent quelquefois gros & gras,  
ramenans leurs traîneaux, ou leurs petits



canots chargez de gros pacquets de chair, qu'ils ont fait bouccaner à la fumée. D'autrefois, quand la chasse n'a pas donné, ils sont maigres & défaits comme des squelets, ne rapportans que la peau & les os. Quoy qu'il en soit, leur abord est toujours plein de ioye, notamment à la vëue de leur Chappelle, & de leur Pasteur: Mais si les ouailles font paroistre leur ioye, en verité leur Pasteur seroit insensible, s'il n'estoit remply de consolation.

Leur candeur à rendre compte de leur conscience; l'innocence de leur vie dans l'exercice de leurs chasses, au milieu de ces grands bois, où iamais ne firent leur repaire les monstres de la superbe & de l'ambition, qui rauagent, & qui mettent en feu toute l'Europe: En vn mot, leur bonté & leur sincerité sont la ioye & la gloire de leur Pere. Les vns s'accusent publiquement des fautes qu'ils ont commises; ils en demandent des penitences, ils n'osent entrer dans leur Eglise qu'ils n'ayent satisfait pour leurs offenses, qui tres-souuent ne sont que legeres, & qui passeroient pour des vertus en quelques endroits du monde. Quelques vns apportent & déplient les images qu'on leur



42 *Relation de la Nouvelle France,*  
a données à leur depart, expliquans les  
bons actes qu'ils ont formez à la veüe de  
ces pourtraits, & les recours qu'ils ont eu  
aux Saints qu'ils representent. Ceux qui  
gardent les Calendriers, & qui ont char-  
ge d'annoncer les festes, les viennent re-  
presenter, pour voir s'ils ne se sont point  
égarez, comme ils disent; les chefs de cha-  
que famille rendent compte des prieres  
publiques. En vn mot, tous se confessent  
le plustost qu'ils peuuent, & quelque  
temps apres cette confession, ils s'exami-  
nent derechef, & retournent au mesme  
Sacrement, pour s'approcher du Fils de  
Dieu avec plus de netteté, disans qu'il est  
bien difficile de se souuenir du premier  
coup de tous les pechez qu'on a pû faire  
dans l'espace de cinq ou six mois.

Les memoires que l'on nous a enuoyez  
cette année, portent qu'on a veu aborder  
en ce Port de Tadoussac pendant l'Esté  
dernier, environ huit à neuf cens Sau-  
uages de diuers endroits; qu'ils ont tous  
fait paroistre du respect pour la doctrine  
de Iesus-Christ. Qu'environ quatrevingts  
ont esté faits enfans de Dieu par le saint  
Baptisme. Que deux à trois cens se sont  
venus confesser en ce lieu.. Que la Chap-



pelle, qui n'est pas des plus petites, se remplissoit quatre fois le iour, où les Catechumenes & les Neophytes se faisoient instruire; qu'on y chantoit tous les iours pour vn temps, les loüanges de Dieu en François, en Huron, en Algonquin, en Montagnets, & en langue Canadienne, Miscouienne. Que tous ceux qui ont receu le saint Baptême, y entendoient tous les iours la sainte Messe, & que les prières s'y faisoient generalement tous les soirs, où tous les Sauvages, Chrestiens ou non, y pouuoient assister, autant que la Chappelle estoit capable de les contenir. Mais descendons à quelques actions, & à quelques bons sentimens particuliers, que nous expliquerons en peu de paroles.

L'Esprit de Dieu est par tout saint, & par tout adorable: mais il n'est pas escouté par tout également. Le silence des bois semble plus propre pour recevoir ses impressions, que le grand bruit des Louures & des Palais. Voicy l'une de ses belles & de ses riches inuentions, pour conseruer la ferueur & la deuotion de ses nouveaux disciples, en l'absence de leurs maîtres, & de leurs Pasteurs. Ces bons Neq-



#### 44 *Relation de la Nouvelle France,*

phytes , du moins les plus esclairez , se voyans esloignez de leur Eglise, ne s'esloignent pas des petites pratiques de leur devotion. Ils employent sainctement dans les bois, le temps qu'ils donnent les Dimanches & les festes à entendre la sainte Messe , lors qu'ils sont proches de leur Chappelle , ils se mettent dans la mesme posture , se figurans qu'ils sont presens au Sacrifice. Ils recitent l'oraison, qu'on leur fait dire au commencement & à la fin de la Messe , & pendant l'eslevation de la sainte Hostie, s'offrans en holocauste au Pere eternal avec son Fils. Et ceux qui se seroient confessez & communiez ce iour-là , examinent leur conscience , demandent pardon à Dieu de leurs pechez , se mettent à genoux deuant luy, comme aux pieds du Prestre , les déclarent les vns apres les autres avec douleur , comme ils font en confession , protestans qu'ils s'amenderont , & qu'ils s'en accuseront à la premiere entre-veüe à celuy qu'il a commis pour ce sujet en terre , le supplians de leur donner par auance l'Absolution ; & en suite ils font quelque penitence , conforme à celles qu'on leur donne quand ils s'approchent de ce Sacrement. L'inno-



cence & la sainteté de cette pratique, qu'homme du monde ne leur a enseignée, font assez voir qui en est l'auteur.

Plusieurs Sauvages errans sont morts de faim l'Hyuer passé dedans les bois, pour ce que la neige n'estant pas tombée en abondance, n'arrestoit pas les grandes iambes des Elans & des Cerfs.

Vn chasseur Chrestien nommé Charles, ayant couru troisiours sans manger, apres l'un de ces animaux, sans le pouuoir attraper, se vid à deux doigts de la mort: mais se souuenant que son Dieu estoit le souverain Seigneur des bestes aussi bien que des hommes, il se iette à genoux sur la neige, luy adresse ce peu de paroles: Toy qui as tout fait, tu es le maistre de mon corps & de mon ame, tu en determines; si tu veux que ie meure de faim, j'en suis content, ie mourray paisiblement, & sans fascherie: mais tu me peux dōner de quoy viure, si tu veux, & me conseruer mes forces. Fais ce que tu voudras; si tu prends la pensée que ie doiue mourir presentemēt, ne iette point mon ame avec ces malheureux Esprits qui brulent dans les feux, c'est l'vnique chose que ie te demande: car tu sçais bien que ie t'aime. Son orai-



46 *Relation de la Nouvelle France,*

son finie il se leue, il sent son courage & ses forces augmentées, il reprend la piste qu'il auoit abandonnée; Il attrappe dans peu de temps la beste, qu'il auoit si long-temps pourfuiue, & enfin il la tuë quasi sans peine.

Vn autre moins deuot, se trouua en mesme temps, mais en vn autre endroit, dans vn mesme danger. Il y auoit desia cinq iours, qu'ils rodoit dans ces vastes forêts, pour decouurir quelque proie. Enfin ayant fait rencontre d'un Orignac, il luy donne la Chasse deux iours durant, avec tant de fatigues causées par le ieunesse, & par le trauail, que les forces venans à luy manquer, il fut contraint de s'arrester tout court. Le froid, qui estoit fort grand, commençant desia de le saisir, il tire son fusil pour le battre, & faire du feu, mais ses mains engourdies, luy manquent au besoin: il creut donc que c'estoit fait de sa vie, en effet c'est ainsi que plusieurs sauuages meurent dans les bois, ils s'engagent si auant dans la poursuite d'un animal, qu'estans espuisés ils n'ont plus la force, ny de faire du feu, ny de retourner en leur cabane, & le froid esteignant bien tost le peu de chaleur qui



leur reste, ils perdent la vie. Cet homme qui auoit quelque estime de soy-mesme, se voyant dans cette extremité, s'humilia. Je sçay bien (disoit-il parlant à Dieu) que ie ne vaus rien, que ie suis vn meschant, que ie ne merite pas d'estre escouté : mais toy tu es bon, regarde ces pauures femmes & ces pauures enfans qui sont dans nostre cabane, ils sont bien meilleurs que moy ; escoute leurs prieres, ils te demandent à manger ; tu peux tout ; cet animal que ie poursuis est à toy, tu le peux donner si tu veux ; pour moy il n'importe que ie meure, mais aye pitié de ceux qui t'aiment, & qui t'obeissent. Ce pauure homme sentit son courage releué, il se réchauffe en courant derechef apres cet Orignac, sur lequel il sentit vn si grand aduantage, qu'il le chassoit deuant soy comme on feroit vn bœuf, ou vn autre animal domestique ; si bien qu'il le fit aller tout droict vers sa cabane, & quand il en fut bien proche, il luy donna le coup de la mort, & à mesme temps rendit la vie à de pauures petits innocens, auxquels ce bon homme attribua cette benediction.

Les Chrestiens estans r'assemblez aupres de leur Eglise, vont assez souuent pen-



48 *Relation de la Nouvelle France,*

dant le iour salüer le S. Sacrement S'ils se veulent embarquer, fils vont chercher du bois de chauffage, fils commencent, ou fils finissent quelque ouurage, ils vont presenter leur action au Fils de Dieu; & si la Chappelle est fermée, ils se mettent à genoux deuant la porte.

L'un des deux Peres qui ont recueilly cette année les fruiçts de cette vigne, ayāt rencontré dans l'Eglise vne bonne femme nommée Angelique, dont la premiere action du iour est de venir adorer son Maistre & son Sauueur dans sa maison. La voyant fort attentiue, & ayant remarqué qu'elle entroit tous les iours trois ou quatre fois dans la Chappelle, luy demanda en quoy elle s'occupoit deuant Dieu. Je remercie, respondit-elle, le Pere, le Fils, & le S. Esprit, de ce que ie suis baptisée, de ce que ie suis leur fille, il me semble que mon cœur dit des paroles que ie n'entends pas. Je remercie mon bon Ange de ce qu'il m'accompagne, & de ce qu'il a soin de moy. Je remercie la Sainte dont ie porte le nom, de ce qu'elle prie pour moy. Mais j'honore principalement ma bonne mere la sainte Vierge, & S. Ioseph son espoux. Je leur demande tous  
jours



jours quelque chose, tantost qu'ils me détournent du peché, tantost qu'ils m'obtiennent la perseuerance en la Foy iusques à la mort. Je les prie que tous ceux qui sont baptisez, fassent grand estat de leur baptesme, & qu'ils ouurent les yeux à ceux qui ne le sont pas. Je les prie encore pour tous ceux qui nous secourent, & qui nous font du bien. Le Pere luy demanda qui luy auoit enseigné cette deuotion. Je vous escoute parler, respondit-elle, puis me mettant en oraison, ie laisse dire mon cœur. Je le sens quelquefois si remply de ioye, que ie ne sçay d'où cela vient. Cette bonne femme à vne merueilleuse industrie pour gagner les ames à Dieu: Elle visite les malades, les console, & les encourage. Que sert-il, disoit-elle, il n'y a pas long-temps, à vne personne qui tiroit à la mort, de s'attrister pour la perte d'une vie si miserable, puis que nostre baptesme nous fait aller en vn lieu où il n'y aura plus ny mort, ny maladie? puis que nous allons voir nostre Pere? & que là nous trouuerons nos bons Anges, & que nous verons nos freres qui ont aimé Dieu, & qui luy ont obey en ce monde?

Les François qui vont trafiquer en ces

D



contrées, portent avec eux vn malheur quasi inéuitable: ce sont des boissons, qui font pour l'ordinaire le plus grand peché des Sauvages. L'vn d'eux en ayant pris par excez, s'en alla trouuer le Pere, & ietta à ses pieds quelques peaux de Castors, luy adressant ces paroles. Mon Pere, tu sçais desia mon offense, voila vne aumône pour les pauvres: adjouste telle penitence qu'il te plaira. Le Pere luy dit, Que Dieu ne se payoit pas de peaux de bestes mortes, mais d'vn veritable regret de l'auoir offensé, & que le respect qu'ils portoient à sa maison, n'y osans entrer quand ils auoient commis quelque grande offense, estoit à la verité bien louable: mais qu'il falloit qu'vn homme qui auoit trop pris de boisson, se passât de vin quinze iours durant, ou vn mois, quelque presse qu'on luy pût faire de boire. Cela fut exécuté fidelement.

Vn bon vieillard venu de bien loing, pressant l'vn des Peres de luy donner le baptême, luy disoit avec affection: Ne differe pas de me donner ces eaux precieuses, qui lauent nos pechez: Tu vois mes cheueux blancs, qui disent que ie ne suis pas loing du tombeau: J'aimela prie-



*des années 1651. & 1652.*

51

e, c'est tout de bon que ie croy ce que tu nous enseigne: Si tu me laisses retourner en mon pais sans baptesme, ie seray surpris de la mort deuant que ie puisse retourner en ce lieu. Le Pere luy repliqua, Qu'il n'estoit pas suffisamment instruit, qu'il ne scauoit pas encore les prieres que les Chrestiens presentent à Dieu tous les iours. Ce bon homme attristé de ce refus, se iette dans l'Eglise, pour presenter sa demande à Nostre Seigneur. Il luy adresse ces paroles: Toy qui gouverne & qui determine de toutes choses, tu m'as donné le desir d'estre baptisé, donne-m'en donc l'effect. Tu sçais bien que ie ne suis pas venu icy pour trafiquer, n'estant point chargé de marchandise: Je suis venu expres pour estre baptisé, j'ay quitté mon pais pour cela: Si la pensée qu'a ceuy qui est vestu de noir, & qui nous enseigne, & qui me refuse cette grace, vient de moy, ie te prie pour le moins, ne permets pas que ie meure sans baptesme. Il faisoit cette priere quasi la larme à l'œil. Ce qui toucha si bien le Pere, qu'il l'instruisit sur les articles les plus necessaires de nostre creance, pendant le peu de iours qu'il demeura à Tadoussac, & en suite l'ayant re-



ceux au nombre des enfans de Dieu, l'enrenuoya tout ioyeux en son païs.

Les Attikamagues espouuantez par la mort du Pere Iacques Buteux leur Pasteur, que les Hiroquois ont tué, avec un bon nombre de ses ouïailles, ayans fait plus de cent lieües de chemin dans ces grandes forests, se sont refugiez en partie au Port de Tadoussac, où ils ont fait paroistre que ce grand defastre n'a point esbranlé leur constance en la foy, ny diminué leur deuotion. J'ay remarqué (dit le Pere qui a donné ces Memoires) que la perte de leurs biens, de leur patrie, de leurs parens, & de leurs amis, ne les touche pas à l'égal de la perte qu'ils ont faite de leur Pere & de leur Pasteur. Ils ne pouuoient lasser d'en parler, & on ne pouuoit consoler sur cette mort. C'estoit vraiment nostre Pere, disoient-ils, car nous aimoit comme ses enfans: Il nous faisoit viure au plus fort de nostre famille, & par ses aumosnes, & par ses prieres. Il auoit vn tres-grand soing de nos ames. Il nous seruoit de Capitaine, nous dirigeant dans nos petites affaires. Il est vrai que nous auons tort de le pleurer, car n'est pas mort, il est viuant au Ciel, où



prie pour ses enfans. Il faut confesser, ad-  
joust le Pere, que l'innocence, la can-  
deur, & la simplicité de ce peuple est ra-  
uissante. Je n'ay jamais rien veu de si  
traictable, de si obeissant, & de si defe-  
rant à ceux qui les enseignent.

L'un d'entre eux estant malade, me fit  
appeller pour sçavoir de moy, comme vn  
Chrétien se doit comporter dans sa ma-  
ladie. Je le fus voir, & ie trouuay qu'il  
faisoit ce que ie luy aurois pû recomman-  
der. Il surmontoit la crainte naturelle de  
la mort, par vne excellente soumission à  
la volonté de Dieu, se resioüissant de l'al-  
ler voir. Le Pere luy demanda, s'il n'a-  
uoit point quelque pensée que les chants,  
& les tambours de leurs Iōgleurs le pour-  
roient soulager. Il y a long-temps, fit-il,  
que ie me mocque de routes ces supersti-  
tions, & que j'ay mis toute mon esperan-  
ce en celuy qui determine de nos vies.  
Après qu'il se fut confessé, il prit vn Cru-  
cifix attaché à son Chappelet, & s'adres-  
sant à Nostre Seigneur, il luy disoit ten-  
drement ces paroles: Toy qui te nommes  
Iesus, en verité tu es bon! Quoy donc?  
c'est tout de bon que tu es mort pour  
moy en la façon que cette image me re-



54 *Relation de la Nouvelle France,*  
présente: C'est tout de bon que tu as voulu estre mon frere aîné: C'est tout de bon que tu m'aimes, ayant voulu lauer mes pechez dans ton sang: Je t'ay quelquefois fasché: mais comme tu es bon, & que tu escoutes ceux qui te prient, ne prends point la pensée de m'enuoyer au feu; m'enue-moy avec toy, car ie t'aime, tu le sçais bien. Je ne suis pas marry de souffrir, & d'estre malade, car ie l'ay bien merité, & toy-mesme tu as voulu souffrir. Puis se tournant vers moy, il me disoit: Mon Pere, ie prieray pour toy au Ciel: Je diray à celuy qui a tout fait, quand ie le verray: Aime ceux qui ont eu tant de soin de moy. L'allant voir la veille de sa mort, ie trouuay son Crucifix posé sur sa poitrine toute descouuerte. Je luy en demanday la rason: Je l'ay mis sur mon cœur, me dit-il, pource que ie n'aime plus rien que celuy qui m'a sauué par sa mort, c'est luy qui me conduira dans le Ciel, qui applanira le chemin. Je sçay bien que mes pechez se iettent à la trauerse, mais il osterà ces obstacles, il m'ouurira la porte de son Paradis, où iamais plus ie ne pourray mourir. Je ne crains point de sortir de ce monde, puis que Iesus est avec moy. Sa fem-



me qui estoit aupres de luy, auroit, deuant son baptisme, poussé les hauts cris, veu mesmement qu'elle portoit en son sein vne petite fille malade à la mort, & en regardoit vne autre quasi agonizante dans son berceau, & dans cet abysme d'affliction, la pensée du bonheur eternal dont alloit iouyr son mary, tarissoit toutes ses larmes, & la consoloit. Si tost qu'il fut enterré, & l'une de ses deux filles, elle vint trouuer le Pere, & luy dit: Je ramasse tous les pechez que j'ay commis depuis mon baptisme, pour les dire, & les detester tout à la fois, afin que rien ne m'empesche l'entrée du Paradis, comme j'ay donné quelquefois occasion à mon mary de se fascher; ie crains que cela ne l'arreste à la porte du Ciel, & moy aussi: c'est pourquoy ie voudrois bien satisfaire pour ses offenses, & pour les miennes.

*Surgunt indocti, & rapiunt cælum.*



## C H A P I T R E V.

*De la Mission de saint Jean dans les  
Nations appellées du  
Porc-Epic.*

**S** Viuons, s'il vous plaist, le Pere qui à soïn de cette Mission, & prestons l'oreille à ce qu'il en dit dans ses memoires. Le lac que les Sauuages appellent, *Pia-gouagamî*, & que nous auõs nommé le Lac de Saint Jean, fait le pays de la Nation du Porc-Epic. Il est esloigné de Tadoussac de cinq ou six iournées. On s'embarque pour y monter sur le fleuue du Sagné, & quand on à vogué quelque temps sur ce fleuue, il se presente deux chemins, l'vn plus court, maistres-fâcheux: l'autre plus long, mais vn petit plus doux, où, pour mieux dire vn peu moins rude: car à parler sainement ces chemins ne semblent pas faits pour les hommes tant ils sont affreux. La cause de cette difficulté, procèdent de ce que le fleuue du Sagné, qui à bien 80. brasses de profondeur aupres de Tadoussac; est fort inegal dans son lit, il



est tout barré de rochers en quelques endroits, en d'autres il est tellement reserré, qu'il fait des courrans si rapides, qu'il est insurmontable à ceux qui le nauigent: si bien qu'il faut mettre pied à terre, pour le moins dix fois par le plus court chemin, & quatorze par le plus long, pour aller de Tadoussac au Lac de Saint Iean.

Et ces endroits s'appellent des portages, d'autant qu'il faut porter sur ses epaules tout le bagage, & le nauire mesme, pour aller trouuer quelque autre fleuve, ou pour euitter ces brisans, & ces Torrens, & souuent il faut faire plusieurs lieuës chargés comme des mulets, grauissans sur des montagnes puis descendans avec mille peines, & avec mille craintes dans des vallées, & parmy des rochers, où parmy des brofailles, qui ne sont connuës que des animaux immondes. En fin a force de peine & de trauail, on trouue ce Lac, qui paroît d'une figure ouale, & de cinquante lieuës d'estendue ou environ. Il est enflé par dix riuieres qui remplissent son bassin, & qui seruent de chemin, a quantiré de petites Nations repanduës dans ces grandes forests, qui viennent trafiquer avec les Sauvages qui



habitent vne partie de l'années sur les riu-  
es de ce Lac lequel se decharge par qua-  
tre ou cinq canaux , qui ayans courru se-  
parément quatre ou cinq lieuës , se rejoin-  
nent ensemble pour faire vne seule riuie-  
re, que nous appellons le Sagné , laquelle  
sevient degorger dás la grande riuie-  
re de saint Laurens aupres de Tadoussac , mais  
venons au destail de nostre voyage. Je  
m'embarquay pour cette Mission , le 16.  
de may , en la compagnie de douze Ca-  
nots qui s'en alloient en traite c'est à dire  
en marchandise vers les peuples de ce  
beau Lac. Je ne manquois point, tous les  
matins & tous les soirs , de faire les prieres  
publiques , où assistoient tous les Sau-  
uages.

Le 19. de May iour de la Pentecoste , les  
Chrestiens me dresserent vn autel , cha-  
cun y apporta ses richesses pour l'orner,  
& quand il fut paré de tous nos biens il  
estoit encor bien pauvre , il eut peut estre  
neanmoins plus d'effet , que ces brillans,  
qui sont sur les autels de l'Europe , des lu-  
mieres d'or & d'azur. Toutes ces beautés  
ne s'estallent que pour toucher les cœurs,  
& donner quelque idée de la grandeur de  
Dieu , le Saint Esprit fait dans le cœur des



pauvres, ce que l'or & l'argent ne scauroient faire dans l'ame des plus riches. Quoy qu'il en soit; tous nos bons Neophytes entendirent la Sainte Messe avec vne riche deuotion, quoy que l'Autel fut bien pauvre. Apres la Messe chacun se rembarqua dans sa petite gondole, nous iouasmes de lauiron iusques apres midy, que nous mismes derechef pied à terre, pour honorer ce saint iour. Le leur fy vn petit entretien sur la descente du Saint Esprit, nous chantasmes des Cantiques spirituels en leur langue, ils reciterent tout haut leur Chapelet comme à deux chœurs, & puis nous pourfuiuismes nostre chemin. Nous rencontraimes souuent sur les riues du fleuve qui nous portoit, des tombeaux de trespasés: ces peuples estans venus l'année precedente à Tadoussac, furent saisis d'une maladie, à leur retour, qui en egorgea plusieurs. On voyoit sur leurs sepulcres les marques de leur creance, ils auoient dressé des Croix sur quelques vns: d'autres auoient planté vn baston sur le tombeau de leur amy, duquel on voyoit prendre vn Chapelet d'autres auoient mis vn auiron marqué de Croix sur la fosse de quelque bon nauigateur: le Dieu du Ciel,



60 *Relation de la Nouvelle France,*

est le Dieu des viuans , & des morts.

Le vintiesme du mesme mois de May, nous fismes rencontre de trois Canots, dans l'un desquels estoit vn homme, qui pour estre trop attaché aux femmes, n'a iamais pû gouter la loy de Iesus-Christ. Les Chrestiens de nostre escouade, ne se peuvent empescher de luy donner quelques faubriquets en passant. Il estoit marié à trois femmes, qui estoient toutes trois dans son canot, la plus ancienne auoit vn petit enfant né depuis deux ou trois mois; mon Nocher, dit le Pere, luy demanda si elle voudroit bien qu'il fut baptisé. Helas! dit elle, ie voudrois bien que la mere & l'enfant le fussent: cela depend de mon mary. Ce bon homme, luy adressât sa parole, luy dit si tu ne veux pas aller au Ciel n'empêche pas pour le moins que tes femmes & tes enfans, ny aillent? Enfin il donna son consentement, & me pria, ajoute le Pere, de luy donner vn billet, afin que son enfant fut admis au Baptême, si tost qu'il seroit arriué à Tadoussac. La mere voyant que le bon-heur estoit accordé à son fils, me pressa fortement de luy faire la mesme grace au retour de mon voyage. Il ya si long-temps disoit elle, que ie vous



*des années 1651. & 1652.* 61

demande cette faueur. Iay appris toutes les prieres que font les Chrestiens. Je vous assure que c'est tout de bon que ie croy en Dieu, & que ie luy veux obeir. Si mon mary à trois femmes, moy ie n'ay qu'un mary, & ie ne suis pas responsable de ses defauts. Je suis sa femme legitime, selon que ie vous ay ouy dire, puis que ie suis la premiere. Il promet qu'il me laissera viure selon ma creance, pourquoy donc me refusés vous ce que ie vous demande depuis quatre ans? Voyât que ie la remettois au printemps de l'année suiuiante, hélas! s'écria elle, qui sçait si ie passeray l'hyuer? Si ie meurs où ira mon ame? vous serés cause de ma perte. Enfin il fallut ouurir la porte du Baptisme, & de l'Eglise, & du salut, à celle qui frapport si fort, & si constamment depuis tant d'années.

Le soir du mesme iour vintiesme de May, nous arriuasmes sur les riués du Lac de Saint Iean. Où nous trouuasmes trois Cabane, dans lesquelles il y auoit bon nombre de malades, qui n'attendoient que ma venue pour mourir contents. Ils auoient passé tout l'hyuer dans de grandes douleurs, qui leurs auoient causé vne lan-



62 *Relation de la Nouvelle France,*

gueur mortelle. Si tost qu'ils m'apperceurent, la ioie qui frappa leur cœur, ouurit leurs yeux, & espanouit leur visage, *ou-nakou ma'ka michakheien*, ô que voila qui va bien que tu sois arriué! Que tu nous sois venu voir deuant nostre mort. Il est auerty de nostre maladie (disions nous) il a dit ie les iray voir, nous auions cette pensée de toy, il ne ment point, il viendra donc nous confesser, il viendra nous donner celuy qui est mort pour nous. Enfin te voila venu. Nous sommes tout prests de nous confesser: mais tu es las, repose toy, tu as bien trauaillé, voila du poisson, & de la chair de Castor, que nous auons pris dans cette riuere prochaine, reprends, tes forces. Dieu nous conseruera la vie iusques à demain & tu nous confesseras, tu diras la Sainte Messe, & tu nous communieras, & puis nous mourrons en paix. La simplicité de ce peuple est aymable.

Le lendemain vingt & vniesme du mesme mois, les Chrestiens bastirent vne Eglise, qui fut en état d'y dire la Sainte Messe, en moins de deux heures. Ils sont addrois à planter des perches, pour faire vne Cabane, ronde où quarrée. Il couvrirent ces perches de leurs robes, & de



leurs castelongnes, & voila le bastiment dressé. I'y celebray la sainte Messe: I'entendis de confession tous les Chrestiens: Je donnay la sainte Communion à tous ceux qui en estoient capables: Nous fismes l'action de graces publiquemēt: Nous chantasmes des Cantiques spirituels. Les sains & les malades estoient ravis de voir leur pais honoré, & eux fortifiez par des mysteres si adorables.

Vn Chrestien banny de l'Eglise depuis deux ans, pource qu'il auoit pris vne seconde femme, & causé du scandale par cette action à tous les fideles, n'osa iamais se presenter: Il estoit cabané loing des autres, qui le regardent comme vn ex-cōmunié: si bien qu'il s'écarte toujours, ne conuersant quasi avec personne. La foy & les femmes balancent son cœur, mais les femmes l'emportent.

Le vingt-deuxiesme de May nous trauersâmes le Lac, par vn temps le plus doux & le plus agreable du monde: l'auois pensé perir dans ce Lac deux ans auparauant. Vne tempeste s'éleuant tout à coup, remplit nostre petit bateau, & nous ietta à deux doigts de la mort. Nous fismes huit lieties comme des gens qui sont aux abois,



64 *Relation de la Nouvelle France,*

combattans pour la vie, contre les flots. Si deux mariniers, qui me conduisoient, n'eussent eu de la force, & de l'industrie, les ondes nous auroient seruy de sepulcre. Dieu qui commande aux vents comme il luy plaist, les enchaina dans ce dernier voyage. Nous voguions doucement dans vn calme agreable sur des eaux, qui frappées des rayons du Soleil, nous paroissent belles comme vn cristal liquide. Et comme nous estions plusieurs Canots de compagnie, ie prenois vn grand plaisir dans les diuers discours de nos Sauvages. Vne femme entr'autres raconta ce qui suit. Il y a dix Lunes ou environ, que trauersant ce Lac, vne tempeste nous accueillit, les vagues nous eleuoient sur des montagnes d'eau; moy qui n'estois pas encore baptizée, ie voulus prier Dieu dedans ma crainte, ayant appris des Chrestiens qu'il estoit bon, & que tout le monde luy pouuoit parler. Je prononçay ces paroles: Voila qui va mal, que nous mourons icy abyssmez dans les eaux. Toy qui gouernes le Ciel & la terre, la mer & les lacs, & les riuieres, ne nous sauueras-tu pas de ce naufrage? Vn Chrestien me reprit tout sur l'heure, & me dit: Ta parole n'est



n'est pas droicte, il ne faut point dire, Voila qui va mal que nous mourions, ne nous tireras-tu point du danger? Ta langue s'est écartée de son chemin, il falloit dire: Mon Dieu, nous mourrons quand tu voudras, dispose de nos vies aussi bien dessus l'eau que dessus la terre, tu es le maistre: Si tu prends cette pensée, qu'ils eschappent ce danger, nous l'eschapperons: Si tu veux que nous mourions icy, nous ne laisserons pas de t'aimer. Voila vne petite oraison bien sainte. Au reste, cette bonne femme adjoustoit, qu'elle trembloit toujours sur les eaux deuant son baptesme: mais depuis que les eaux saintes auoient passé sur sa teste, qu'elle ne craignoit plus d'estre noyée.

Le vingt-troisiesme, nous arriuasmes où estoit le gros des Sauuages. Si tost que nous fusmes apperceus, tout le monde sortit de sa cabane. Ils me receurent avec vne ioye, & avec vne affection qui s'explique moins par la bouche, qu'elle n'est sensible au cœur. Le Capitaine fait mettre tout le monde en campagne, pour me bastir vne Eglise, & vne maison. Les ieunes hommes vont abbatre les poutres & les chevrons, c'est à dire, de longues per-



66 *Relation de la Nouvelle France,*

ches: Les femmes apportent des planches, c'est à dire, des escorces, pour couvrir ce Palais: Les filles vont chercher des tapisseries pour orner nostre Alcove; ce sont des branches de sapin fort belles, dont ils tapissent le bas de leurs cabanes. Vn si grand nombre d'ouuriers, si lestes, & si experts en leur art, & si affectionnez à leur ouurage, bastirent en vn moment vn Palais à Nostre Seigneur, qui auoit plus de rapport à celuy de Bethlehem, qu'au Tabernacle dont saint Pierre forma l'idée sur le mont de Tabor. Mon Eglise & ma maison estant en estat de me receuoir, ie fus bien tost dans l'exercice de ma charge; on m'apporte les petits enfans pour les baptizer; les adultes se disposent à receuoir la mesme grace; chacun se prepare à la Confession & à la Communion: Les prieres, les entretiens en public & en particulier, bref tous les exercices de la Religion Chrestienne se continuerent quasi sans relasche, tout le temps que ie fus avec eux. Je n'en toucheray point le détail, ie diray seulement deux mots de quelques Sauuages estrangers que ie rencontray en cette assemblée.

Vn bon Neophyte du pais des Attika-



megues, s'estant refugié en cette contrée, & ayant appris que l'un des Peres qui enseignoit le chemin du Ciel, estoit arriué, accourut pour me voir. Il fit paroistre vne ioye, & vne satisfaction si douce, que j'en fus attendry. Je suis baptizé, me dit-il, le Pere Bureux m'a donné le nom de Pierre en mon baptisme. O que j'aimois ce bon Pere! ô qu'il m'a fait de bien! Il m'a fait perdre par le baptisme la crainte du Manitou, c'est à dire, du Demon. Il m'a delivré de l'apprehension de la mort: Il m'a osté l'amour de toutes les choses de la terre: Je n'aime rien maintenant que le pais où nous devons aller, où nous verrons nostre Pere qui a tout fait. Je le cōnoissois vn petit deuant que d'estre baptizé, & deuant que vostre parole eust frappé nos oreilles. J'ay toujours tasché de n'estre point méchant. J'ay toujours aimé ceux qui estoient bons. Je defendois à mes enfans de faire aucun mal. Je les faisois prier celuy qui nous gouerne, quoy que ie ne le conusse pas comme ie le connois maintenant. Mon esprit ne pense quasi qu'à vous autres, qui enseignez à bien viure. Mon cœur voudroit beaucoup parler à Dieu, mais il ne sçait pas ce qu'il luy faut dire.



68 *Relation de la Nouvelle France,*

Je luy dis quelquefois, ayant fait les prières qu'on nous a enseignées: Je voudrois bien parler davantage, mais ie ne sçay pas ce qu'il te faut dire. Je ne sçay pas ce qu'il faut faire pour te complaire, & pour te contenter: mais ie suis bien assuré que les Robes noires t'aiment, qu'ils sçauent comme il te faut prier; qu'ils prient, & qu'ils demandent pour moy ce qu'il faut demander: Je te dis tout ce qu'ils te disent: Je te demande tout ce qu'ils te demandent pour moy. Exaucez-les, car tu les aimes bien. Cette Rhétorique est aussi sainte qu'elle est simple; elle rend les ames bonnes, & celle de Cicéron & d'Aristote les rend sçauantes.

Vn bon Israélite me racontant la mort de sa femme, en parloit en ces termes: Tant que tu verras que j'auray de l'esprit, & le iugement bon, (disoit-elle à son mary dedans sa maladie) fais-moy souuenir de Dieu, parle-moy de luy, remets-moy en memoire les points de nostre creance, rapporte ce que tu as ouy dire du Paradis, approche-toy de moy, & disons encore vne fois nostre Chapelet ensemble. Lors que ie ne pourray plus ny prier, ny me mouuoir, fais le signe de la Croix sur mon



front, & sur mon cœur, & prie pour moy. Helas! disoit ce bon homme, elle est morte en priant celuy qui a tout fait. Dieu sert de Prestre & d'Euesque quand il luy plaist, & le Saint Esprit a des operations bien saintes, & bien secretes dans les ames de ces bonnes gens.

Vne mere me consola, m'entretenant du trespas de sa fille. Ah! que n'estions-nous proche de toy, disoit-elle! ma pauvre fille souspiroit apres toy pour se confesser, & voyant que tu n'y estois pas, elle me dit tous ses pechez pour en demander pardon à Dieu, elle le prioit incessamment. La veille de Noël, sentant les approches de la mort, elle me dit: Mame-re, ie n'en puis plus, ie suis foible, & toute abbatuë & assoupie; puisque nous ne pouuons pas assister à la Messe de minuit, esueillez-moy en ce temps-là, si ie suis assoupie, afin que j'honore pour la derniere fois le temps de sa naissance. Et ie vous prie qu'on ne m'oste point mon Chappelet quand ie seray morte, car c'est l'vnique chose que j'aime à present. Sa bonne mere ne fit point comme ceux, qui craignans de faire perdre vn peu de santé à vn malade, ou luy voulans prolonger la



70 *Relation de la Nouvelle France,*  
vie d'un moment, luy causent bien souvent une mort éternelle. Ces bons Neophytes n'ont point de ces délicatesses, qui tuent l'ame pour sauver le corps.

Mais finissons ce chapitre. Le Pere ayant fait toutes les fonctions d'un charitable Pasteur, & d'un Ouvrier Evangelique, dans l'espace de douze iours que ses conducteurs luy accorderent, remonta dans son navire d'escorce, emportant les cœurs de ses ouïailles. Il repasse avec ses Nochers sur ses brisées. Il loge dans les mesmes hostelleries. Il trouve par tout le mesme liç; dressé depuis la naissance du monde, & qui, depuis Adam, n'a jamais esté remué, sinon par quelque tremble-terre. L'appetit luy fait trouver un peu de bouccan, sec comme une semelle de soulier, delicat comme un perdreau. Le travail luy donne un sommeil fort doux. La bonté & la candeur de ses braves Neophytes le comblent de ioye. Dieu luy conferue par tout la santé; & ses jambes, & son auiron ioint aux auirons de ses Nochers, luy font trouver la fin de son voyage, pour en entreprendre un autre bien tost apres.



## CHAPITRE VI.

*De la Mission de l'Ange Gardien au  
pays des Oumamiouek ou  
Bersiamites.*

**A** Peine le Pere Iean de Quen, auoit-il acheué sa Mission du Lac de Saint Iean, qu'il donna commencement à la Mission de l'Ange Gardien, au pays, que les Sauuages de Tadoussac, appellent la contrée des, *Oumamiouek*. Je croy que ce sont les Bersiamistes, ou quelques alliés des Esquimaux, qui habitent les costes du Nord, au dessous de l'Isle d'Anticosti. Je membray dit-il, dans vne Chaloupe, en la compagnie de quelques Sauuages, le douziesme de Iuin. Nous descendimes sur le grand fleuve qui paroît comme vne mer au dessous de Tadoussac, vogans sans relasche six iours durant; ce qui ne fait dire, que le lieu que nos Sauuages cherchoient, & qu'enfin nous trouuâmes, estoit bien éloigné de Tadoussac de 80. lieuës. Nous abordâmes vne anse, escarpée de hautes montagnes, ou plustost



72 *Relation de la Nouvelle France,*  
de hauts rochers, sur lesquels estoit vn petit nombre de ces peuples, qui nous regardoient de loing, pour voir si nous n'estions point de leurs ennemis. C'est chose estrange, que les hommes dans tous les endroits de la terre, sont ennemis des hommes. Ils se tuent, ils s'égorgent, ils se consomment par des guerres immortelles. *Homo homini lupus, homo homini Deus.* l'Homme est vn Dieu, & vn loup à l'homme. Ces pauvres gens qui n'ont autre richesses, les vns, que le Baptisme, qu'ils sont venus chercher à Tadoussac, les autres que le desir de le receuoir: sont poursuivis par les Sauvages de Gaspé, qui trauersent le grand fleuve, pour les aller massacrer dedans le pays des bestes. Puis que les forests de cette contrée, nourrissent plus d'Orignaux, plus d'Ours, & plus de Castors que d'hommes. Nous ayans reconnus, ils descendirent de leurs hautes tours, basties deuant la tour de Babel. Apres auoir fait paroistre, par leurs gestes, & par leurs yeux, le plaisir qu'ils prenoient de nous voir, ils nous firent excuse sur leur petit nombre, disans que leurs compatriote, cachés dans le fond des bois, n'auoient osé paroistre sur les riuers



du grand fleuve, de peur d'y rencontrer leurs ennemis; nous assurant que quand nous les retournerions visiter au Printemps prochain, qu'ils viendroient en troupe pour m'escouter, & pour trafiquer avec nos Sauvages de Tadoussac, qui les venoient chercher pour ce sujet.

Après que nous nous fumes entretenus quelque temps les vns avec les autres, ie trouuay que mes Marchands estoient deuenus des Predicateurs; car s'estans apperceus que ces bonnes gens ignorent ce que nous leur auons enseigné depuis peu d'années, l'un d'eux prit la parole, pour les disposer à me prester plus fauorablement l'oreille. Cet homme que vous voyez, leur disoit-il, (se tournant vers moy) est vn homme de consideration, c'est nostre Pere & nostre Maistre, il a laué & purifié nos ames de toutes nos malices, par des eaux d'importance qu'il a versées sur nostrestes. Il nous enseigne tous les iours ce qu'il faut croire, & ce qu'il faut faire pour aller au Ciel. Il nous a fait entendre que celuy qui a tout fait, estoit vn Esprit tres grand, qui gouverne le Ciel & la terre: Qu'il est par tout, qu'il void tout, encore qu'on ne le



74 *Relation de la Nouvelle France,*

voyez pas ; Qu'il a vn fils qui s'est fait homme pour estre de nos parens, & pour nous deliurer de nos offenses ; Qu'il recompensera les bons , les mettant dans vne maison de plaisir, où l'on ne mourra iamais ; Qu'il enuoyera les meschans dans des feux qui sont aux entrailles de la terre, & d'où ils ne sortiront iamais. Ce fils se nomme Iesus, estant sur la terre il a defendu les tambours, les tabernacles, les consultes du Demon , les festins à tout manger, la pluralité des femmes. Ne tuez personne injustement, a-t'il dit ; ne debauchez point la femme d'autrui ; ne dérobez point, ne mentez point, a-t'il dit. Ie m'en vay au Ciel, d'où ie reuiendray vn iour pour resusciter tous les hommes, & pour emmener les bons avec moy, & ietter les meschans dans le feu, a-t'il dit. Voyez maintenāt quel chemin vous voulez tenir ? Le Pere vous apprendra celuy qui est bon, escoutez-le, nous l'aimons tous, nous l'admirons.

Iamais, dit le Pere, ie n'ay ouy prescher, ny escouter le Predicateur avec plus d'affection, comme ces choses estoient nouuelles à la pluspart de ces bonnes gens, ils les receuoient avec vne auidité



nompareille. Chaque personne, pendant tout le temps que nous sejournaſmes en celieu, auoit quaſi ſon Predicateur : car tous ceux de ma brigade preſchoient. Tout leur entretien, ſi toſt qu'ils eurent fait leur petit negoce, qui fut bien toſt expedié, n'eſtoit que des veritez Chreſtiennes. Je m'employay ſelon l'eſtendue de mon petit pouuoir, à cultiuier les plantes de cette nouuelle vigne, qui auoient deſia pris quelque racine en la foy, pour nous auoir frequentez à Tadouſſac, & à imprimer dans l'eſprit des autres les premiers elemens du Chriſtianisme. En fin j'en trouuay deuât que partir vne vingtaine, & dauantage, capables d'eſtre enrollez au nombre des enfans de Dieu. Je les baptizay avec vne ioye reciproque de tous coſtez. Le Capitaine de cette Eſquade, & toute ſa famille, furent de ce nombre. Si toſt que l'Eſprit de Dieu ſe fut emparé de ſon cœur, il luy délia la langue. Cet homme qui venoit de naiſtre en Ieſus-Chriſt, en parloit en des termes qui ne manquoient ny de lumiere, ny de chaleur. Pour concluſion, il nous conjura de retourner au premier Printemps, nous aſſeurant qu'il ſ'en alloit communiquer à



76 *Relation de la Nouvelle France,*

tous ceux de son pays, les threfors dont nous l'auions enrichy. Non-seulement ie me trouueray icy avec ma troupe, (disoit-il) mais j'en ameneray beaucoup d'autres, qui seront bien aises de gouster la douceur de vos paroles, & de iouir des bontez que vous nous auez departies. Ayans pris congé d'eux, nous nous embarquâmes, mes Nautonniers mirent la voile au vent, nous voguâmes assez heureusement, Nostre Seigneur nous fit la grace de le pouuoir tous les iours presenter en sacrifice à son Pere : Mes Mattelots estoient les Sacristins, qui dressoient, & qui paroient nostre Autel, avec plus d'amour & de volonté, que de gentillesse.

---

CHAPITRE VII.

*De la Mission de l'Assomption au pays des Abnaquiois.*

**Q**uelques Sauuages du pays des Abnaquiois estans venus visiter Noël Negabamat, Capitaine des nouueaux Chrestiens de la Residence de saint Ioseph, qu'on appelle ordinairement la Re-



fidence de Sillery ; & voyans que cet homme menoit vne vie toute nouvelle, ravis de la nouveauté de ses discours, & de la beauté de ses mœurs, se firent instruire en sa creance, qui leur parut si belle, & si raisonnable, qu'ils l'embrasserent avec ardeur: Et ayans en suite receu le saint Baptême, ils s'en retournerent en leur pays tous remplis de ioye, comme l'Eunuque de la Reine de Candace, pour communiquer à leurs compatriotes les bonnes nouvelles de l'Evangile. Le Baptême les fit Chrestiens & Predicateurs tout ensemble, ils parlent hautement de Iesus-Christ, & en public & en particulier. Les principaux de leur patrie, desirieux de participer à ce bonheur, deleguerent quelques vns d'entr'eux vers le Pere Superieur de nos Missions, pour obtenir des Religieux de nostre Compagnie, qui leur enseignassent (cōme ils disoient) le chemin du Ciel, dont leurs compatriotes leur auoient donné la premiere ouuerture. Ils arriuerent à saint Ioseph le 14. d'Aoust de l'année 1646. & apres auoir exposé le sujet de leur legation, le P. Gabriel Druilletes leur fut accordé. Ils l'embarquerent le 29. du mesme mois



78 *Relation de la Nouvelle France,*  
d'Aoust de la mesme année 1646. pour le  
porter en leur pais: où les ayans instruits  
pendant tout l'Automne, tout l'Hyuer, &  
tout le Printemps, ils le rendirent enfin à  
Kebec, tout chargé de Croix & de Pal-  
mes. Le 15. de Juin de l'année 1647. ces  
bonnes gens attirez par le goust qu'ils  
auoient pris en vne doctrine qui les eston-  
noit, & qui les consoloit tout ensemble,  
demandoient qu'on leur rendist leur Pe-  
re, apres quelques iours de repos & de ra-  
fraischissement. Mais on ne pût leur ac-  
corder pour iustes raisons. Ils retourne-  
rent iusques à deux & trois fois les années  
48. & 49. sans le pouuoir obtenir, dans  
la creance que nous auions que d'autres  
Religieux plus voisins de leur contrée, les  
pourroient saintement instruire. En fin  
estans retournez l'an 1650. ils presserent fi-  
fort, & de si bonne grace pour auoir leur  
Patriarche, (c'est ainsi qu'ils nomment le  
Pere) qu'ils l'enleuerent le premier de Se-  
ptembre de la mesme année, puis l'ayans  
ramené au mois de Juin de l'an 1651. ils ne  
luy donnerent que quinze iours de relas-  
che pour prendre des forces d'esprit & de  
corps, & en suite ils le conduisirent dere-  
chef au pais des Croix, d'où il est retour-



né le 8. iour d'Avril de l'an passé 1652. Il n'auoit parmy ces peuples si esloignez de nos façons de faire, qu'un François pour compagnon de ses trauaux, qu'on pourroit appeller en verité, les trauaux d'Hercule. Mais suiuous les memoires qu'on m'a communiquez sur ses voyages.

Le premier iour de leur embarquemēt, fut le premier iour de leurs croix, encore qu'il n'y ait aucun chemin dans ces grands bois, ou plustost que tous les bois, & toutes les riuieres de ces contrées ne soient que des chemins faits pour les hommes & pour les bestes sauages, & pour les poissons; si est-ce qu'on peut prendre le plus court, ou le plus long; le plus aisé, ou le plus difficile, pour arriuer au terme & au but qu'on pretend. Or les Nautonniers & les Guides qui conduisoient le Pere, prirent des routes nouuelles qu'ils n'auoient iamais frequentées, & nous auons sceu depuis, que tous ceux qui les auoient tenues, estoient ou morts de fatigue & de faim, ou auoient pensé mourir. Apres auoir vogué, & en partie cheminé quinze iours durant, par des torrens & par des chemins tres-affreux: cōme ils croyoient aborder le pais des Abnaquiois, ils trou-



uerent qu'ils n'auoient pas encore fait la troisieme partie de leur chemin ; & pour surcroist de leur malheur , ils estoient au bout de leurs viures & de leurs prouisions. Le Pere voyant ses gens dans ce dernier abandon , eut recours au Dieu des hommes & des animaux : Il luy offre le sacrifice de son Fils dans ces grandes forests, le conjurât par le Sang qu'il a respandu pour ces peuples , de les secourir dans leur necessité. La fin de son sacrifice fut la fin de leur disette. Comme il quittoit l'Autel, vn braue Catechumene, qui s'estoit ietté dans le fonds de ces bois pour chercher quelque remede à leur famine, luy vint offrir trois Orignaux, ou trois Elans qu'il venoit de mettre à mort. Cette manne qui leur rendit la vie, ne fut pas receüe sans estonnement, & sans actions de graces: Ils la goustèrent avec autant plus de ioye, qu'ils l'attendoient moins, & qu'ils en auoient plus de besoin. Il est vray qu'apres vn bon repas ils en firent plusieurs de bien mauuais : car ils firent saler, à la façon des Sauvages, ce qui leur restoit de leur festin, c'est à dire, qu'ils firent bouccaner, ou seicher à la fumée cette viande pour la suite de leur voyage ; ce bouccan fut leur  
vnique



*des années 1651. & 1652.* 81

unique mets. L'on ne sçait que c'est de pain, ny de vin, ny de sel, ny de saulce dans ces courses; Les travaux appellent l'appetit, & l'appetit est le meilleur cuisinier du monde; tout est bon, tout est excellent dans ces rencontres. Apres ce petit rafraischissement, il fallut reprendre l'auiron pour monter contre le fil de la Riviere saint Jean iusques à sa source. Les basses, les cailloux, les rochers, & les portages de cinq & six lieües qu'on devoit rencontrer, donnerent tant d'espouvante à vn Sauvage Etechemin qui estoit de la bande, qu'il vouloit à toute force tourner le dos au pais des Abnaquiois, pour suiure le courant de la Riviere, & s'en aller à Pentagouet en l'Acadie, où ce fleuve se va dégorger dans l'Ocean. Le Catechumene dont ie viens de parler, luy ayant représenté le déplaisir qu'il causeroit aux Abnaquiois, qui attendoient depuis vn si long-temps leur Patriarche, il reprit courage; ils bādent tous leurs nerfs, ils poussent leur petit batteau d'escorce contre la rapidité des torrens, au trauers de mille naufrages: mais au troisieme iour ce pauvre Etechemin perdit cœur vne autre fois. Et encore qu'il sceut bien



82 *Relation de la Nouvelle France,*

que le Pere ne les eut pas égarez , ny engagez dans ces détours, si est-ce que le regardant comme le premier objet de cette entreprise , il déchargeoit sur luy à tous momens le poids de sa colere , qui s'augmentoit à mesure que croissoient les difficultez & les souffrances. Enfin il fallut pour appaiser cet importun, que le Pere se separast de son compagnon, & qu'il abandonnast son petit bagage , pour alléger leur gondole. Cela fait, cet homme de mauuaise humeur prit le mort aux dents, comme on dit; il rame dans les torrens, il chemine dans les portages avec le Pere, & avec son Catechumene, sans prendre aucun repos depuis le matin iusques au soir. Les Guilledins d'Angleterre mangent quasi toute la nuit, & cheminent tout le iour sans débrider. Les Americains de ces contrées en font quasi de mesme quand ils sont en voyage; le pauvre Pere partoit au point du iour, trauailloit sans manger iusqu'à la nuit; son souper estoit vn peu de cette chair fumée, dure comme du bois; ou vn petit poisson, s'il en pouoit prendre à la ligne; & apres auoir fait ses prieres, la terre estoit son liât, son cheuetvne buche, & avec tout cela il dor-



moit plus doucement que ceux qui ne font que resver sur la plume & sur le duet. Enfin apres 23. ou 24. iours de bon exercice, ils arriuerent à l'un des villages ou l'une des bourgades des Abnaquiois, nommée, *Nazanchouak*: La Capitaine du lieu appelé, *Oumamanradok*, les receut avec vne salve d'arquebusades, & embrassant le Pere s'escria: Je voy bien maintenant que le grand Esprit qui commande dans les Cieux, nous veut regarder de bon oeil, puis qu'il nous renuoye nostre Patriarche. Sa harangue fut assez longue, à la fin de laquelle s'enquistant du Catechumene, si le Pere s'estoit bien porté en chemin, & si on l'auoit bien traicté? Comme il eut appris que le Sauvage, qui estoit du pais des Etechemins, l'auoit souuent molesté, il luy dit d'un accent graue & fort serieux: Tu as fait paroistre, en ne portant point de respect à nostre Patriarche, que tu n'auois point d'esprit. Tu l'as voulu quitter au milieu du chemin, tu l'as cōtrains de se separer de son compagnon, & d'abandonner vn petit paquet qu'il portoit avec soy. Si tu estois de mes subjects, ou de ma nation, ie te ferois ressentir le déplaisir que tu as causé à tout le pais.



84 *Relation de la Nouvelle France,*

Ce pauvre homme, au lieu de s'excuser, se condamna soy-mesme: Les Sauvages ne résistent pas aisément à la vérité connue, quoy qu'ils ne la suivent pas toujours. Il est vray, respondit-il devant toute l'assemblée, que ie n'ay point d'esprit d'auoir si mal traité vne personne, à qui j'ay mesme de grandes obligations. Il m'a rendu ma santé par ses prieres, estant tombé malade, il veilla toute la nuit auprès de moy, chassant par son oraison le Demon qui me vouloit oster la vie. Me voyant infirme, il ne se contentoit pas de porter son bagage ou son paquet aux lieux où il falloit cheminer, mais il se chargeoit encore du mien: Il obtient de celuy qui a tout fait, tout ce qu'il veut; les caux où nous passions estans trop basses, il demanda de la pluye pour faire grossir les torrens, il fut exaucé tout sur l'heure, & nous bien soulagez. La faim estant prest de nous esgorger, il pria pour nous; & celuy qui est le maistre des animanx, nous donna de la chair plus qu'il n'en falloit pour le reste de nostre voyage: Luy n'en mangeoit pas pour l'ordinaire, lors qu'elle estoit fraische; il peschoit sur la nuit quelques petits poissons à la ligne,



dont il se contentoit, nous laissant les bons morceaux. Dans le temps que les eaux n'estoient pas assez profondes, & que nostre Canot estoit en danger de trouuer le fond, il descendoit à terre pour nous soulager, cheminant les six iours entiers par des brossailles & par des rochers espouuantables. Il ne mangeoit point dans ces trauaux, & le soir il se trouuoit plus frais, plus guay, & plus content que nous. Ce n'est pas vn homme, c'est vn *Nioneskou*, c'est vn Esprit, ou vn Genie extraordinaire: Moy ie suis vn chien de l'auoir si mal traité. Quand ie criois contre luy, ou que ie le menaçois, l'accusant d'estre la cause de nostre malheur, il ne disoit pas vn mot, ou si il parloit, l'on eut creu qu'il estoit coupable, & que j'auois raison de le tancer, tant ses reparties estoient douces, & pleines de bonté. Ouy, il est vray, ie n'ay point d'esprit, mais j'en veux auoir: Ie veux aimer la priere, & me faire instruire par le Patriarche. Voila la confession de ce Sauvage Etechemin, & les remarques qu'il auoit faites sur la vie du Pere. Mais suivons nostre route.

Aussi tost qu'il eut finy son discours, il



ne se trouua ny homme, ny femme, ny enfant, qui ne vinst temoigner au Pere la ioie qu'ils ressentoient de son retour. Ce n'estoient que festins dans toutes les cabanes, on le venoit prendre & enleuer avec amour. Enfin te voila luy disoient-ils, nous te voyons tu es nostre Pere, nostre patriarche, & nostre cher compatriote: car viuant comme nous, & demeurant avec nous tu es Abnaquiois comme nous. Tu ramene la ioye avec toy dans tous le pays, nous estions dans la pens  e de quitter nostre patrie, pour t'aller chercher, voyans que plusieurs mourroient en ton absence, nous perdions l'esperance d'aller au Ciel, ceux, que tu as instruits faisoient tout ce qu'ils ont appris de toy: mais estans malades, leur c  ur te cherchoit, & ne te pouuoit trouuer, ceux qui sont morts, te regretoient avec larmes, mais enfin te voila de retour.

Quelques-vns luy faisoient vn amoureux reproche, si tu nous a fait beaucoup de bien par ta presen  e, tu nous a cause de grands maux par ton absence, si tu fusse demeur   avec nous tu nous aurois entierement instruits, nous ne sommes Chrestiens qu'   demy, pour ce que tu ne



nous a instruis qu'à demy, le Demon a desolé nostre pays, pour ce que nous ne sçauions pas bien comme il falloit, auoir recours à Iesus, qui est son maistre.

Vn Capitaine me fendit le cœur, dit le Pere, il me repetoit souuent en public & en particulier, qu'il aimoit ses enfans plus que soy mesme; j'en ay perdu deux, adiou-toit-il depuis ton despart, leur mort n'est pas ma plus grande douleur, mais tu ne les a pas baptisés, voila ce qui me fait mourir. Il est vray que ie leur ay fait ce que tu m'auois recommandé, mais ie ne sçay si j'ay bien fait, & si iamais ie ne les verray dans le Ciel si toy mesme les auois baptisés, ie ne les regretterois pas, ie ne ferois pas marry de leur mort, au contraire j'en ferois consolé. Du moins, si pour bannir ma tristesse, tu nous voulois promettre de ne penser de dix ans à Kebec, & de ne point nous abandonner pendant ce temps là, tu ferois voir que tu nous aime. La dessus il me mena au tombeau de ses deux enfans, sur lesquels il auoit planté deux belles Croix peintes en rouge, qu'il alloit saluer de temps en temps, à la veüe des Anglois mesmes qui demeurent à *Koussinok*, Lieu où est le Cimetiere de ces bon-



nes gens , pour ce qu'ils tiennent en cet endroit deux grandes assemblées, l'une au Printemps , & l'autre en l'Automne.

Vn ieune homme des plus accomplis que j'aye veu , me surprit , remarque le mesme Pere, Je viens de bien loing , me dit-il, i'en'ay pas coustume de paroistre en ces quartiers ; Il y a fort long-temps que quelqu'un, que ie ne connoy pas, me presse & me sollicite au fond du cœur, de te venir trouver , & d'obeir à ce que tu me diras , me voicy donc entre tes mains , enseigne moy , & si ie contreviens à ce que tu m'auras dit chaste moy , ie te diray tout, mon cœur te sera ouuert , & tu y escriras ce qui est dans le liure de Iesus.

Si tost que la nouvelle du retour du Pere fut portée és autres bourgades des Abnakiens , on le vint inviter de tous costés avec de grandes & instantes prieres , d'instruire tout le pays. Il visita premierement les 12. où 13. habitations ou bourgades de ces peuples , qui sont rangées en partie sur la rivièrre de Kenebek , que les François appellent vulgairement *Quinibequi*, & en partie sur la coste de l'Acadie que les Anglois occupent ; il fut par tout receu comme vn Ange descendu du Ciel. Si les



années ont leur Hyuer, aussi ont elles leur Printemps, si ces Missions ont leurs amertumes, elle ne sont pas priuées de leurs ioies, & de leurs consolations, j'en ay resfenty, dit le Pere, de si grandes, qu'on ne les peut exprimer, voyant que la semence Euangelique que j'auois iettée il y auoit quatre ans, dedans des terres qui ne produisoient depuis tant de siècles que des ronces & des espines, porteroient des fruiçts dignes de la table de Dieu. Pourroit-on bien sans ressentir vn plaisir plus grand que celuy des sens, voir des vieillards, & des malades languissans mourir quasi de ioye, ayant receu leur passeport pour le Ciel: Leur peut-on fermer les yeux dans cette allegresse, sans y participer? La mort qui fait peur à tout le monde, ressiouyt vn Sauuage nouvellement baptizé, & la foy de ses parens change leurs hurlemens & leurs grands cris en des actions de graces, & en des ressiouyssances de ce qu'ils se verront bien tost les vns les autres en Paradis; voilà comme se comportent les vrayz fideles au iour de leur trespas.

Après que le Pere eut fait sa visite, & qu'il eut employé quelque temps à culti-



uer les bourgades qui sont plus auant dans les terres, & plus esloignées des Anglois, il prit avec soy Noël Negabamat, ou Tekouerimat, Capitaine des Chrestiens de saint Ioseph, pour descendre en la nouvelle Angleterre. Ce braue Neophye estoit delegué de la part des Algonquins du grand Fleuve, & le Pere estoit enuoyé comme Agent, ou comme Ambassadeur par ses bons Catechumenes Abnaquiois, pour demander aux Anglois quelque secours contre les Hiroquois, qui s'efforcent d'exterminer ces pauvres peuples aussi bien que les Hurens & les Algonquins. Le Pere fut à Boston, à Pleymot, bref il parcourut quasi toute la nouvelle Angleterre, sans que les Anglois se missent beaucoup en peine de secourir ces pauvres nations qui leur sont voisines. Sa legation estant acheuée, il retourne vers ses chers enfans, il parle de faire vn tour vers ses freres qui estoient à Kebec. Ceux qu'il auoit instruits, & qu'il auoit engendrez en Iesus-Christ, le querellent amoureusement: mais il fallut partir pour aller rendre compte de son employ.

Pour conclusion de ce Chapitre, ie dis (parlant comme les Sauuages) que les



souffrances que le Pere & son compagnon rencontrèrent allans au pais des Abnaquiois, dont nous venons de parler, n'estoient pas des souffrances, mais qu'ils en rencontrèrent à leur retour, & luy & tous ceux qui le ramenoient, penserent mourir de faim & de froid, quelques-uns mesmes perdirent la vie dans les neiges, & dans l'excez des fatigues qu'il faut assez souuent souffrir dedans ces courses. Le Pere & son cher compagnon ont soustenu leur vie dix iours entiers sans rien manger, apres auoir ieusné tout le Carefme. Enfin ils s'aduiserent de faire boüillir leurs souliers, & en suite la camisole du Pere, qui estoit faite de cuir d'Elan, & les neiges se fondans, ils firent aussi boüillir les cordes ou les tresses des raquettes dont ils se seruoient pour ne point enfoncer quand elles estoient hautes. Tout cela leur sembloit de bon goust; la grace donne vn merueilleux assaisonnement aux amertumes prises pour Iesus-Christ. Bref ils arriuerent à Kebec le Lundy d'apres Pâques, n'ayans ny force ny vigueur, qu'autant que le zeile du salut des ames en peut donner à vn squelet. *Non ex solo pane uiuit homo.* L'Esprit de Dieu est vne bonne



92 *Relation de la Nouvelle France,*  
& solide nourriture. Le visage défait, &  
le corps abbatu de ce bon Pere, n'apas  
empesché qu'un autre ne soit party avec  
cinq ou six Neophytes dans de petits Ca-  
nots d'escorce, pour aller dans les costes  
de l'Acadie, & par là trouver vne entrée  
plus facile aux peuples qu'on nomme les  
Etechemins, les Abnaquiois, les Soko-  
quiois, les Sourikois, les Chaouanaquiois,  
les Mahinganiois, les Amirgankaniois,  
& quantité d'autres nations sauvages qui  
sont sedentaires, & qui ont des bourgs de  
mille & deux mille combattans. Mais  
poursuivons ce qui reste de la Mission fait  
aux Abnaquiois.

---

#### CHAPITRE VIII.

*Des bonnes dispositions qu'ont les Abna-  
quiois pour la foy de Iesus-Christ.*

**L**E P. Gabriel Druillettes nous don-  
ne dans ses Memoires quatre ou cinq  
belles marques des riches dispositions, &  
des grandes inclinations qu'ont les peu-  
ples qu'il a visitez, à la foy de Iesus-  
Christ.



La premiere est tirée de leur foy, qu'ils ont conseruée, & qu'ils ont augmentée pendant trois ou quatre ans, quoy qu'ils n'ayent eu aucun maistre, ny aucun Docteur pour cultiuier cette premiere graine, & cette premiere semence qu'il auoit ietée dans leurs cœurs, comme en passant, & fort à la haste. Cette foy leur fait croire que celuy qui se plaist dans les ames simples, les auoit extraordinairement fortifiez dans leurs tentations, & qu'il les auoit gueris miraculeusement de plusieurs maladies.

Ceux que j'auois instruits fort legerement, dit le Pere, ne faisant encore que begayer en leur langue, ont recité constamment tous les iours les prieres que ie leur auois enseignées. Ceux que j'auois baptisez en des maladies que ie croyois mortelles, n'osant pas dans ma premiere visite confier ce Sacrement à ceux qui iouyssoient d'une pleine santé : ceux-là, dis-je, publioient par tout, que le Baptisme leur auoit donné la vie ; & comme ils auoient appris qu'il falloit confesser les pechez où l'on tomboit apres la reception de ces eaux salutaires, ils n'attédoiēt pas qu'ils fussent à genoux aux pieds du



Prestre; ils s'en accusoient tout haut, demandans qu'on les punist pour des fautes bien legeres.

L'un d'eux guaray assez soudainement s'escrioit: Je marchois comme les bestes à quatre pieds, ie ne pouuois me tenir debout: & aussi tost que j'ay receu le Baptisme, j'ay couru & chassé comme les autres. Les peres & les meres me venoient presenter leurs petits enfans, que j'auois regenez dans les eaux du Baptisme, croyant qu'ils estoient prests d'expirer: Voila (medisoient-ils) celuy que tu as resuscité par ces eaux importantes que tu as versées sur leurs testes.

Quelques-uns m'entretenoient iusques à minuit, me rendans vn compte fort naïf de leur conscience: Ils me racontotent les attaques que les Jongleurs leur auoient bien souuent liurées à l'occasion de leurs maladies, les voulans penser à leur mode, par des cris & par des heurlemens, & par des inuocations du Demon. Ils ont esté cause (disoient-ils) que nous auons redoublez nos prieres, demandans à Dieu la santé de nos malades, afin qu'on ne nous pressast point de les mettre entre les mains de ces Jongleurs, & souuent



nous auons esté exaucez sur le champ. Apres auoir dit à celuy qui a tout fait, ce que nous sçauions, & ce qui nous venoit au cœur, nous adioustions ces paroles: Tu connois nos cœurs, nous voulons faire pour le bien des malades, ce que fait le Patriarche; nous te disons ce qu'il te dit, tu le sçais, nous ne le sçauons: regarde ce qu'il fait, & ce qu'il te dit, c'est cela que nous voulons faire, & que nous te voulons dire.

I'ay rencontré vn vieillard, aagé à peu pres de cent ans, ie l'auois baptizé dès l'an 1647. le croyant sur le bord de sa fosse: ce bon Neophyte, que ie nommay Simeon, receut la vie du corps & de l'ame si soudainement, apres trois ou quatre ans de langueur dans vne extreme vieillesse, qu'il causa de l'estonnement à tous ses compatriotes. Vous sçauiez bien, leur disoit il, que j'estois mort deuant mon baptisme, ie ne viuois plus, ie ne pouuois me remuer, & deux iours apres on me vid en santé. I'ay tué cet hyuer quatre Orignaux, que j'ay attrapez à la couste: I'ay assommé deux Ours, & mis à mort quantité de Chevreux. Ie pense incessamment à celuy qui a tout fait: Ie parle souuent à Ie-



96 *Relation de la Nouvelle France,*

fus, il me fortifie, il me console, ie suis demeuré seul de ma famille, j'ay veu mourir mon fils, & ma femme, & mes petites nepveux: j'en ay ressentý quelque douleur au commencement, mais si tost que ie me suis mis en prieres, mon cœur a esté consolé, scachant que ceux qui croient, & qui sont baptizez, vont en Paradis. I'ay remercié celuy qui a tout fait, de ce qu'ils estoient morts Chrestiens, & ie sens vne ioye dans mon ame, de ce que ie les veray bien tost dans le Ciel. Quand mon cœur se veut égarer dans la tristesse, ie me mets à genoux deuant Dieu, & la priere me fait retrouver mon cœur.

Vn autre encore plus aagé, est si fort adonné à l'oraison, qu'il passe vne partie de la nuict s'entretenant tout seul avec Dieu, pendant que les autres prennent leur repos. Estant couché dans sa cabane, j'entendis vne fois qu'il se leuoit à la dérobée, les tenebres le déroboient de mes yeux, mais non pas de mes oreilles. Il commença son oraison par les prieres que ie luy auois enseignées, il en adjousta d'autres si à propos, & forma des actes si amoureux, qu'ils me rauirent: Il taschoit de parler bien bas, & moy de l'escouter bien fort



fort attentiuemēt. Ses gēs me dirent que Dieu exauçoit souuēt les prieres qu'il faisoit pour des malades, ou pour d'autres fuyers. L'ay remarqué cy dessus, qu'vne partie de ceux que le Pere auoit baptizez, dans l'extrémité de leurs maladies, retournans apres en santé, attribuoient cette faueur à leurs Baptêmes. Ceux qui sont morts, ajoute le Pere, n'estoient pas moins auantagés, ils publioient par leurs actions ce que les autres preschoient par leurs paroles. Premieremēt ils rebutoient tous ceux, qui leur parloient de faire venir leurs medecins, ou leurs Jongleurs, pour les souffler, & pour chanter sur eux, & pour battre leur tambours afin de chasser le Demon, comme ils disent, qui leur veut oster la vie.

En second lieu, ils faisoient paroistre sur leur visage, & par leurs discours; qu'ils partoient de ce monde, pour aller au Ciel, avec tant de paix, & tant de ioie, que non seulement ils empeschoient les pleurs, & les lamentations de leurs parens, mais ils leur donnoient en outre vn ardent desir de se faire instruire en la foy de Iesus-Christ, pour jouir d'vne si douce mort.

Quelques femmes bien agées, malades



depuis deux ans , ne pouuant empescher que les Longleurs du pays inuités par leurs parens , n'appliquassent sur elles leurs superstitions, demandoient à Dieu pendant leurs hurlemens , qu'il luy pleut de confondre leur Demon: en effet, elles se trouuoient plus mal apres ces tintamarres , & lors que ces beaux Medecins les abandonnoient, comme des personnes qui auoient desia vn pied dans le pays des morts, ces bonnes ames demandant la vie, & la santé à nostre Seigneur , la recouuroient soudainement à la veuë de ces Longleurs.

Quantité de ces bonnes gens (poursuit le Pere ) m'ont assuré , que leurs enfans morts incontinent apres le Baptisme, leur auoiët paru venir du Ciel, pour les encourager à embrasser les verités Chrestiennes. Cette veuë, disoient-ils , nous combloit d'une ioye que nous ne pouuons exprimer, & quelques-vns de nous estans malades guërissoient quasi tout à coup. Ces pauures Neophytes , me menoiënt sur le tombeau de ces petis Anges, pour me faire remercier Dieu de les auoir pris pour ses enfans. La les meres me dechargeoient leur cœur, me racomptans les secours qu'elles auoient eu à Dieu, & le se-



cours qu'il leur auoit donné. Nous estions inconsolables deuant qu'on nous eut parlé du Paradis, nous pleurions tous les matins & tous les soirs la mort de nos moindres parens, mon cœur est maintenant tout changé, il ne ressent plus ces angoisses, mesme à la mort de mon mary, & de mes enfans; mes yeux iettent bien quelques larmes, au commencement, mais aussi tost que ie viens à penser que leurs ames sont au Ciel avec Dieu, ou quelles y entreront bien tost, ie sens vne ioie dans mon ame, & toute ma pensée n'est que de le prier, qu'il les mette bien tost avec luy. Que si le Demon veut par fois me ietter dans la tristesse, comme si i'auois perdu ceux que i'aymois, l'ay aussi tost recours à celuy qui a tout fait, lequel me fait connoistre que celuy qui est avec luy, n'est pas perdu.

Le second indice de l'amour qu'ont ces peuples pour Iesus-Christ, & pour sa doctrine, est fondée sur leur ferueur, & sur quelques actions tres-remarquables, pour des hommes conceus au milieu de la Barbarie l'ardeur estoit si grande pour retenir les prieres, où les verités que ie leur enseignois, dit le Pere, qu'ils passaient les



100 *Relation de la Nouvelle France,*  
nuiets à repeter leurs leçons: les vieillards  
se rendoient escoliers de leurs petits en-  
fans: les Catechumènes tres-peu versez  
en nostre science, estoient contrains de  
faire les Docteurs. Quelques-uns escri-  
uoient leurs leçons à leur mode, ils se ser-  
uoient d'un petit charbon pour vne plu-  
me, & d'une escorce au lieu de papier.  
Leurs caracteres estoient nouveaux, &  
si particuliers, que l'un ne pouuoit con-  
noistre, ny entendre l'escriture de l'autre:  
c'est à dire, qu'ils se seruoient de certaines  
marques selon leurs idées, comme d'une  
memoire locale, pour se souuenir des  
points, & des articles, & des maximes  
qu'ils auoient retenuës. Ils emportoient  
ce papier avec eux pour estudier leur le-  
çon dans le repos de la nuit. La ialousie  
& l'emulation se mettoit parmy eux, les  
petits combattoient avec les plus grands,  
à qui auroit plu tost appris les prieres; &  
ceux à qui ie ne pouuois pas donner tout  
le temps qu'ils me demandoient, m'en fai-  
soient des reproches.

Mais il me semble que les Anges pre-  
noient sur tout vn grand plaisir de voir  
l'ardeur & le courage des plus petits en-  
fans: Ils couroient tous apres moy pour



estre instruits : Ils venoient aux prieres tous les soirs & tous les matins : Ils ioignoient leurs petites mains, ils se mettoient à genoux, ils prononçoient apres moy fort posément ce que ie leur faisois dire, ils continuoient tous les iours cet exercice, de leur propre mouvement, ou plustost par le mouvement de celuy qui commanda aux Apostres de les laisser approcher de sa personne, puis que le royaume des Cieux leur appartient.

La troisieme marque consiste en l'amour qu'ils ont pour leur Pere & pour leur Patriarches. Les Sauvages, qui pour l'ordinaire sont assez froids dans leurs passions, luy ont fait bien souuent ressentir la chaleur de leur affection. Ils l'honoroient dans leurs festins, du mets qu'ils donnent ordinairement à leurs Capitaines. S'il faisoit voyage avec eux, on choissoit le meilleur Canot, on luy presentoit la place la plus commode; & s'il vouloit manier l'auiron, ils luy arrachotent des mains, disans que son occupation estoit de prier Dieu. Prie pour nous, & nous ramerons pour toy, disoient ils. Aux endroits où il falloit porter leur petit Navire, & tout leur bagage, pour pas-



102 *Relation de la Nouvelle France,*  
ser d'un fleuve à vn autre, ou pour éviter  
des precipices, & des cheutes d'eau, ils  
portoient son liât, son manteau, & bien  
souuent sa maison, & tout cela consistoit  
en vne couverture, ou vne castelongne,  
qui luy seruoit à tous ces vsages. Or com-  
me il se chargeoit toujours de sa Chap-  
pelle, quelques-vns le prioient de la met-  
tre sur les sacs, ou sur les pacquets qu'ils  
portoient sur leurs espaules, disans que ce  
petit fardeau de Iesus soulageoit la pesan-  
teur de leur charge. Quelques-vns, pour  
l'obliger à demeurer toujours parmy eux,  
s'offrirent de luy défricher de la terre, &  
de luy donner des champs pour les faire  
cultiuer.

Si quelqu'un moins affectionné à nostre  
creance, laissoit eschaper quelque parole  
contre le Patriarche, il estoit aussi tost re-  
leué. Voicy vn exemple bien remarqua-  
ble pour des Sauvages. Le Pere estant en  
vne bourgade assez voisine des habita-  
tions Angloises, le valet d'un Anglois se  
trouua certain iour dans vne cabane, où il  
instruisoit ses bons Catechumenes. Cet  
homme, ou par malice, ou pource qu'il  
n'entendoit pas bien la langue du pays,  
rapporta par apres à son maistre, que le



Pere auoit parlé contre les Anglois ; ce qui n'estoit pas veritable. Ces braues Neophytes apprenans que ce maistre s'en formalisoit, se transporterent en sa maison, & luy tinrent ce langage: Nous entendons mieux nostre langue que ton seruiteur: nous estions proches du Patriarche quand il parloit, nous l'escoutions attentiuement, toutes ses paroles sont venues droit dans nos oreilles, sois assuré qu'il n'a iamais dit aucun mal de vous autres. Il nous enseigne que celuy qui a tout fait, haït, & condamne, & punit le mensonge, puisque nous voulons receuoir sa loy, & luy rendre obeyssance, prends ces pensées dans ton cœur. Ces gens-là ne mentent point. Au reste, il est bon que vous sçachiez que le Pere est maintenant de nostre nation, que nous l'auons adopté pour nostre compatriote, que nous le considerons, & nous l'aimons comme le plus sage de nos Capitaines, & nous le respectons comme l'Ambassadeur de Iesus, auquel nous nous voulons donner entierement, & par consequent quiconque l'attaque, attaque tous les Abnaquiois. Le Capitaine qui prononça cette petite harangue, le fit d'un si bon accent, que les



104 *Relation de la Nouvelle France,*  
principaux Anglois, qui demeurent sur la  
riuiere de Kenebek, l'ayant ouye, firent  
venir le Pere, & le prierent par la bouche  
d'un Anglois venu depuis peu de Boston,  
lequel parloit fort bon François, d'ou-  
blier tout ce qui s'estoit passé, l'assurans  
qu'ils n'auoient plus aucune creance aux  
faux rapports d'un valet estourdy: Qu'ils  
voyoient bien que tous les Sauvages l'ai-  
moient, qu'ils auoient de grands respects  
pour luy, qu'eux-mesmes l'honoroient  
comme un Ministre du saint Euangile:  
que la confiance que ces peuples auoient  
en luy, nourriroit la bonne intelligence  
entre les François, les Anglois, & les Sau-  
uages de ces contrées; & là-dessus paru-  
rent les bouteilles & les tasses, & l'on beut  
largement à la santé du Pere. Et comme  
ils estoient de diuers endroits, chacun  
prioit le Pere de luy donner vne visite en  
son habitation, l'assurant qu'il y seroit  
toujours receu avec honneur. En effect,  
autant de fois que le Pere nauigeant sur le  
fleuve de Kenebec, où ils habitent, les al-  
loit saluer, ils le receuoient avec des té-  
moignages d'une sensible bienueillance;  
& depuis ce temps-là, ils ont toujours  
parlé de luy fort auantageusement aux  
Sauuages.



Ceux de *Naranchouak*, qui sont de tout temps les plus considérables de cette contrée, & qui ont de grandes alliances avec plusieurs nations de la nouvelle Angleterre, voulans donner des preuues de l'amour qu'ils portoient à leur Patriarche, & à sa doctrine, l'ont publiquement dans vne grande assemblée, naturalisé, & incorporé à leur Nation. Le Capitaine *Oumamanradok* qui harangua, dit hautement, que le Patriarche estoit non seulement leur maistre en la foy, mais qu'il estoit encore la meilleure teste du pays pour parler, & pour déterminer de leurs affaires; & qu'encore qu'il y eust longtemps qu'il regardast le Soleil, qu'il n'estoit neantmoins qu'un enfant: que le Patriarche estoit un vieillard tout rempli de sagesse; cet homme est le meilleur cerueau de tous les Abnaquiois, & le plus affectionné à nostre creance.

La quatriesme preuue des affections qu'ont ces peuples pour Iesus-Christ, est tirée de leurs actions. *Cæpit Iesus facere, & docere*: Iesus commença d'operer nostre salut par ses actions, & puis par ses documens. Il ne veut pas que tous ceux qui luy appartiennent, soient des Docteurs,



106 *Relation de la Nouvelle France,*  
mais il les veut tous obeyssans. Tu nous  
commandes (disoient-ils au Pere) de com-  
battre, & de resister aux Demons qui  
nousattaquent: Ils sont en grand nom-  
bre, mais leurs forces diminuent de iour  
en iour, & nostre courage augmente.

Le Demon qui excite, & qui foment  
les querelles & les inimitiez, est banny  
d'entre nous: Tu n'entends point de bruit  
dans nos cabanes: Les femmes ne s'e-  
crient point les vnes les autres. La mort  
soudaine de l'un de nos Capitaines, en  
suite d'un different qu'il auoit eu avec le  
Capitaine de ceux qui habitent sur l'em-  
bouchure de nostre Riuere, nous a fait  
croire que cet homme tenu pour un grand  
Sorcier, l'auoit tué secretement par ses  
fortileges: Nostre cœur réucilloit déjà  
les anciennes inimitiez que nous auons  
eues avec ces peuples, & nous estions sur  
le point de nous couper la gorge, & de  
nous faire la guerre: mais tes paroles ont  
banny ce Demon. Tu es nostre Pere, sois  
aussi nostre Arbitre: Parle dans nos con-  
seils, tu seras escouté; nous remettrons  
toujours nos differens entre tes mains;  
nous voyons bien que tu nous aimes, souf-  
frant, & ieusnant, & priant iour & nuict  
pour nous autres.



Pour le Demon de l'yurongnerie que tu auois chassé de nos cabanes en ton premier voyage, les Anglois l'ont ramené si tost que tu nous a quittez, mais il faut maintenant l'exterminer pour vn iamaïs: car il nous oste la vie, il nous cause des meurtres, il nous fait perdre l'esprit, nous rendans semblables à des enragez. Allons presentement trouuer le Commis des Anglois, & luy tenons ce discours: Toy Commis de Pleimot & de Boston, peins nos paroles sur le papier, & les enuoye à ceux de qui tu dépends, & leur dis que tous les Sauuages alliez, qui demeurent sur le fleuve de Kenebek, haïssent autant la boisson de feu, ou l'eau de vie, cōme ils haïssent les Hiroquois; & que s'ils en font encore apporter pour en vendre aux Sauuages, qu'ils croiront que les Anglois les veulent exterminer. Peins ces paroles, & nostre Patriarche nous seruira d'Ambassadeur, il les portera à vos Gouverneurs, accompagné des principaux d'entre nous: & apres cette defense, si quelqu'un s'en yure en cachette, on le fera punir selon que nostre Pere en aura ordonné.

Le Demon qui nous donne de la crainte de nos Sorciers, & de la creance pour



nos Pythonesse, qui deuinent les choses futures, & qui connoissent (à ce qu'elles disent) les choses absentes, ce Demon a perdu son credit. Tes prieres, & celles des petits enfans, & le recours que nous auons à Dieu, nous font voir la vanité, & l'impuissance de ces Jongleurs, & de leurs sortileges. Combien de fois auons-nous veu des personnes aux abois, que nous croyons enforcélées, reuenir en santé, ayant prié celui qui est le maistre de tous les Demons. Il est vray que tous les Sorciers auoient maintenant leur foiblesse, & le pouuoir de Iesus. Quelques-vns mesme inuitent le Pere en leurs cabanes, & le traitent fort honorablement. Le plus remarquable, & le plus redouté d'entr'eux, nommé *Aranbinau*, qui autrefois auoit leué la hache sur le Pere pour l'assommer, l'ayant trouué catechisant vn sien neveu, s'est rendu si docile aux paroles du Pere, qu'il fait maintenant profession de l'auoir pour amy intime.

Quant au Demon (disoient-ils) qui nous a fait aimer la polygamie, il est fort décrié parmy nous, puisque nous voyons bien les inconueniens & les desordres qui prouiennent de la pluralité des femmes.



Celuy qui dans cette bourgade pretend d'estre élu Capitaine, ne le fera iamais, sil ne quite l'une de ses deux femmes; & quand quelqu'un ne voudroit pas auoir de l'esprit, cela n'empescheroit pas que les autres ne se fissent Chrestiens. Ils adjouterent en suite de ces discours apostrofans le Pere.

Prends donc courage, demeure avec nous, puisque nous sommes prests de t'obeyr. Tu es nostre compatriote; nous sommes tous de mesme nation. Tu es nostre maistre; nous sommes tes disciples. Tu es nostre pere; nous sommes tes enfans. Ne nous abandonne pas à la furie des Demons. Ne croy pas qu'ils soient allez bien loing: ils nous viendront esgorger si tost que tu seras party: deliure-toy, & nous aussi, de la peine de tant de voyages, & si longs, & si fascheux, qu'on ne scauroit rien porter avec soy, ce qui nous met souvent en danger de mourir de faim. Nous sommes tesmoins que les principaux Anglois de ces contrées te respectent. Les Patriarches del'Acadie nous ont dit qu'ils t'auoient escrit, que tu pouuois reuenir en nostre pays quand tu voudrois. Que deuiendront ceux qui mourront sans ba-



presme, ou sans confession en ton absence? Je vous aduoüe, dit le Pere, qu'ils m'attendrirent, & si ie n'eusse creu que Dieu me r'appelloit à Kebec par la voix de mon Superieur qui me mandoit, les traux les plus horribles ne m'auroient iamais arraché du pays de ceux que j'aime plus que moy-mesme.

La derniere marque de la bonté de ces peuples pour la foy, est leur esprit desinteressé. Les Sauvages Hurons & les Algonquins peuuent attendre quelque secours de nos Peres, & par leur entremise, des François: mais les Abnaquiois ne peuuent pretendre de nous que leur instruction teute pure; ils voyent parmy eux vn Pere & son compagnon dans la necessité de toutes choses, n'ayant pour maison que leurs cabanes d'escorce, pour leur lit que la terre, pour leur nourriture que leurs salmigondis. Ils n'attendent aucune grace des Anglois, par la faueur des Iesuites: Ils n'ont point la pensêe de venir en marchandise à Kebec, leur ayant esté declaré dès l'an 1646. qu'vn ou deux Canots suffisoient, pour venir tous les ans renouveler les alliances qu'ils ont avec les nouveaux Chrestiens de saint Ioseph. Si bien



*des années 1651. & 1652.* III

qu'ils n'ont point d'esperance, ny pour le particulier, ny pour le public, de tirer aucune vtilité temporelle de la venue de nos Peres en leur pays. C'est Dieu seul qui leur a donné la grace, & la force de perseverer si long-temps dans des actions de pieté, sans maistre, sans docteur, & sans guide. C'est luy seul qui leur fait recevoir avec ardeur les enseignemens qu'on leur donne: C'est luy seul qui leur imprime au fond du cœur l'estime & l'affection qu'ils ont pour leur Pere; c'est luy seul qui les fait resister si fortement, & si constamment aux Demons dont ie viens de parler,, qui en verité paroissoient insurmontables, en vn pays où il n'y a point de loix portées contre les Sorciers, ny contre l'yurongnerie, ny contre la polygamie, ny contre les inimitiez & les haines mortelles: Dieu est leur seule & vnique loy. Or iugez maintenant, dit le Pere, si on peut abandonner ces peuples, à moins que d'abandonner Iesus-Christ, qui prie fortement en leurs personnes, qu'on le tire du danger d'un precipice eternel. Peut-on laisser en proye aux Demons tant de personnes, & tant de nations, composées chacune de dix ou douze mille ames, sans en



112 *Relation de la Nouvelle France,*  
auoir compassion? Les quitter, c'est quitter Iesus-Christ : les abandonner, c'est abandonner celuy qui nous dit aussi bien qu'à son Pere : *Vt quid dereliquisti me?* Pourquoy m'abandonnez-vous? Ces conquestes sont dignes des Princes & des Roys Chrestiens : mais bien peu se rendent dignes de recueillir ces palmes. On se bat bien souuent pour des roseaux, & on mesprise les lauriers & les palmes.

---

## CHAPITRE IX.

### *De la Guerre des Hiroquois.*

**V**Ne lettre enuoyée des Trois Riuieres, nous fournira vn Journal, de ce qu'ont fait cette année les Hiroquois en ce nouueau monde. Les voyes de Dieu ne sont pas moins iustes, pour estre cachées. Il abbaisse souuent ceux qu'il veut exalter. Il enuoie vn homme chercher des Anesses pour luy faire trouuer vn Royaume. Il exerce vn berger à tourner vne fronde, pour luy donner la victoire d'vn Geant, les Hiroquois ont quasi iusques à present, fait plus de bien en la Nouvelle France,



France, qu'ils n'y ont fait de mal. Ils ont deliurés quantité d'ames des feux de l'Enfer, bruslans leurs corps d'un feu elementaire. Car il est vray qu'ils ont conuertis quantité de personnes, & qu'ils sont les instrumēs, dont Dieu s'est seruy pour tirer le doux de l'amer, la vie de la mort, la gloire de l'ignominie, vne eternité de plaisir d'un moment de souffrances, rudes à la verité; mais recompensées au centuple. Les Hurons estans dans l'abbondance, & les Algonquins dans la prosperité, se rioient de l'Euangile. Ils vouloient massacrer ceux qui la publioient en leur país; ils les accusoiēt d'estre des sorciers, qui leur faisoient perdre secretement la vie, qui gastoient leurs bleds, qui causoient les seicheresses, & les intemperies del'air, ils les tenoient pour des traitres qui auoient communication avec leurs ennemis pour vendre leur país. Chose estrange, mais à la verité tres-remarquable, & qui fait voir que Dieu sçait bien par où il faut prendre les hommes, pour les attirer à sa connoissance, & à son amour! Si tost que les Hiroquois (vaincus pour l'ordinaire par nos Sauvages, deuant qu'on leur portast les bonnes nouvelles de l'Euangile)



les eurent iettés dans le precipice où ils sont encor, ces pauvres gens se sont venus rendre entre nos bras, demandans l'abry & le couuert, à ceux qu'ils tenoient pour des traitres: recherchant l'amitié de ceux qu'ils auoient voulu massacrer, comme des Sorciers: pressans qu'on leur accordast, la vie de l'ame, puis qu'ils perdoient celle du corps: souhaitans l'entrée du Ciel, puis qu'on les chassoit de leurs terres. Et il me semble que ie peux dire, avec vne tres-grande apparence de la verité, que les Algonquins, & les Hurons, & quantité d'autres Nations, que nous auons instruites, estoient perduës, si elles n'eussent esté perduës; & que la plus part de ceux qui sont venus chercher le baptesme dans l'affliction, ne l'auroient iamais trouué dans la prosperité, & que ceux qui ont rencôtré le Paradis dās l'Enfer de leurs tourmens, auroient trouué le veritable Enfer, dans leur Paradis terrestre. Disons donc que les Hiroquois ont rendu des hommes riches pensans les rendre pauvres: qu'ils ont fait des saints, pensans faire des miserables: en vn mot, qu'on leur doit (sans toutefois qu'on leur en ait aucune obligation) la conuersion, & la san-



etification de plusieurs ames. Mais il faut que ie confesse, que s'ils ont fait du bien par cy-deuant, qu'ils paroissent maintenant à nos yeux comme des monstres, qui sont prests de nous engloutir. Qu'on perde les biens, qu'on perde la vie, qu'on soit tué, qu'on soit massacré, qu'on soit bruslé, rosty, grillé & mangé tout vif, patience: il n'importe, pourueu que l'Evangile ait son cours, & que Dieu soit connu, & les ames sauuées: on gagne plus en ce trafic qu'on n'y perd. Mais que la porte du salut soit fermée aux nations plus peuplées qui habitent les riuies de la mer douce des Hurons? Que les nouvelles Eglises de Iesus-Christ, fondées & establies par la pieté de la France, soient ruinées, & tant de nouveaux Chrestiens liurez à la gueule de ces Lions? Que les ouuriers Euangeliques, & les Pasteurs de ce bercail soient bannis & chassés d'aupres de leur troupeaux: C'est ce qu'on appelle vn grand malheur, auquel neantmoins les hautes puissances peuuent aisément remedier, nonobstant les desordres de la France, causez par des Hiroquois aussi barbares que ceux de l'Amerique: mais c'est trop s'écarter de mon but, entrons en discours.



116 *Relation de la Nouvelle France,*

Le sixiesme de Mars de l'année dernière 1652. les Hiroquois, qui ont rodé tout le Printemps & tout l'Este à l'entour des habitations Françoises, désirerent vne Escouade de Hurons qui les alloient chercher bien loing, & qui les trouuerent bien pres sans y penser. Ils estoient en embuscade à la riuere de la Magdelaine, six lieües ou enuiron au dessus des trois Riuieres: Cette Escouade commandée par vn nommé *Toratati*, tomba entre leurs mains, & fut entierement défaite.

Le 10. de May, le Pere Iacques Buteux (comme il a esté remarqué au premier Chap. de cette Relatoir) fut mis à mort avec vn François qui l'accompagnoit, nommé Fontarabie.

Le 13. du mesme mois, vne troupe d'Algonquins s'en allans au pays des Attikamegues, & passans par le lieu où le Pere Buteux auoit esté massacré, furent surpris, & défaits. Vn ieune homme ayant tué vn des Hiroquois qui les surprirent, fut au mesme lieu bruslé, & tourmenté d'vne façon horrible.

Le 16. du mesme mois, les Algonquins des trois Riuieres ayans appris la défaite de leurs gens, s'en allerent attendre les



Hiroquois au passage : mais ils tombèrent dans les pieges qu'ils vouloient tendre à leurs ennemis, vne autre banded'Hiroquois cachée dans le Lac de S. Pierre, où ils alloient dresser leur embusche, les tailla en piece pour la pluspart.

Le mesme iour arriua à Montreal vn soldat Huron, de la compagnie de Toratari, qui s'estoit sauué des mains des Hiroquois ; il rapporta que ce Capitaine auoit esté bruslé, & qu'on auoit donné la vie à ceux qui restoient de sa bande. C'est ainsi que les Hiroquois grossissent leurs troupes.

Le 15. du mesme mois, vne femme Huronne trauaillant à Montreal à cultiuer du bled d'Inde, fut enleuée par les Hiroquois, avec deux de ses enfans. Ces misérables se cachent dans les bois, derriere des souches, dans des trous qu'ils font en terre, où ils passent les deux & trois iours quelquefois sans manger, pour attendre, & pour surprendre leur proye.

Le 21. vn soldat François & vn Sauvage trauersans le grand Fleuve dans vn Canon, deuant le Fort des trois Riuieres, furent attaquez, & tous deux blesez ; le Sauvage mourut deux iours apres de ses blessures.



Le 26. du mesme mois de May, vn François qui gardoit du bestial à Montreal, fut mis à mort, & vne femme Françoisse fut blessée de cinq ou six coups bien fauorables, puis qu'elle n'en mourut pas, son courage la tira du danger. Ces Lutins sont par tout, & en tout temps.

Le 8. de Iuin, deux Hurons tendans vne ligne pour prendre du poisson, proche des Isles du fleuue appelé les trois Riuieres, furent massacrez. Comme ce lieu est tout proche des habitations Françaises, on accourut au bruit, on poursuivit les Hiroquois, qui se sauuerent, abandonnans leur bagage, & les cheueleures de deux hommes qu'ils auoient tuez.

Le 19. du mesme mois, trois Canots arriuerent par le fleuue des trois Riuieres, portās nouuelle que les Hiroquois estoient entrez bien auant dans le pays des Attikamegues, & qu'ils les auoient défaits pour la troisieme fois.

Le 2. de Iuillet, à cinq heures du matin, quelques Hurons s'en allans à la pèche vis-a-vis du Fort des François, à l'autre bord du grand fleuue, qui est assez large en cet endroit, les Hiroquois qui estoient en embuscade, leur courent sus : mais ils



se ietterent dans la chaloupe des François, qui les estoient venus escorter. Les Hiroquois montent dās leurs Canots, ils font feu de tous costez, poursuiuant cette chaloupe; qui mettant la voile au vent, se tira de ce danger. Estant abordée proche du Fort des François, quelques soldats s'embarquent, les Sauvages les suivent dans leurs Canots, ils donnent la chasse aux Hiroquois, les pressent de fort pres: mais comme ils sont adroits, ils firent alte, se mettant à l'abry de nos armes à feu; & voyans que la peau de Lyon ne les pouuoit pas couvrir, ils se voulurent servir de la peau du Renard. Ils enuoyent vn Canot vers nos gens, poussé par deux hommes, qui demandent à parlementer. On leur enuoye vn Canot de nostre costé, conduit par deux Hurons, & vn Algonquin: ces deux Canots se parlerent enuiron demie heure, éloignez l'vn de l'autre de la portée d'vn pistolet. Les Hiroquois dirent qu'ils estoient conduits par vn nommé *Aontarisati*, leur Capitaine, & qu'il vouloit parler aux François & aux Sauvages leurs alliez. On leur fit responce qu'ils descendissent vis-à-vis le Fort des François, & que là on leur parleroit: Ils s'y



120 *Relation de la Nouvelle France,*  
transporterent en vn moment, & de là ils  
enuoyerent deux Canots au quartier des  
François : l'vn portoit vn ieune Huron  
qu'ils auoient pris, & qu'ils mirent à terre  
en vn lieu vn peu au dessus du Fort, pour  
aller voir ses parens qui estoient parmy les  
François, c'estoit pour les solliciter à qui-  
ter leur party. L'autre Canot n'approcha  
pas de la terre, il s'escria de dessus l'eau, &  
demanda que les trois Capitaines, des  
François, des Algonquins, & des Hurons  
passassent la riuere, pour aller traiter  
auec leurs gens, & qu'ils enuoyeroient  
de leur costé les trois hommes les plus  
considerables d'entr'eux. On se mocqua  
de cette proposition, & cependant quel-  
ques Canots s'approchans pour desbau-  
cher nos Hurons, & les tirer à leur party,  
on en prit vn qui portoit trois Hiroquois,  
dont les deux estoient Capitaines fort si-  
gnalez pour leurs meurtres, en toutes les  
habitations Françoises. Ils furent plus  
heureux que les autres: car nos Peres les  
instruisirent, & les baptiserent deuant  
leur mort.

Le 25. du mesme mois de Iuillet, vne  
Escoüade composée de plus de cent Sau-  
uages, se doutans bien que les ennemis



estoyent respandus en diuers endroits, partirent pour en decouurir quelques-uns, ils firent deux rencontres, se battirent fort & ferme, sans que nous sachions avec quel succez du costé des Hiroquois; pour nos gens, ils retournerent le septiesme d'Aoust, ayant perdu deux hommes, & rapportans force blesez.

Le 18. d'Aoust, quatre habitans des trois Riuieres descendans vn peu au dessous de la demeure des François, furent poursuiuis des Hiroquois, qui en tuerent deux, a ce qu'on dit, & emmenerent les deux autres pour les sacrifier à leur rage.

Le 19. l'eschec fut bien plus grãd. Monsieur du Plessis Kerbodot, Gouverneur des trois Riuieres, prenant avec soy quarante ou cinquante François, & dix ou douze Sauvages, les fit embarquer dans des chaloupes, pour donner la chasse à l'ennemy, & recouurer, si on pouuoit, les prisonniers, & le bestial des François, que l'on croyoit enleué. Ayant vogué environ deux lieües au dessus du Fort, il aperceut les ennemis dans des brossailles, sur le bord des bois: il met pied à terre dans vn lieu plein de vases, & fort desavantageux. Quelqu'un luy représente l'a-



122 *Relation de la Nouvelle France,*  
uantage de l'ennemy, qui auoit la forest  
pour retraite; il passe outre, marche teste  
baissée: mais son courage luy fit perdre la  
vie, & à quinze François. Pendant ce cō-  
bat, quelques Hiroquois destachez de  
leur gros, casserēt la teste à vn pauvre Hu-  
ron & à sa femme qui trauailloient en leur  
champ, non loing des habitations Fran-  
çoises. Dieu qui balance les victoires, &  
qui leur donne des limites, monstra dans  
ce defastre qu'il nous vouloit conseruer:  
car si les Hiroquois se fussent seruis de  
leur auantage, comme la terreur s'estoit  
iettée parmy nos gens qui auoient perdu  
leur Chef, ils auroient bien esbranlez les  
habitans des trois Riuieres: mais ils se  
retirerent comme des gens qui ne sça-  
uoient pas iouyr de leur victoire, & lais-  
serent les François acheuer leurs moissons,  
& faire leur recolte en paix, mais non pas  
sans douleur.

Le 23. du mesme mois d'Aoust, on alla  
visiter le lieu du combat, l'on trouua ces  
paroles escrites sur vn bouclier d'Hiro-  
quois: *Normanville, Francheuille, Poisson,*  
*la Palme, Turgot, Chaillou, S. Germain, On-*  
*nejochronnons & Agnechronons. Je n'ay en-*  
*core perdu qu'un ongle.* Normanville ieu-



ne homme, adroit & vaillant, qui entendoit la langue Algonquine & l'Hiroquoise, auoit escrit ces paroles avec vn charbon, voulant donner à entendre que les sept personnes dont on voyoit les noms, estoient prises des Hiroquois, appelez, *Onnejochronnons* & *Agneehronnons*, & que l'on ne luy auoit fait encor autre mal que de luy arracher vn ongle. Je crains fort que ces pauures victimes ne soient immolées à la rage, & à la fureur de ces Barbares. Vne Dame honorée pour sa vertu, a escrit à quelque personne en France, qui auoit connoissance du sieur de Normanville, qu'il sembloit auoir eu quelque presentiment de sa prise. Il est probable (disoit-il à cette Dame vn peu deuant que de tomber entre les mains de ces Barbares) qu'estant tous les iours dans les occasions, ie pourray estre pris des Hiroquois : mais j'espere que Dieu me fera la grace de souffrir constamment leurs feux, & que j'auray le bonheur de baptiser quelques enfans moribons, & mesme quelques malades adultes, que j'instruiray dans leur pays deuant ma mort.

Le 30. du mesme mois d'Aoust, les Hiroquois prirent encore vn ieune Huron,



124 *Relation de la Nouvelle France,*  
& l'emmenèrent tout vif en leur pays.

Vne lettre dattée du premier de No-  
uembre, parle en ces termes. Quelques  
Hurons nous viennent d'apprendre, que  
deux François ont esté récemment tuez aux  
Trois Riuieres, & que deux autres ont eu  
les bras cassez. Ils adjoustent qu'en passant  
la nuit vers la Roche bruslée, ils ont ouy  
chanter les Hiroquois, cōme ils ont cou-  
stume de chanter quand ils tourmentent  
leurs prisonniers.

Vn Algonquin vient d'arriuer à Sillery,  
qui dit que ces mesmes Barbares se saisi-  
rent hier, vis-à-vis de sainte Croix, d'un  
Sauuage & de deux femmes de sa nation.  
Quantité de nos Neophytes sont allez à  
la chasse en ce quartier-là, ie crains fort  
qu'ils ne donnēt dans les pāneaux de ces  
chasseurs d'hommes. Noël Tekoüerimat  
s'en va promptement armer la ieunesse,  
qui est icy en assez bon nombre, pour ob-  
uier à ce malheur : mais il souhaiteroit  
bien que Monsieur nostre Gouverneur  
luy donnast vne escorte François. Voila  
ce que porte cette lettre.

Pour comble de toutes nos calamitez,  
on nous assure que les Hiroquois veulēt  
rassembler toutes leurs forces, pour nous



venir perdre l'Hyuer prochain, c'est le rapport qu'en ont fait les fugitifs, & la raison qu'ils en donnent, est fort probable. Ils disent donc que les Hiroquois d'enbas, nommés, *Agneehronnons*, demanderent l'an passé, du secours aux Hiroquois des pays plus hautes, nommés les *Sontouaheronnons*, pour venir combattre les François : mais que les *Sontouaheronnons*, repondirent qu'ils auoient des ennemis voyfins sur les bras, & que s'ils les vouloient venir aider à les destruire, qu'ils se ioindroient à eux par apres, pour perdre les François. Les Hiroquois *Agneehronnons*, ont accepté la condition, ils ont enuoie leurs troupes avec celles des *Sontouaheronnons*, qui, avec ce secours, ont detruit la nation Neutre, qui leur estoit voisine. Si bien qu'ils sont obligés de se joindre avec les Hiroquois nommés *Agneehronnons*, pour venir combattre les François, voila ce que portent les memoires qui ont seruy de matereaux, pour bastir ce Chapitre.

Le Demon sçait bien prendre son temps. Voyant que l'ancienne France est dechirée par ses propres enfans, il veut destruire la nou uelle, pour retablir son Do-



126 *Relation de la Nouvelle France,*  
maine & son Royaume, qu'il va perdant  
tous les iours, par la conuersion de ces  
pauures Americains septentrionaux, dont  
desia quelques Milliers sont entrez au  
Ciel, par la porte de la foy, du Baptesme,  
& d'une sainte vie. Ceux qui restent &  
qui forment vne Eglise fort innocente,  
s'ecrient, secourés nous vous autres, qui  
dites, que vous estes nos freres: ne laissez  
pas estouffer par les Hiroquois le germe  
de vostre creance, & la graine de la foy, &  
la semence de l'Euangile, que nous auons  
receuë par vostre entremise. Si vous ay-  
mez Iesus Christ deffendez ceux qui l'ay-  
ment, & qui sont baptisez en son nom.

Il y a quelque temps qu'on demandoit  
des soldats; & leur solde: ou leur appoin-  
temens, on demandoit leurs viures, &  
leurs armes, & leur passage, à present  
que le pays donne des bleds: pour nour-  
rir ses habitans, & qu'il se fait tous les  
iours, on ne demande plus pour le sou-  
tient de ces grandes contrées, que le  
payement du passage de deux ou trois  
cens hommes de trauail, chaque année:  
les habitans du pays, les nourriront, &  
payeront leurs gages. La France, qui se  
descharge incessamment dans les pays



estrangeurs , ne manque pas d'hommes pour dresser des Colonies , Dieu vueille qu'elle ait assez de charité , pour les faire passer en vn lieu , où ils viuiroient plus saintement , & plus à leur aise , & où ils seroient , la deffence , & le secours , de Iesus-Christ , qui honore tant les hommes , qu'il les veut sauuer par le secours des hommes. C'est assés , finissons ce Chapitre par vne lettre , qu'un Capitaine Sauvage , & bon Chrestien , à enuoyée au Pere Paul le Jeune , qui traueille en l'ancienne France pour le salut de la nouuelle.

Pere le Jeune il me semble que ie te voy quand on me lit ta lettre , & il me semble que ie suis avec toy , quand ie te parle , par la bouche , ou par la plume du Pere de Quen. Je ne mens point , il me semble que c'est aujourdhuy que tu m'as baptisé , ie vicilly , mais la foy me vieillit point en moy. J'ayme autant la priere au bout de quinze ans , que le premier iour , que tu m'as instruit. Nous Changeons en tout , nous autres gens de ce pays cy , mais ie t'assure , que ie ne changeray iamais , en ce que tu m'as enseigné , & en ce que nous enseigne celuy qui nous gouuerne en ta place. Voire mesme ie ne change quasi



128 *Relation de la Nouvelle France,*  
plus de lieu, ie passeray l'Hyuer prochain à  
*Ka-Miskouaouangachii*, que vous nōmez S.  
Ioseph, comme j'y ay passé le precedent.  
Je suis quasi tout François. J'ay ris quand  
le Pere de Quen m'a dit que tu auois mon-  
stré la robe que ie t'enuoyay l'Automne  
passé, à des Dames d'importance de vo-  
stre pays, & qu'elle leur auoit agréé: Ce  
n'est pas qu'elle soit belle, c'est qu'elles  
aiment, & qu'elles voyent volontiers ce  
qui vient de nous autres. I'eusse volon-  
tiers veu la robe que tu m'enuoyes; on dir  
qu'il y a de l'or dessus. N'as-tu point eu  
cette pensée, Noël deuiendra orgueilleux  
quand il s'en seruira. Ne laisse pas de l'en-  
uoyer le Printemps prochain, si ie meurs  
cet Hyuer, mon fils, quand il sera plus  
grand, la portera, & il logera dans la mai-  
son qu'on a fait pour nous au Fort de Sil-  
lery: haste-toy de venir, & de nous ame-  
ner quantité de porteurs d'espées, pour  
esloigner de nos testes les Hiroquois.  
Nous serons bien tost des ames de tref-  
passez: n'attends pas que nous soyons au  
tombeau pour nous venir voir, c'est ton  
bon amy Noël Tekouerimat qui t'escriit,  
& qui te dit, qu'il priera toujours Dieu  
pour toy, & pour ceux qui nous assistent.

Parle



Parle au grand Capitaine de la France, & luy dis que les Hollandois de ces costes nous font mourir, fournissans des armes à feu, & en abondance, & à bon prix, aux Hiroquois nos ennemis. Dis-luy qu'il donne secours à ceux qui croient à celuy qui a tout fait, & qui sont baptisez. C'est la fin de mon discours.

## CHAPITRE X.

*De la vie & de la mort de la Mere Marie de S. Ioseph, decedée au Seminaire des Vrsulines de Kebec.*

**L**A Mere Marie de l'Incarnation, Supérieure du Seminaire des Vrsulines de Kebec, en la nouvelle France, voulant consoler ses Sœurs sur la mort de la Mere Marie de saint Ioseph, leur a enuoyé un abrégé de sa vie, de sa mort, & de ses vertus. Ces Memoires estans tombez entre mes mains, j'ay creu que ce seroit faire tort au public de renfermer ce thresor dans les seules Maisons des Vrsulines. J'en ay donc tiré la pluspart des choses que ie vay déduire dans ce Chapitre.



*De son Enfance.*

**L**A Mere Marie de saint Ioseph naquit en Anjou le septiesme de Septembre de l'année 1616. Elle estoit fille de Monsieur & de Madame de la Troche de saint Germain, ses pere & mere; personnes de vertu, de merite, & de condition. Le Saint Esprit la preuint dès sa plus tendre enfance, de mille graces, & de mille benedictions, qu'elle attribuoit toutes à la sainte Vierge, disant que Madame sa mere l'auoit dediée & consacrée à cette Reyne des Vierges dès le moment de sa naissance, & que c'estoit pour ce sujet qu'elle luy fit donner le beau nom de Marie, qui luy estoit bien si agreable, que iamais elle ne s'est ouïe appeller de ce nom, qu'elle n'en ait ressenty de la douceur. Cette Vierge Reyne, & Mere des Vierges, respendit dans le cœur de cette petite l'amour de la pureté & de la Religion, deuant qu'elle sceust que c'estoit que pureté & que Religion, si ce n'est quel'on die, ce que quelques personnes ont remarqué, que l'usage de raison luy auoit esté notablement auancé.



Messieurs ses parens se pourmenans certain iour dans l'allée d'un bois de l'une de leurs maisons, enuoyerent querir leur petite Marie, qui n'auoit pour lors que quatre ans: Le valet de chambre ou le laquais qui la portoit entre ses bras, luy fit en chemin quelques caresses messeantes, la pauvre enfant se mit à pleurer, & à se débattre d'une façon si estrange, que cet homme estonné eut bien de la peine de forger un mensonge pour cacher le sujet de ses pleurs. Or ie dirois volontiers que c'est là le plus grand peché qu'elle ait iamais commis contre la pureté. M'ayant rendu en la nouvelle France un compte fort exact de toutes les actions de sa vie, ie puis dire (pour rendre hōneur & gloire à la source de toutes les bontez) que ie ne me souuiens pas d'auoir remarqué aucune faute qui approchast de loing d'un peché grief. Me parlant puis apres des caresses de cet homme, qui passerent en un moment, elle pleuroit encore à chaudes larmes, non pas qu'elle creust y auoir commis aucune offense, mais par une sainte ialousie pour la pureté, se plaignant avec douleur, de ce qu'estant si particulièrement dediée & attachée à la sainte Vier-



ge, elle eut fait ce miserable rencontre, injurieux à sa pureté.

Elle fuyoit l'abord des hommes dès ce petit aage, non par grande conduite de la raison, mais par l'instinct d'un Esprit supérieur, qui luy faisoit parler d'estre Religieuse, sans les connoistre que de nom. Monsieur son pere la voyant d'une humeur gentille, prenoit plaisir de la contrarier dans cette inclination, il luy disoit souvent qu'il la vouloit marier à un petit Gentilhomme qui estoit de son aage, & souvent luy faisoit de petits presens, qu'il disoit luy estre enuoyez de sa part. La pauvre enfant se demenoit, & s'affligeoit si fort, prenant cette raillerie pour une verité, que Madame sa mere s'appercevant que la tristesse commençoit à la desseccher, pria Monsieur son mary de se priver de cette recreation. Arriua certain iour qu'un homme de condition la voulant agacer, la baisa par surprise; elle, en se retournant, luy donna un soufflet si serré qu'il le sentit bien, quoy qu'il ne fust porté que de la main d'un enfant.

Ayant remarqué que Madame sa mere donnoit l'aumosne aux pauvres, & qu'elle parloit d'eux avec compassion: sou-



uent elle se déroboit d'aupres d'elle pour leur porter son déjeufner, & sa collation, & mesme ce qu'elle pouuoit trouuer en la cuisine. Sa bonne mere s'en estant aperceüe, non seulement ne l'improuua point, au contraire elle l'embrassa, la caressa, & luy donna toute permission de donner l'aumosne, & de visiter les pauvres qu'elle nourrissoit, la menant avec elle pour la resiouyr quand elle alloit distribuer ses charitez. *Bona arbor, bonos fructus facit.* D'un bon arbre il vient de bons fruiçts.

Elle auoit vne auersion naturelle aux bijoux, aux affiquets, & à ces petits menus fatras, qui font bien souuent les plus belles occupations des filles qui aiment le monde. Elle portoit enuie à la condition d'une petite bergere qu'elle voyoit en certain endroit, pource qu'elle estoit deliurée du soin de porter des gands, d'ajuster vn masque, de conseruer de petits ornemens qu'on luy donnoit, & de se composer à la mode. Messieurs ses parens qui la voyoient gentille, & d'un naturel si aimable, & d'ailleurs si esloignée des façons de faire des personnes de sa condition, qu'on éluc pour le monde; la voulurent



134 *Relation de la Nouvelle France,*  
mettre dans les dispositions de se consacrer entièrement à Dieu, s'il daignoit l'appeller à son service. Madame sa mere la conduisit elle-mesme à Tours, en l'age de huit à neuf ans, & la confia aux bonnes Meres Ursulines, à qui Nostre Seigneur a donné beaucoup de graces pour élever la ieunesse en sa crainte & en son amour.

Cette ieune Damoiselle raut bien tost les cœurs de toutes ses compagnes; elle prit sur elles vn empire par ses deferen-ces, par les ciuilitéz, & par les petits ser- uices qu'elle leur rendoit, si bien qu'elles la regardoient cōme leur petite maistresse; & iamais ne furent ialouses de la voir aimée par dessus les autres, iusques-là, que les Religieuses se seruoient d'elle pour l'instruction des autres. Et encore qu'elle fust fort guaye, & qu'elle aimast ses petits diuertissemens, c'estoit toujours sans prejudice de ses deuotions, s'appliquant avec vn grand plaisir à la lecture de la vie des Saints, notamment de ceux qui auoient trauaillé à la conuersion des ames. De là vient qu'elle aimoit, & qu'elle honoroit vniquement l'Apostre des Indes, S. François Xavier, faisant de sa vie ses innocen-



res delices , en sorte qu'elle se déroboit souuent de ses compagnes , & se priuoit de ses recreations, pour trouuer le temps de la lire.

Ie ne sçay si la delicatesse de son naturel , ou la contention qu'elle apportoit pour acquerir la vertu , la firent tomber malade: quoy qu'il en soit , les Medecins iugerent qu'il la falloit remettre en son air natal: elle ne fut pas long-temps chez ses parens, qu'elle ne retournaist à sa premiere santé. Elle ne quitta point ses deuotions, pour estre esloignée de la maison, & de la conduite des Meres Vrsulines. Elle se confessoit, & se communioit fort souuent; elle donnoit quelque temps à l'oraison mentale; elle parloit de Dieu, & portoit les domestiques à la pratique des vertus, avec vn raisonnement si solide, que Monsieur & Mada. de la Troche ne pouuoient conceuoir qu'une fille de son aage pût monter si haut, à moins que d'estre douée d'une grace fort extraordinaire.

Comme elle se sentit entierement guerrie, elle demanda permission de retourner en son petit Paradis: Elle l'obtint, mais non sans peine: car le nouveau



commerce, & les nouveaux entretiens qu'elle auoit eüe-auec ses parens, les auoit si estroitement liez de part & d'autre, que quand il fut question de se separer, ie ne scay qui souffrit-dauantage, des parens ou de l'enfant. Elle a dit depuis, que l'amour qu'ils luy portoient, que la confiance que luy tesmoignoit sa bonne mere par dessus ses freres & ses sœurs, l'auoient si doucement charmée, que la violence qu'elle se fit pour les quitter la pensa faire tomber, & pasmer de douleur. D'autre costé, Messieurs ses parens iamais ne luy peurent dire Adieu; & Madame sa mere craignant d'exceder dans les tendresses qu'elle auoit pour sa fille, ne la pût reconduire, elle pria vne sienne parente de luy rendre cet office d'amour & de charité.

Nostre ieune Damoiselle ayant rompu ses Liens, & ses chaines; par vn desir d'estre toute à Dieu, ne fut pas si tost éloignée de la maison de son Pere, que la ioy s'empara de son cœur. Vous eussies dit que l'Esprit de Dieu la faisoit voler, & qu'il la faisoit iouir du triomphe apres cette noble victoire. A mesme temps qu'elle est rendue à la maison des Ursulines, elle



entre dans vn nouveau Combat. Elle prie, elle coniure les Meres de la receuoir en leur Nouitiat, pour estre Religieuse. On luy dit qu'elle n'a pas l'age, qu'elle n'a que treize ans ou enuiron, & qu'il en faut quatorze, ce rebut, & ses ferueurs, la faisoient deseicher, elle prenoit garde par où la Superieure, & les Religieuses deuoient passer, elle les attendoit, & les supplioit les deux genoux en terre d'auoir pitié d'elle. On luy repart, qu'elle n'a point de santé, & qu'il faut plustost parler de la renuoyer chés Messieurs ses parens, que de l'admettre au Nouitiat. La pauvre enfant soupiroit, & protestoit que le Nouitiat seroit sa guerison. La Mere de saint Bernard qui l'aymoit vniquement, iugea qu'il luy falloit donner ce contentement, avec obligation neanmoins de sortir si Messieurs ses parens la vouloient retirer: elle s'acorde à ce qu'on luy demande, pour iouir de ce qu'elle demandoit, & Dieu luy fit la grace de trouuer sa santé dans ce lieu de benediction. La crainte apres tout qu'elle eut d'en sortir, luy fit mettre aussi-tost des messagers, & des lettres en campagne, pour obtenir de Monsieur son pere, & de Madame, sa me-



138 *Relation de la Nouvelle France,*  
re , la grace d'estre Religieuse Vrsuline,  
sans toutefois leur dire qu'elle eut desia  
fait le premier pas. Voicy comme cette  
faueur luy fut accordée.

*De son Nouiriat & de sa Profession.*

**M**onsieur & Madame de la Troche  
voyans que leur fille entroit sur sa  
quatorziesme année, & qu'elles les pres-  
soit fortement de luy accorder l'entrée en  
Religion, ils se transporterent à Tours , à  
dessein de la bien esprouuer : car quoy  
qu'ils l'eussent offert à Dieu dès son ber-  
ceau, en cas qu'il luy pleut l'aggrer pour  
sa maison , si est-ce neantmoins que l'a-  
mour qu'ils luy portoient, leur fit prendre  
resolution de ne la point quitter , qu'à  
bonnes enseignes , & qu'il ne fussent en-  
tierement conuaincus , de la solidité de  
son appel. Si tost qu'ils sont arriués, ils la  
retirent du Monastere , & la tenans au-  
pres d'eux , ils dressent deux bateries, ca-  
pables de renuerser toute autre vocation  
moins forte que la sienne. L'auouë qu'il est  
bon que les parens sondent les volontés  
de leurs enfans : car il ne faut pas croire à  
toutes sortes d'esprits : mais aussi faut-il



confesser que Dieu ne crie pas tousiours si haut, & qu'il ne se fait pas si fortement entendre, qu'on ne puisse diuertir l'oreille d'un enfant, & le retirer du lieu, où Nostre Seigneur luy destinoit les graces de son salut. Monsieur de la Troche qui connoissoit la trêpe de l'esprit de sa fille, qui en verité ne tenoit riën de la fille, l'attaque par un fort raisonnement, luy faisant voir les moyens de se sauuer, sans se donner tant de peine, luy representât les dangers d'un long repêtir, quand on se voit liée & garrottée par une lōgue chaine de souffrāces, que la vie religieuse traïsne après soy. Madame sa mere la baisoit, la caressoit, luy offroit tout ce qui peut gagner le cœur d'une ieune Damoiselle de sa cōdition. Toutes ces offres ne la touchoient point; mais l'amour qu'elle sentoit pour une mere si aimable, luy dechiroit les entrailles, quand elle pensoit à la separation.

Mais comme elle estoit d'un naturel fort genereux, elle resista fortement aux tendresses de la nature, & Nostre Seigneur luy mit pour lors en bouche, de si beaux passages de l'Escriture, & de si belles pensées des sains peres, touchant le bonheur de la vie Religieuse, elle les deduisoit



avec vne telle fluidité & avec vne telle eloquence , que ses parens , & plusieurs personnes de condition, qui l'ecoutoient; demeurans surpris , conclurent qu'il ne falloit pas resister dauantage à l'esprit, qui rend diserte la langue des enfans.

On la fit donc rentrer au Conuent des Meres Vrsulines, où le Demon qui preuoit la sainteté de ce braue sujet , luy liura vne furieuse attaque. Il luy étalle dans vn beau iour , toutes les raisons que Monsieur son pere luy auoit apportées pour la diuertir de son dessein: Il efface de sa memoire toutes les reparties , que Dieu luy auoit suggerez. Il reueille toutes les tendresses qu'elle auoit pour vne mere , qui iamais ne se l'assoit de la voir , & de l'aimer , la secousse fut si grande , & les tenebres si epaisses , que sentant ses forces ebranlées, elle se ietta comme à corps perdu , entre les bras de la sainte Vierge, faisant toutes les deuotions qui luy venoient en l'esprit, pour gagner son cœur, & pour obtenir par son entremise, la deliurance de cette tentation. La pensée de quitter sa mere pour vn iamais l'espouuantoit; mais enfin le desir d'estre à Dieu, & de suiure les maximes de l'Euangile,



luy firent prendre resolution , en la presence de la sainte Vierge , de boire l'amertume du calice de son fils , & de perseverer constamment dans sa maison , quand tous ces tourmens , la deuroient accompagner iusques à la mort.

Le iour qu'elle prit le saint habit de la Religion, luy fut encore vn iour de combat. On a coustume d'habiller les filles en ce dernier iour de leur siecle, conformément à l'estat qu'elles auroient tenu dans le monde. Nostre Nouice parut si ajustée, si modeste aux yeux de Madame sa mere, que s'approchant d'elle pour luy donner le dernier Adieu, elle la saisit, l'embrassa, & la tint si long-temps colée sur son sein, que Monsieur de la Troche la voyant sans parole, & comme pasmée, luy arracha d'entre les bras, pour la conduire à la porte du Monastere d'où elle estoit sortie. Cette separation tira quelques larmes des yeux de la fille, & laissa la mere dans vne profonde douleur. Si tost qu'elle fut entrée, on luy oste ses habits de parade, & on luy donne avec les ceremonies ordinaires, celuy qu'elle auoit tant desiré. On luy fit aussi porter le nom de saint Bernard : nous dirons cy-apres comme



142 *Relation de la Nouvelle France,*  
elle prit celuy de saint Ioseph.

Nostre Seigneur la reuestit interieurement de l'onction & de la grace, signifiée par son voile, & par les autres appartenances de son habit. Vous eussiez dit qu'elle commençoit par où plusieurs acheuent. L'estois rauie d'estonnement, dit la Mere de l'Incarnation, de voir en vne fille de quatorze ans, non seulement la maturité de celles qui en ont plus de vingt-cinq, mais encore la vertu d'une Religieuse desia bien auancée. Rien de puerile ne paroissoit en sa ieunesse, elle gardoit ses Regles dans vne si grande exactitude, qu'on eut dit qu'elle estoit née pour ces actions. Et le haut sacrifice de l'entendement & de la volonté, qui fait suer tant de personnes, luy estoit comme naturel. En vn mot, son esprit toujours esgalement ioyeux, la rendoit tres-aimable, & tres-agreable à toute la Communauté, & elle veilloit si soigneusement sur soy-mesme, qu'il ne falloit pas luy donner deux fois des aduis sur vne mesme chose, voire-mesme elle se tenoit pour auisée, & pour reprise des fautes qu'elle voyoit corriger en ses compagnes. Je ne diray rien de ses deuotions, notamment



de l'amour qu'elle auoit pour la sainte Vierge, nous en parlerons en son lieu, il suffit de rendre ce tesmoignage tres-authentique, & tres-veritable, que depuis son entrée au Nouitiat iusques à sa mort, elle s'est toujours efforcée de respondre fidelement à la grace de sa vocation.

Les deux ans de son Nouitiat saintemēt escoulez, Messieurs ses parens luy vindrent liurer la derniere bataille: Mada. sa mere déplie le reste de sa rhetorique, elle met au iour toutes ses affections, tout son amour, & toutes ses tendresses, assurant sa chere fille qu'elle la receura à bras ouverts, si la vie d'une Religion assez penible luy est tant soit peu desagreable: elle proteste qu'elle ne peut, sans violence, se separer d'elle. Monsieur son pere luy presente, qu'il n'y a encore rien de fait, qu'elle est encore dans la plaine possession de sa liberté, qu'il ne faut que trois paroles pour l'enchaîner, en sorte qu'il n'y aura plus de remede à son repentir. Leur dessein n'estoit pas de resister à Dieu: mais de faire la guerre à vne vocation fondée sur le sable mouuant.

La liaison des cœurs ne se rompt bien souuent qu'avec violence. Qui dit mere,



144 *Relation de la Nouvelle France,*

dit vne amante; & qui parle d'un enfant bien né, parle d'un cœur plein d'amour, & de respect. Nostre Nouice ne pouuoit quitter Dieu, ny ses parens: Elle eust désiré, ou que sa mere se fust faite Religieuse avec elle, ou que ses parens eussent conuertý leur maison en vn Monastere de son Ordre: car parler de separation, c'estoit parler de mort; elle eust mieux aimé mourir mille fois que de quitter le manche de la charruë, pour retourner en arriere: Et la pauvre nature souffroit en elle des conuulsions & des angoisses estranges à la pensèe qu'elle s'alloit priuer pour le reste de ses iours, de l'aimable conuersation de sa bonne mere.

Celuy qui tient de ses doigts toute la nature suspenduë, qui scait le nombre des estoilles, qui donne du poids aux vents, & des limites aux flots & aux tempestes de la mer, la guerit de cette tentation en vn moment. Il luy fit voir dans son sommeil, vne eschelle semblable à celle de Iacob: D'un bout elle touchoit les cieux, & de l'autre elle estoit appuyée sur la terre. Quantité de personnes montoient par cette eschelle, aidez de leurs bons Anges, qui essuyoient doucement la sueur  
que



que le trauail & l'effort leur tiroit du front & de tout le visage. Elle en voyoit plusieurs qui tomboient à la renuerse dès le premier pas, ou dès le premier degré de l'eschelle : Les autres culbutoient du milieu, & vn petit nombre surmontant les difficultez d'un chemin si droit & si roide, arriuoient enfin au sommet, & remportoient la victoire. L'effet de cette veüe fit voir que ce n'estoit pas vn simple songe forgé dans la boutique de son imagination : mais vn remede à son mal, appliqué par les mains de son bon Ange. Il ne fallut point chercher d'Oedipe pour l'explication de cet enigme, l'Esprit de Dieu en fut l'interprete ; il cassa le noyau, & luy en fit gouster l'amande. Cet amour de l'enfant d'Adam, qui la tenoit attachée par des yeux, & par vn cœur de chair, se changea en vn instant en vn amour, qui ne destruit point la nature, mais qui la sanctifie ; amour plus fort, mais plus libre ; amour qui regarde non le temps, mais l'eternité. Sa fidelité à resister à cet amour estouffant ; sa generosité à iamais ne le decouurir à ses parens, de peur qu'ils n'en prissent auantage, pour combattre sa vocation ; sa resolution à souffrir le reste



de ses iours la tyrannie de cet amour, plu-  
tost que de lascher le pied, & sortir de son  
poste, luy meriterent cet amour saint,  
cet amour dégagé, qui l'ayant deliurée de  
son esclavage, luy donna le moyen de  
presenter à Dieu, dans vne profonde paix,  
vn veritable sacrifice, ou plustost vn en-  
tier holocauste d'elle-mesme, s'unissant  
estroitement à luy, en se separant de tou-  
tes les creatures par les vœux de sa pro-  
fession, qu'elle fit à l'aage de seize ans. Et  
iamais depuis ce temps-là, l'amour de ses  
parens ne l'a embarrassée; & la crainte de  
s'en separer fut tellement bannie de son  
cœur, qu'elle s'en esloigna par apres de  
plus de mille lieües loing sans aucune  
peine.

Si tost que nostre ieune Professe fut en-  
rollée en la milice de Iesus-Christ, on  
luy mit les armes en la main pour com-  
battre ses ennemis, sçauoir est l'ignorance  
des petites filles qu'on luy donna à in-  
struire, & les mauuaises inclinations de  
leur nature. Cet exercice qui est bas dans  
les ames mercenaires, l'esleuoit à la digni-  
té des Anges gardiens. Son but estoit  
d'anter Iesus-Christ sur ces petits sauua-  
geons, de leur faire connoistre leurs pas-



sions, & leurs mauuaises pantes, & de leur suggerer les moyens de les combattre. Si elle les instruisoit dans la ciuilité, si elle leur enseignoit à lire ou à escrire, ou si elle leur faisoit apprendre quelque ouvrage, c'estoit toujours par rapport à leur salut, leur inculquant doucement comme elles deuoient sanctifier ces occupations, & en tirer vnaide pour se sauuer. En vn mot, sa fin n'a esté quasi toute sa vie, que de faire connoistre & aimer Dieu à ceux avec lesquels elle conuersoit.

Dans les occasions qui l'obligeoient de paroistre à la Grille, on remarquoit en son port & en son maintien (disent les Memoires que j'ay deuant les yeux) vne grauité & vne modestie toute extraordinaire: elle ne pouuoit souffrir d'autres entretiens que de la pieté, & si quelqu'un (par quelque épanchement trop libre) la vouloit ietter sur vn discours qui ressentist le monde, elle le ramenoit avec vne sainte industrie; ou s'il estoit retif, elle se retireroit de la Grille, ou bien elle se donnoit la liberté de luy parler selon ses sentimens, sans aucun respect humain, disant qu'il ne falloit pas estre moins libre, & moins forte pour soustenir le bien, que quel-



148 *Relation de la Nouvelle France,*

ques-vns l'estoient pour le destruire. De là vient qu'assez souuent elle demandoit à sa Superieure dispense de voir les personnes dont elle croyoit que la conuersation se passeroit sans fruit.

*Comme Dieu l'appella, & la fit passer en la nouvelle France.*

**L**A Mere de S. Ioseph auoit l'esprit vif, & net, & beaucoup éclairé. Sa conuersation estoit aymable, son industrie à gagner les cœurs de ceux qui tenoient le timon, estoit rauissante. Comme elle se vit dans la suite du temps, approuuée & soustenuë des premieres colonnes de sa maison, sa ieunesse qui auoit encore du feu dedans les veines, la porta à deux doigts d'un precipice, la mettant (dit mon papier) dans le danger de prendre un chemin, qui luy auroit esté fort dommageable, & qui sous ombre d'un bien apparent, l'alloit ietter dans vne vanité fort subtile. Estant donc sur le point de prendre cet effor, Nostre Seigneur luy fit voir ce que ie vay raconter. Elle se trouua dans le repos de la nuit, à l'entrée d'une grande place, enuironnée de boutiques



de tous costez: ces boutiques luy paroissent remplies de tous les objets, & de toutes les delices capables de toucher les yeux, de gagner les cœurs, & de charmer les esprits. Ces beautez mises en leur iour, brilloient avec vn merueilleux éclat: si bien que tous ceux qui entroient dans cette place, en estoient incontinct espris. Elle y vit entrer vn Religieux de sa connoissance, qui fut incontinct enchanté aussi bien que les autres. Ce qui l'espouuenta plus fortement dans ce danger, fut, qu'en ne pouvant retourner en arriere, elle se voyoit comme dans la containte de se ietter dans ce precipice. Mais au moment qu'elle se croyoit perdue, il parut vne troupe ou vne compagnie de ieunes gens, faits iustement comme les Sauvages de la nouvelle France, qu'elle n'auoit pas encore veus: L'vn d'eux portoit vn guidon escrit de certains mots d'vne langue estrangere. Elle bien estonnée, entendit vne voix qui prouenoit de ces gens oliuastres, & qui luy disoit: Ne craignez point, c'est par nous que vous serez sauuée; & là dessus, se mettans en haye de part & d'autre, la firent passer au milieu d'eux, & au trauers de cette place, sans qu'elle fust ar-



150 *Relation de la Nouvelle France,*  
restée, ny charmée par ses beautez ; en vn  
mot, ils la mirent en vn lieu d'assurance.  
Or il est aisé à voir par la suite de sa vie, &  
par ce qui arriua à ce miserable Religieux,  
qui auoit pour lors la reputation de bien  
viure, & qui se fit apostat quelque temps  
apres; que cette veüe n'estoit pas vne chi-  
mere, mais vne verité. Il est vray qu'elle  
n'en eut pas si tost la cōnoissance, & qu'elle  
ne prenoit pas ses Bienfauteurs pour  
des Sauvages: mais aussi faut-il confesser  
que l'affection qu'elle auoit toujours eue  
pour le salut des ames, s'eschauffa tous les  
iours de plus en plus dedans son cœur de-  
puis cette veüe, & que la lecture des Re-  
lations qu'on enuoyoit tous les ans de Ca-  
nada, luy donnoit des desirs tres-ardens  
d'entreprendre des choses qu'elle tenoit  
pour chimeriques, ne croyant pas que ia-  
mais il se deust presenter aucun iour de  
les effectuer. Elle en parloit souuent à la  
Mere Marie de l'Incarnation, qui brûloit  
d'vn mesme feu, qu'elles prenoient toutes  
deux pour vne folie, ne voyans pas de quel  
bois on le pourroit nourrir, & ne pouuans  
comprendre qu'on deust iamais enuoyer  
des personnes de leur sexe, & de leur con-  
dition, iusques au bout du monde.



Environ ce temps-là, Madame de la Pelterie ayant leu dans les mesmes Relations, que l'on souhaitoit en la nouvelle France que quelque Amazone entreprist vn voyage plus long que celuy d'Ænée, afin de pourvoir à l'instruction des petites filles Sauvages, prit resolution de fonder vn Seminaire en ce pays de Croix, & d'y conduire elle-mesme des Religieuses Vrsulines pour le gouverner. En suite de ce dessein, elle se transporta à Tours pour en obtenir quelques-vnes de Monseign. l'Archeuesque, & de la Mere François de S. Bernard, Superieure de leur Monastere. Monsieur l'Archeuesque approuua cette entreprise, contre l'attente de ceux qui scauoient combien il estoit naturellement aliené de choses si nouvelles, & qui estoient sans exemples. Il commande à la Superieure de donner à Madame de la Pelterie, la Mere Marie de l'Incarnation, qu'elle demandoit nommément, & de luy choisir vne compagne, par l'aduis de quelques personnes qu'il luy nommoit. Toute la Maison des Vrsulines estoit en feu- il n'y en auoit pas vne qui ne souhaitât cette seconde place, exceptée nostre ieune Professe. Vous eussiez dit que le Demon



luy auoit donné vn coup de massüe sur la teste : elle estoit plus froide que la glace, elle paroissoit stupide, & interdite; & ce grand amour qu'elle auoit pour vn bien, dont la conqueste luy auoit paru si aduantageuse, mais impossible, se changea en vne grande auersion, quand elle se vit dans le pouuoir d'y pretendre. Et quoy qu'elle honorast Madame de la Pelterie, comme vne sainte, elle la regardoit neantmoins, & celle qu'on luy auoit accordée, comme des personnes perduës. C'est chose estrange, que les affaires de Dieu sont toujours accompagnées d'horreurs & de croix ! Toutes ses lumieres estoient changées en des tenebres, ses affections en esloignemens, & son amour en haine. Il est vray que ce bruit & ce tintamarre n'étoit qu'en la cuisine, ou dans la basse-cour parmy les valets, ie veux dire au bas estage des passions : car elle auoit toujours vne secreete estime au plus profond de son cœur, & dans la plus haute portion de son esprit, pour vne vocation si releuée. C'est pourquoy s'estant ouuerte à sa chere compagne la Mere de l'Incarnation, ces fantômes s'éuanoüirent, le rideau fut tiré, & le iour luy parut plus beau que iamais.



Elle se va ietter aux pieds de sa Superieure, pour entrer en partage de ce bonheur: mais elle n'eut pour responce qu'un commandemēt de prendre la chambre & l'Office de celle qui deuoit partir, & de demeurer en repos. Ceux qui connoissoient ses talens, & qui auoient de l'amour pour ce grand ouurage, creurent qu'il n'en falloit pas demeurer là, ils sollicitent la Mere de l'Incarnation de la demander pour compagne: la Superieure luy fit la sourde-oreille. Là-dessus on se met en deuoir d'en choisir vne autre. On expose le saint Sacrement, on fait les Prieres de quarante heures, afin que Dieu presidast à cette election. Chose estrange! que dans vn si grand nombre, ceux de qui dépendoit cette election, ne pūrent rien conclure qu'en faueur de nostre Postulante; il y auoit dans toutes les autres ie ne sçay quoy, qui rompoit l'affaire. Elle s'en alla donc derechef trouuer la Mere Prieure; elle se iette par terre, & la conjure de luy estre fauorable en ce rencontre, si elle ne connoist que Dieu ne l'ait pas pour agreable. Sa Prieure demeura sans parole: L'amour luy donnoit de la crainte de perdre vne fille qu'elle auoit tendrement eleuée,



154 *Relation de la Nouvelle France,*  
qui luy auoit donné tant de satisfaction,  
& qui promettoit beaucoup pour sa mai-  
son, ces demandes reiterés, & la peur de  
resister à Dieu, & de ne luy pas accorder  
ce qu'il desiroit, luy firent passer toute la  
nuit sans dormir; & dans ce silence, No-  
stre Seigneur l'occuppa si fortement, &  
luy donna tant de connoissance sur la vo-  
cation de sa chere fille, qu'elle se rendit,  
pourueu neanmoins, que Messieurs ses  
parens y consentissent.

Aussi tost on leur enuoie vn courrier  
tout exprés, pour demander vn congé,  
dont on ne deuoit attendre qu'un refus.  
Cependant on continuë les prieres dans  
la maison, & nostre ieune Amazone,  
prend pour auocat dans sa cause le grand  
saint Ioseph, luy demandant, non l'en-  
trée dans le Canadas, mais qu'il disposast  
les cœurs de ses parens, à suiure les mou-  
uemens de l'esprit de Dieu, que si sa bon-  
té luy ouuroit cette porte, elle luy faisoit  
vœu de prendre, & de porter son nom, &  
de marcher sous ses auspices, en ce bout  
du monde.

Le courrier trouua Messieurs ses parens  
à Angers. Il leur presenta les lettres de  
leur chere fille. Monsieur de la Troche les



lisant demeura tout pâmé d'étonnement. Madame sa mere leuant la bonde à ses larmes; & abandonnant les rênes à sa douleur, remplit toute sa maison d'effroy, tout le monde accourt, chacun se plaint, le mot de Canadas, leur donne à tous de l'épouuante. Madame de la Troche; ayant vn peu repris ses esprits, commande qu'on mette les cheuaux au carosse pour aller promptemēt empescher ce voyage. Aussi-tost dit, aussi-tost fait. Comme elle auoit desia vn pied dans le carosse, parut vn Pere Carme, qui ayant appris le sujet d'vn voyage si soudain, luy dit, Madame ie vous arreste, permettez que ie vous die vn mot en vostre maison. Elle obeit, quoy qu'avec peine, ils s'en vont tous deux ensemble trouuer Monsieur de la Troche. Ce bon Religieux remply de Dieu, leur parla si hautement, & si efficacement de l'honneur, & de la grace, que leur faisoit Nostre Seigneur, d'appeller leur chere fille en vne si sainte Mission. Il leur fit voir par tant de raisons, & si preignantes, le dommage qu'ils se causeroient deuant Dieu, & les tors qu'ils feroient à la sainteté de cette ame genereuse, s'ils empeschoient le cours de son voyage; qu'ils



n'eurent autre repartie , qu'un aquiescement au plus haut de l'esprit, aux ordres de celui qui en estoit le maistre ; s'abbaisans, deuant luy, & adorans sa conduite , quoy qu'ils la trouuassent bien amere. Ne voila pas des parens, dignes d'auoir esté honorez d'une si sainte fille ? Que diront deuant Dieu, les Communautés, à qui on ne demande pas des sujets si eminens , voyans vne maison , donner ce qu'elle a de plus cher, & des parens se priuer de leur amour & de leur tendresse ?

Madame de la Troche ayant fait son sacrifice, ne demandoit plus que la satisfaction d'aller embrasser encor vne fois sa chere fille ; de luy pouoir aller donner le dernier adieu : & de luy porter à mesme temps , le congé, & la benediction de Monsieur son pere , qui se trouuoit mal. Ce bon Religieux luy dit, avec vne sainte franchise, non Madame vous n'irez pas : vos tendresses pourroient affoiblir en quelque façon , la generosité de vostre Amazone. Faites l'holocauste tout entier ; il suffit que vous luy escriuiez , selon les sentimens que Dieu vous donne. Son conseil fut suiuy. Monsieur & Madame de la Troche escriuirent deux lettres si



saintes , & si Chrestiennes , qu'elles ti-  
roient les larmes de tous ceux qui les li-  
soient.

Ces nouvelles estans arriuées , on fait  
porter à la Mere Marie de saint Bernard,  
le nom de Marie de S. Ioseph , suiuant le  
vœu qu'elle en auoit fait , elle triomphe  
de ioye , se remettant en memoire la suite  
de sa vocation : elle adore avec amour , le  
procedé de Dieu dans sa conduite : bref  
elle se dispose à ce grand voyage , de mille  
lieuës en droite ligne , & de plus de trois  
mille dans les détours & dans les bolines  
qu'il faut faire.

Monsieur l'Archeuesque ayant appris  
que le choix des deux Meres estoit fait , les  
fit venir en son Palais , ce saint vieillard  
leur donna sa benediction : il les porta à  
embrasser courageusement la Croix du  
fils de Dieu , se seruant des mesmes paro-  
les qu'il dit à ses Apostres , lors qu'il les  
enuoya en Mission , & leur ayant fait  
chanter le Pseaume. *In exitu Israël de  
Ægypto , &c.* Et le Cantique de la sainte  
Vierge. *Magnificat anima mea Dominum ,  
&c.* Il les congedia avec estonnement , de  
voir la force & la constance de ces trois  
Amazones : car Madame leur fondatrice  
estoit de la partie.



158 *Relation de la Nouvelle France,*

Ayant reçu sa benediction, & celle de Messieurs ses parens, il falut prendre congé de sa chere Mere Prieure, & de ses cheres sœurs. La plus part luy portoient enuie de son bien-heureux sort, quelques vnes trembloient, à la pensée des dangers, qu'elle pouuoit rencontrer sur la terre, & sur les eaux : quoy qu'il en soit, elle sortit de Tours avec sa chere compagne, le vingtiesme iour de Fevrier, de l'an mille six cents trente neuf. Elle n'auoit lors que vingt & deux ans & demy, & neantmoins dans tous les voyages qu'il fallut faire de Tours à Paris, de Paris à Diepe, & de Diepe en la nouvelle France; dans toutes les compagnies où elle se rencontra, en la Cour, dans les maisons particulieres, dans les Monasteres de Religieuses, elle a laissé par tout vne telle odeur de sa modestie & de sa vertu, que ie puis asseurer qu'elle dure encore à present en plusieurs endroits. Elle estoit agreable dans les dangers, elle en scauoit diuertir la crainte par quelque petit mot, & porter le monde à la priere, qu'elle commençoit fort guayement la premiere. On ne remarquoit aucune ieunesse dans cette grande ieunesse, ce n'estoit que



maturité. Son assurance parut vn iour à la veüe de la mort qui se presenta, notamment vne fois, non pas armée d'une faux, mais vestuë d'une horrible glace, contre laquelle leur vaisseau s'alloit briser, si Dieu par vne espece de miracle ne les eust preservez: sa fermeté donnoit de la couleur aux visages pâles, & affermissoit les cœurs tremblans de peur. En fin apres avoir essuyé les tempestes de l'Océan; apres avoir soustenu le poids des vents & des flots; apres avoir franchy mille dangers, & enduré constamment les fatigues de la mer, Dieu la fit entrer la mesme année de son depart, au pays tant désiré, au pays de souffrance & de ioye, au pays des combats & des victoires, pour passer de là au séjour de la gloire d'un triomphe eternal. Disons maintenant deux mots de ses vertus, & des faueurs que son Espoux luy a départies en ce pays de benediction.



De son amour, & de son application à  
Iesus-Christ, & à ses souffrances.

**L**A Mere Marie de saint Ioseph a eu  
dés son enfance de grandes tendres-  
ses pour le Verbe incarné. Le R. P. Iean  
Bagot, Religieux bien connu dans nostre  
Compagnie, m'a dit, que s'estant rencon-  
tré en la maison de Monsieur son pere, au  
temps de sa premiere communion, il fut  
surpris, voyant les lumieres de cette en-  
fant: sa confession si naïue & si iudicieu-  
se pour son aage, l'estonna; & les tendres-  
ses qu'elle auoit pour Nostre Seigneur en  
cette communion, le raut. Je ne luy par-  
lois iamais du Fils de Dieu dans le peu de  
sejour que ie fis aupres de Messieurs ses  
parens, adjoustele Pere, que ie ne visse  
ses petites ioües toutes trempées de ses  
larmes: ses yeux tout baignez, estoient si  
fortemēt colez sur moy, que ie ne pû me  
tenir, voyant cette sainte auidité, & ce grād  
amour pour son Sauueur, dans vne si ten-  
dre ieunesse, de dire à Mada. sa mere que  
cette enfant mōteroit quelque iour bien  
haut: *Quia virtus Domini erat cum illa.*

Toutes les lumieres, toutes les con-  
noissances,



noissances, tous les amours, & tous les sentimens qu'elle a eu de ce diuin Espoux en l'ancienne France, n'estoient que les preludes & les essais de ce qu'elle deuoit receuoir en la nouuelle. Estant vn matin en oraison, quelques six ans deuant sa mort son ame luy parut sous la figure d'vn chasteau rauissant, & à mesme temps cet Espoux, le Fils du Tout-puissant se presentant à la porte, se fit voir à son esprit par vne communication purement intellectuelle, où le Demon n'a point de part, pour estre independante de tous les sens. Il estoit si éclatant, & si plein de gloire, & si rauissant en beauté: (dit la personne de qui j'ay receu les memoires) Il luy tendoit les bras, & luy iettoit des regards si amoureux, qu'elle fut morte de ioye & d'amour s'il ne l'eust soustenuë. Enfin il luy dit, en la retenant entre ses bras, & prenant vne entiere possession de son ame: Ma fille, aye soin du dehors du chasteau, & ie conserueray le dedans. Comme il vint à se retirer, elle le voulut suiure: mais vn crespé ou vn voile se mettant entre-deux, elle entendit bien qu'il falloit reprendre le chemin de la foy, & ne iouyr de ces lumieres qu'en passant, comme on voit briller les esclairs.



162 *Relation de la Nouvelle France,*

Elle fut neantmoins environ vne semaine en extase, sans toutefois perdre les sens ; & son Bien-aimé l'instruisit dans cette apparition de tous les mysteres de son adorable humanité : Il la reuestit de son Esprit, & la changea entierement en vne nouvelle creature. Depuis ce temps-là, son cœur n'estoit plus à elle, & on ne pouuoit parler de Iesus-Christ en sa presence, sans que son ame se fondist, & se liquefiast en amour : Elle en parloit quelquefois si hautement, qu'on voyoit bien d'où procedoient ses connoissances.

Nostre Seigneur luy tenoit souuent vn langage fort interieur. Chantant vn iour le *Credo* à la sainte Messe, elle entra dans vne complaisance amoureuse en prononçant ces paroles, *Per quem omnia facta sūt*, se resiouyssant en son cœur, de ce que toutes choses auoient esté faites par son Espoux. Et comme cette ioye & cette complaisance la faisoient quasi defaillir, il luy dit : Oüy, ma fille, toutes choses ont esté faites par moy, mais ie feray refait en toy. Elle pensa s'aneantir entendant ces paroles, qui ne signifioient autre chose, qu'une sainte transformation en celuy, dans lequel elle viuoit plus qu'en elle-mesme.



Je ne sçauois rapporter tous les effets que ces communications diuines opéroient dans son ame; ce n'estoient qu'actions de grâces, que loüanges, que benedictions: Elle estoit dans de continuelles reconnoissances d'estre venuë au monde sous la loy de grace, pour auoir le moyen de posseder pleinement Iesus-Christ. Elle portoit grande compassion aux ames qui ignoroient ce grand thresor, & sçauoit mauuais gré à celles, qui en ayant connoissance, ne le possedoient pas.

La veüe des beautez de son Bien-aimé, luy fit voir si à découuert la bassesse & la laideur des creatures, en vn mot, le neant de toute chose, que quelques personnes la tenoient incapable long-temps deuant sa mort, de vaine gloire, & de tout autre amour, que celuy qui tend à Dieu. En effet, les yeux bien purifiez qui voyent les choses dans la verité, ne sont pas beaucoup touchez du mensonge.

Il me vient en pensée que quelques-unes de ses sœurs lisant ce petit abbrege de sa vie, pourroient bien souhaiter les mesmes douceurs, & les mesmes familiaritez avec leur Sauueur. Il faut confesser



que ce sucre est doux & que cette ambrosie est pleine de delices : mais elles me permettront de leur dire, que ces grandes consolations passageres ne se communiquent ordinairement qu'aux ames que Iesus-Christ met en croix avec luy : ce n'est qu'un alimēt & un soustien qu'il leur donne, pour porter le fardeau de ses souffrances. Nous le verrons dans ce qui suit.

Comme Nostre Seigneur luy parloit souvent, il luy dit quatre ans & demy deuant son trespas, qu'elle ne viuroit plus de là en auant que de foy, & de croix. Ces paroles veritablement substantielles, eurent leur effet : Elle n'aymoit plus rien que les souffrances, & son Espoux luy en donnoit abondamment. Elle portoit sans cesse un estat de peines interieures si cachées, si penetrantes & si viues, que peu de personnes les pouuoient comprendre. Elle souffroit en son corps des douleurs & des foibleſſes quasi continuelles : si bien que les paroles de saint Paul, Je suis attaché en croix avec Iesus-Christ, se trouuoient fort veritables en cette victime de l'amour souffrant. Souuent cet Amant des ames souffrantes la chargeoit du poids



de sa Justice, de sa Saincteté, & de ses autres attributs, par des impressions si pesantes, que sa vie n'estoit plus qu'un martyre. Estant certain iour dans les langueurs, elle dit ces paroles à sa compagne: Si l'on me demandoit qui me fait souffrir, ie ne pourrois respondre autre chose, sinon que c'est le Verbe Incarné, que c'est celui que j'ayme, qui me tourmente d'une façon inexplicable. Quelquefois elle auoit des oppressions de cœur si grandes, & des impressions des souffrances de Iesus-Christ si viues, qu'il luy sembloit souffrir vne mort plus dure que la mort mesme. Les desirs de mourir, pour iouyr de celui qu'elle auoit veu si beau & si ravisant, allumoient en son ame vn feu si cuisant, & si douloureux, qu'elle ne le pouoit esteindre que par vne autre douleur: Elle appaisoit l'amour de la ioye par l'amour des souffrances. Ce langage n'est pas estranger à ceux qui aiment, & qui scauent que pour estre hautement semblable à Iesus-Christ dedans sa gloire, il faut luy estre conforme, comme parle S. Paul, dans ses souffrances.

L'Espouse des Cantiques va chercher son Espoux, quand il est absent. L'ame



166 *Relation de la Nouvelle France,*  
que Dieu occupe en l'oraison , demeure  
en repos : mais s'il se cache , elle eleue son  
esprit , fait marcher ses affections , pour  
chercher , & pour trouuer son bien-aimé.  
Nostre Canadienne suiuit cette maxime  
dedans ses Croix , quand son Epoux luy  
en donnoit , elle les portoit avec vne paix,  
& vne soumission à ses ordres , & à sa con-  
duitte toute rauissante : elle prenoit ce  
faisseau de myrrhe & le cachoit dans son  
sein avec amour , & quand il la priuoit de  
cette faueur , elle se faisoit elle mesme des  
Croix elle cherchoit des mortifications,  
qui l'auroient bien-tost enleuée , de ce  
monde, si ses Superieurs n'eussent donné  
des bornes & des limites à sa ferueur.

Comme elle connoissoit la malice , &  
la finesse de la fille d'Adam , ie veux dire  
de la nature corrompue , elle auoit vne  
merueilleuse adresse , non seulement  
pour la tuër , mais encor pour empescher,  
que la Charité de ses sœurs, ne luy donnas-  
sent quelque soulagement. C'estoit la  
quereller que de luy dire , que ses infirmi-  
tés la dispensoient de suiure la Commu-  
nauté , & on luy formoit vn procès, quand  
on la pressoit de prendre quelque soulage-  
ment dans ses foibleesses , si elles n'estoient



extresmes.. Ses resistances ne procedoient pas , d'un petit compliment , formé du bout des levres : mais d'une veüe de sa bassesse , se croyant estre à charge à sa Communauté: elle cedoit d'ailleurs, facilement , & se soumettoit , aisement , à ceux qui la gouvernoient , quand ils n'écoutoient pas ses raisons ; ce qui arriuoit peu souuent , car elle estoit fort eloquente , lors qu'elle plaidoit la cause des souffrances de Iesus-Christ , contre les delicatesses du vieil Adam.

*De sa deuotion enuers la sainte Vierge & enuers saint Ioseph.*

**I**L est bien difficile d'aimer Iesus , sans aymer Marie , & d'honorer Marie , sans respecter saint Ioseph. Ie puis dire avec verité , que cette sainte famille , à esté la premiere , la plus noble , & la plus continuelle occupation de la Mere Marie de saint Ioseph , dans toutes les années de son pelerinage sur la terre. Iesus-Christ la tirée a soy , la Vierge la receüe , & elle a recherché saint Ioseph , elle est née dans la deuotion enuers la sainte Vierge ; c'est le premier lait qu'elle a succé : sa bonne



168 *Relation de la Nouvelle France,*  
merela dédia & la consacra des le berceau  
à cette Reine des Anges; & luy fit passer  
sa premiere enfance dans cette pieté.  
Nous auons desia dit que le nom de Ma-  
rieluy fit donné dans cette veuë, & que  
ce nom, luy estoit vn sucre en la bouche,  
autant de fois qu'elle le prononçoit; &  
que ses oreilles, & son cœur, sentoient  
toujours vn nouveau plaisir, quand on  
l'appelloit du beau nom de Marie, cette  
ioye prouenoit de l'amour, qu'elle por-  
toit à cette Reine des Anges, & on peut  
dire, que cet amour, estoit vn amour de  
ialousie: car elle ne pouuoit supporter;  
qu'on n'eut pas vn grand recours, & vne  
grande confiance en celle, dont elle expe-  
rimentoit si souuent les bontés, elle luy  
attribuoit son education sainte en sa peti-  
te ieunesse: ses desirs d'estre à Dieu, & d'y  
porter les autres. Sa vocation en vn ordre  
qui traueille au salut des ames: l'amour de  
son cher fils; la deliurance de ses peines,  
& de ses tentations: en vn mot, toutes les  
graces, & les faueurs, qu'elle receuoit de  
la bonté de son cher enfant: elle a dit sou-  
uentefois, que depuis sa naissance, iuf-  
ques à l'âge de vingt-ans, tous les iours,  
toutes les sepmaines, & tous les mois de sa



vie, luy auoient esté consacrés d'une façon toute particuliere elle fut deliurée de cet amour bas, & empressé, qu'elle portoit à Messieurs ses parens, par l'amour, & par la confiance qu'elle auoit en la sainte Vierge. l'Amour saint & dégagé qu'elle leur porta depuis, n'estoit qu'un rapport de l'amour, que cette Princesse portoit à son souverain seigneur. Si elle obeissoit à ses Regles, c'estoit dans l'union de l'obeissance, que cette aimable Mere rendoit à son fils, & à son cher Espoux: si elle auoit quelque petit temps à soy, il estoit aussi-tost consacré à la sainte Vierge, elle estoit tousiours, les premieres années qu'elle fut en la maison de Dieu, dans les recherches de nouvelles inuentions pour l'honorer; tantost par des Pseaumes: tantost par des Hymnes, & puis par des loüanges, & par des vœux, qui ne finissoient iamais. Souuent elle recitoit avec l'Ange, mille fois le premier salut, qu'il luy a fait. Si quelquefois elle tomboit dans quelque imperfection, elle sen alloit amoureuxment flatter sa bonne Mere, la coniurant de couvrir cette faute, de la beauté de ses vertus, afin que les yeux de son fils n'en fussent point blecés, & que



le tort qu'elle luy faisoit par son offence, fut réparé, par sa tres-aimable fidelité: & la dessus, repandant son cœur à ses pieds, elle luy promettoit d'estre vne autrefois plus fidele, & de faire telles mortifications, ou de reciter telles deuotions en son honneur: elle entroit dans ses ioyes, & dans ses tristesses: elle la seruoit dans ses voyages, en vn mot, ce n'estoit que confiance, & qu'amour, pour sa tres-honorée Dame & Maistresse.

Elle ne sentoit pas cette douceur enuers saint Ioseph: elle en eut quasi volontiers, intenté vn procès à la sainte Vierge; luy reprochant, qu'elle ne luy donnoit aucun accez, aupres de son cher Epoux. Elle la pressoit, & la coniuroit d'auoir pitié d'elle, & de luy accorder cette grace: de la presenter à cet aimable Espoux. Je crains, disoit elle, que cette insensibilité, ne soit vne marque de ma reprobation. Estant à Tours retirée en solitude, elle s'en alla trouuer sa Superieure au milieu de sa retraite, pleurant comme vn enfant, de ce qu'elle n'auoit aucune deuotion enuers saint Ioseph, cela la faisoit trembler. Sa Prieure luy dit en se souriant, que ses larmes, & ses angoisses, estoient vne marque



de cette deuotion. Mais cela ne la conso-  
loit point , pour ce qu'elle ne ressentoit  
pas, la protection de ce grand Patriarche,  
comme elle experimentoit celle de sa  
chere Espouse.

Au temps de ses plus grandes angoisses,  
la Superieure des Vrsulines de Loudun  
s'en allant au tombeau du B. Monsieur de  
Sales, passa par Tours, & logea dans le  
Monastere de nostre Canadienne: Tou-  
tes les Religieuses, & elle à son tour, bai-  
serent le sacré baume, dont saint Ioseph  
s'estoit seruy pour guerir cette bonne Me-  
re, & la tirer de l'agonie. Il n'y en eut pas  
vne qui ne sentit vne odeur, & vn effect  
de ce baume, qui ne venoit point de la  
terre, excepté nostre Canadienne, laquel-  
le fut priuée de cette grace; l'odeur de ce  
baume ne toucha ny ses narines, ny ne  
produisit aucun mouuement en son cœur.  
Dieu sçait de quelle douleur fut faisie sa  
pauvre ame! C'est bien pour lors qu'elle  
creut, que celuy dont elle recherchoit si  
sainctement l'amitié, l'auoit rebutée. Si  
Dieu prend ses delices avec les hommes,  
les Saints n'en font pas moins. Ce grand  
Patriarche prenoit plaisir de voir cette  
ame innocente courre apres ce qu'elle



172 *Relation de la Nouvelle France,*  
possédoit desia d'une façon plus noble,  
que celle que son ardeur prétendoit. En  
fin il la voulut consoler.

Cette bonne Mere de Loudun retour-  
nant de son voyage, & passant une autre  
fois par Tours, entra dans le mesme Mo-  
nastere, & donna à baiser pour la secon-  
de fois le saint baume, qu'elle portoit  
toujours avec elle. La Mere Marie de S.  
Ioseph trembloit en s'en approchant, elle  
craignoit un second rebut, elle se presen-  
te à genoux avec un esprit humilié, rem-  
ply neantmoins de confiance, que la tres-  
sainte Vierge, sa bonne mere, la donne-  
roit pour ce coup à son Espoux. Son at-  
tente ne fut pas vaine; elle n'eut pas si tost  
touché cette onction, que non seulement  
elle en sentit l'odeur, mais elle en fut pe-  
netrée iusques au fonds de l'ame, avec  
l'effect de la grace qu'elle avoit tant de-  
mandée. Le transport d'esprit qu'elle eut  
pour lors, fut si sensible, que la Mere de  
Loudun s'en appercevant, luy dit en sou-  
riant, Voicy un cœur puissamment pressé  
de Dieu. Elle toute transportée, se retira  
douceement, & s'alla jeter dans une grot-  
te de saint Ioseph, qui est dans le Mona-  
stere, où elle se tint enfermée environ



deux heures, & dans ce temps-là Nostre Seigneur luy donna saint Ioseph pour son Pere & pour son Protecteur, luy faisant entendre qu'elle estoit maintenant fille de la Vierge, & de saint Ioseph.

Cette operation toute diuine, & ces caresses si amoureuses l'aneantissoient, & la faisoient fondre en larmes d'amour & de ioye: elle sentoit dans le fonds de son ame les effets puissans de cette grace, qui l'affeuroient de cette filiation, en sorte qu'elle n'en a iamais pû douter le reste de ses iours, experimentant dans la suite de sa vie, les secours d'un Pere si puissant, & si aymable: elle en prit le nom, comme nous auons remarqué, lors qu'il luy fit donner son passeport pour aller en son pays, ie veux dire en la nouuelle France, qu'on peut appeller le pays de S. Ioseph, puis que ces grandes contrées marchent sous ses estendars, & l'honorent comme leur Pere & leur Patron. Il la conduisit dans cette glorieuse region, dans ce Royaume des souffrances, pour estre l'une des pierres fondamentales d'un Seminaire & d'un Monastere erigé sous le nom de saint Ioseph.



*De quelques-unes de ses Vertus.*

**L**es grandes lumieres , & les hautes contemplations , qui n'engendrent point la vertu, sont semblables à ces fleurs qui ne portent aucun fruit : l'arbre en est beau , mais il n'est pas utile. Il se trouue assez de personnes qui parlent de la vertu, ou qui se plaisent d'en ouïr parler , qui l'approuvent, & qui l'honorent : mais le nombre de ceux qui la pratiquent solidement, est bien petit. Nostre Canadienne en faisoit son principal ; elle croyoit que toutes les veües qui ne tendoient pas là, s'écartoient du vray chemin ; & que tous les brillans qui ne representoient pas la vertu, n'estoient que de faux iours : Aussi est-elle morte en vn pays, où l'on aime la verité , & d'où l'on bannit les apparences. La gloire d'une belle ame n'est pas d'auoir de beaux yeux, mais d'auoir des mains faites au tour, comme celles de l'Espouse, propres pour exercer les vertus. Voicy quelques petites marques de celles dont nostre Canadienne a esté hautement enrichie. Commençons par son humilité.

Il me semble que ie pourrois dire, que



le défaut de lumiere est cause que nous craignons les loüanges, & le mépris. L'ame qui voit nettement le neant de tout ce qui n'est pas Dieu, se met peu en peine d'estre aymée, ou d'estre haye; d'estre honorée, ou d'estre méprisée de ce neant. La Mere de S. Ioseph estoit si conuaicüe de ses bassesses, elle estoit si remplie des pensées de la grandeur de Dieu: elle voyoit si euidentement que de luy seul procedoit vn solide & vn veritable iugement qu'elle pouuoit quasi dire avec S. Paul, que le iugement des hommes luy estoit de peu d'importance. Ceux qui ne recherchent que l'approbation du Roy, ne se soucient gueres de l'opinion d'un payfan. De là vient qu'elle receuoit au fonds de son ame les mépris comme des veritez, les voyant tres-conformes à son estat: & l'honneur comme des mensonges, s'en iugeant deuant Dieu veritablement indigne: disons plustost, qu'elle méprisoit l'un & l'autre, comme vn homme sage méprise le ieu des noix, ou l'occupation des petits enfans.

Elle receuoit avec vne grande égalité d'esprit, voire mesme avec plaisir, les paroles & les actions qui tendoient à son ab-



176 *Relation de la Nouvelle France,*  
baissement, disant qu'elles tendoient à la  
verité. Elle auoit de l'amour & de la dou-  
ceur pour les personnes qui la mortifioiēt:  
elle les defendoit dans les rencontres, &  
leur rendoit volontiers seruice dans leurs  
besoins.

Elle ne pouuoit souffrir qu'on s'éleuast  
pour sa naissance, ne reconnoissant autre  
noblesse que la vertu: Elle disoit que la  
Religion rendoit tous ses sujets égaux,  
leur donnant à tous vne mesme naissan-  
ce; & que la vertu, & les vices faisoient  
les nobles, & les roturiers. Quelqu'un luy  
ayant fait demander quelque esclarcisse-  
ment touchant l'un de ses ancestres: elle  
fit responce, qu'elle ne s'estoit iamais mise  
en peine de sçauoir les auantages que la  
Nature luy auoit donnez en ses parens:  
que sa gloire estoit d'estre fille de Dieu,  
& de son Eglise: qu'elle mettoit tout son  
bonheur & sa felicité dans cette gloire.  
Ce n'est pas qu'elle n'aymatt, & qu'elle  
n'honorast Messieurs ses parens: mais cet  
amour & cet honneur se rendoit en celuy  
duquel ils tiroient leur veritable gran-  
deur.

La seule pensée que Iesus-Christ son  
Sauueur auoit passé trente ans dans vne  
vie



vie obscure & cachée, arrestant toutes ses productions au dehors, elle ne pouvoit cacher ses talens naturels, qui la rendoient fort aymable, & fort recommandable à tout le monde: Mais toutes les graces, & toutes les faueurs dont ie viens de parler, estoient inconnues aux personnes qui l'approchoient de plus pres, elle-mesme en détournoit la veüe, sçachant bien que l'éclair blesse l'œil, & engendre la foudre & le tonnerre. Elle suiüoit parfaitement en ce point, la conduite de ses Directeurs, qui passoient legerement sur ces faueurs extraordinaires, laissant faire à Dieu son ouurage, & portant sa creature à luy estre fidele. Iamais ils ne parloient ny dehors, ny dedans la maison, des operations qui ne sont pas de nostre estage; on exaltoit l'humilité, la patience, la charité, & les autres vertus. C'est dans ces voyes qu'on tenoit cette ame occupée, & ie m'assure qu'une partie de ses Sœurs sera estonnée, lisant ce qu'elles ont peut-estre ignoré iusques à maintenant. Il est vray qu'on luy auoit commandé depuis quelque temps d'escrire la conduite que Dieu auoit tenu sur elle depuis son enfance: afin (disoit-on) de penetrer plus



auant dans son ame, qui se produisoit assez peu; on ne vouloit pas perdre ces thresors, mais l'incendie de leur maison nous les a ravis.

Voicy vne action qui part de son humilité, & de son obeyssance. La veüe qu'elle auoit de son neant luy donnoit vn grand amour pour la vie cachée, & cet amour luy donnoit quelquefois de la peur & de la crainte qu'on ne la tirast de dessous le muid, pour la placer sur le chandelier. Vn certain iour que le temps de faire election de la Superieure s'approchoit, l'apprehension d'estre eleüe luy donnant quelque trouble, elle se iette aux pieds de son Espoux, elle le caresse, elle l'amadoüe, elle luy represente qu'il a passé toute sa vie dans la bassesse; qu'il a protesté que son Royaume n'estoit point de ce monde; elle le coniure de luy accorder la grace que sa vie ait quelque rapport à la sienné: qu'elle soit vn hommage de sa creiche, vne dépendance de sa croix, vne suite de ses ancantiffemens, puis qu'il vouloit que nostre vie fust cachée dans la sienne. Je vous promets, & vous fais vœu, luy disoit-elle, que j'aymeray, que j'honoreray, celle que vous aurez eleüe, que ie



vous obeiray fidelement en elle tant qu'il me sera possible : Je vous verray en la voyant, ie vous aimeray en l'aimant : En fin elle me tiendra vostre place. Sa priere fut exaucée, & son vœu accompli. Si tost que la Superieure fut éleüe, elle l'alla trouuer, luy rendit vn compte fidele de son ame, & luy declara les voyes & les chemins que Dieu tenoit en sa conduite, & tout cela avec la candeur & avec la simplicité d'un enfant, avec vne deference toute naïue, & toute aimable. Je vous laisse à penser si vne Superieure pouuoit ne pas aimer vne ame si soumise, vne ame enrichie de tres-beaux talens, vne ame genereuse, qui faisoit plus qu'elle ne disoit : vne ame qui n'aimoit rien de mol, rien de bas dans sa conuersation, qui n'auoit rien de puerile deuant le monde, & qui se rendoit souple & traitable à ceux qui la dirigeoient.

Je suis tesmoin oculaire de ce dernier article, comme elle me decouuroit son cœur en ce temps-là : Je fus le depositaire de ses craintes, & de ses vœux, & de tout son procedé. Quelques personnes voyant qu'elle estoit toujours aimée de ses Superieurs, & n'en sçachant pas le se-



cret, disoient qu'elle se trouuoit toujours du costé des plus forts : qu'elle sçauoit gagner ceux qui commandoient ; que son industrie la mettoit toujours à l'abry des tempestes qui venoient d'enhaut : Elles disoient la verité, mais elles attribuoient à vne bassesse d'esprit, ce qui prouenoit d'une haute generosité.

Je sçay encore qu'une personne luy a donné bien de l'exercice, & ie n'ay iamais sceu que sa bouche & son cœur se soient eschapez à son esgard. Puis qu'il n'y a point de danger maintenant de reueler les secrets de l'eschole, ie feray encore vn pas. On l'accusoit quelquefois, non pas de trop d'attache, car c'estoit vn esprit fort libre, mais de rendre trop de complaisance à quelques personnes, soit par quelque sympathie, ou pour quelque interest trop humain. Moy qui connoissois son cœur si dégagé, ie souriois sans mot dire : car ie sçauois qu'elle auoit vne antipathie naturelle contre ceux à qui elle rendoit ces complaisances : leur humeur estoit desagreable à ses sens : mais comme ses sens n'estoient chez elle que des valets, elle les faisoit plier sous la raison, & sous la grace avec vne si grande fidelité, qu'on eut dit



que ce qui leur estoit amer, se changeoit en douceur & en miel. Elle agissoit d'ailleurs avec des principes, mesme naturels, si dégagez, & si genereux, qu'il luy estoit comme impossible de rechercher l'amitié, ou l'appuy d'aucune creature par vne soumission basse. La conduite purement d'un homme, ou d'une femme, ou d'une fille, luy estoit insupportable: La conduite de Dieu par un enfant l'eut abaissée iusques au neant: elle aimoit le canal par où les ordres luy venoient du Ciel, sans prendre garde s'il estoit de bois, ou de terre; de plomb, ou d'or.

L'un de ses attraits pour le Canadas étoit l'amour qu'elle portoit à la pauvreté, elle aimoit le pays qui la rendoit semblable à son Espoux: Le viure pauvre & grossier, les froies tres-lōgs & tres-piquās estoient fort contraires à ses infirmités, mais tres-conformes à ses affections. Il falloit deui-ner ses besoins, tant elle estoit industrieuse à les dissimuler. Iamais on n'entendoit de plaintes, iamais de poursuites pour obtenir, non pas ce qui auroit repugné à la perfection, mais ce qui auroit esté tant soit peu moins conforme à la sainteté de ses vœux.



Je ne dy rien de sa pureté toute Angeli-  
que, elle estoit si bien preparée, & si bien  
armée contre les objets, qui l'auroient pû  
tenir, tant soit peu, qu'on eut dit qu'ils  
n'eussent osé l'approcher de mille lieues  
loing, tant elle estoit sur ses gardes, &  
tant elle auoit d'horreur de ce qui auroit  
pû blesser l'innocence des Vierges, qui  
suivent partout l'Agneau dans les Cieux.

Sa conuersation n'estoit point melan-  
colique, on ne luy voyoit iamais vn visage  
refronné, vne humeur saturnienne, ou  
bigearre: elle estoit guaye, d'un entretien  
aimable: mais toujours modeste; elle  
sçauoit disposer les cœurs, par de petites  
rencontres agreables, pour donner son  
coup bien à propos: ses discours, quoy  
que de Dieu, n'estoient point ennuyeux,  
mais profitables, à ceux mesmes, qui n'ai-  
moient pas beaucoup la vertu. Ce n'estoit  
point vn esprit pointilleux, ny ombrageux;  
mais vn esprit franc, rond, droit, &  
si ferme, que ie puis dire, que dans toutes  
les affaires qu'elle ma communiquées, qui  
n'estoient pas quelque fois de petite im-  
portance, soit pour la paix soit pour le re-  
pos & pour l'auancement de leur maison,  
que i'ay toujours trouué en elle, vn Iuge-



ment, non de fille, mais d'un homme de bon sens.

Ces talens, & ses graces, luy donnoient vn ascendant, sur l'esprit des François, & des Americains, qui en estoient charmés. Jamais ils ne l'approchoient, qu'ils ne sentissent, & ne remportassent, quelque bluette du feu qui bruloit dans son ame; & apres tout, elle estoit si Religieuse, & portoit tant de respect à ses Regles, notamment au service diuin, qu'elle tranchoit tout court, si tost que la cloche l'appelloit au Chœur. On luy dit vne fois, qu'elle auoit quitté trop tost, vne personne de consideration, qui souhaitoit vn plus long entretien. Dieu ne se paye pas, repondit-elle; de nos paroles, mais de nostre obeissance: ie quitterois vn Roy de la terre, pour obeir au Roy du Ciel.

Elle ne fut pas si tost arriuée en la Nouvelle France, quelle s'appliqua à l'estude des langues du pays, elle apprit la langue Algonquine, & la langue Huronne, avec assés de facilité. On peut dire que ces deux langues, luy estoient deux langues saintes, deux langues innocentes, ne s'en estant iamais seruies, que pour Dieu.

Quand elle eut aquis ces deux thresors,



184 *Relation de la Nouvelle France,*  
elle departoit le pain de la parole de Dieu,  
auec tant de grace, à ces pauvres peuples,  
que les petis, & les grands l'aymoient  
comme leur mere. Elle en a instruits quan-  
tité, depuis les premiers eleuans du chri-  
stianisme, iusques à les rendre dignes du  
sainct Baptisme, & des autres Sacremens  
de l'Eglise: elle seruoit de Mere Spirituel-  
le à plusieurs; leur donnans des auis, &  
des conſeils si Chrestiens, pour leur con-  
duire dans les voyes de leur salut, qu'ils  
en estoient ravis. Non seulement les fem-  
mes, mais encor quelques hommes, tant  
Hurons qu'Algonquins, luy ouuroient  
leurs cœurs: ils luy proposoit leurs peines,  
& leurs difficultés, auec vne entiere con-  
fiance: & toujours ils s'en retournoient  
fort soulagés, & fort édifiés. Son nom  
estoit connu dans tout le pays des Algon-  
quins, & des Hurons: ils l'appelloient  
tantost Marie Ioseph en nostre langue,  
tantost la fille sainte, & la fille de Capi-  
taine, en langue Huronne & Algonqui-  
ne, ce sont les deux noms qu'ils donnent  
en general, aux Religieuses de ce nou-  
veau monde.

Si ces nouvelles plantes auoient de l'a-  
mour & du respect pour la Mere Marie de



sainct Ioseph, il ne se peut dire combien elle les cherissoit, & combien saintement elle les caressoit, c'estoient ses creatures, pour le salut desquelles elle eut donné mille vies, & eut souffert mille morts. Elle faisoit tous les ans son possible, auprès de Madame sa bonne mere, & auprès de quelques autres personnes de pieté, pour mandier quelque aumosne, & quelque Charitez, pour ses bons Neophytes, & en contre échange, elle leur procuroit des Mediateurs, & des Mediatrices auprès de Nostre Seigneur, ce qu'elle a continué iusques à la mort.

Elle ne prenoit pas facilement l'effort, & ne croyoit pas à toutes sortes d'esprits, elle consideroit les choses en Dieu, devant que de les embrasser, & quand elle auoit reçu quelques ordres de sa part, luy seul s'en pouuoit dispenser. Les creatures ne l'en faisoient iamais demordre. Que n'a-t'on pas fait, pour l'ebranler dans sa vocation de Canadas? on luy a tiré des coups capables d'abbattre vn Geant. Si tost qu'elle eut fait le premier pas sortant de Tours, pour aller en cette Region lointaine, ou Dieu l'appelloit, le bruit, & la cause de son voyage, s'estant repandu



bien loing, ceux qui s'interressoient dans l'honneur de sa maison, informerent Messieurs ses parens si chaudement du malheur où ils iettoient leur fille, leur disans que le Canadas estoit vn pays perdu de reputation, que le vice y tenoit le haut bout, qu'on auoit vsé de surprise en leur endroit; mais qu'il estoit encor aisé de rompre ce dessein. La dessus Monsieur de la Troche, enuoye des lettres à sa fille tres-puissantes, & des ordres de l'arrester la part où elle se trouuera. Nostre Canadienne qui vit bien que ces donneurs d'auis, n'entendoient pas la Geographic, prenant l'Amerique Septentrionale pour la Meridionale, ne se trompans que de huit cent lieuës, & dauantage, ne s'estonna point: elle eut recours à l'oraison, & à sa plume: elle agit aupres de Dieu, & aupres de Monsieur son pere: le premier estoit de son party; elle eut plus de peine à gagner le second, elle respondit si clairement, & si sagement, & avec tant de zele, qu'on fit arrester toute la violence qu'on luy preparoit: mais on remit l'affaire; entre les mains du R. P. Dom Raymond de saint Bernard, Prouincial des R. R. P. P. Fueillans, qui pour ce sujet se trāsporta iuf-



ques à Dieppe. Comme il auoit les yeux faits aux lumieres, qui viennent d'un lieu, plus releué que le Soleil, & les oreilles degagées, il se rendit bien-tost, aux raisons de nostre Canadienne, portant sentence en sa faueur.

Sa vocation ne fut pas seulement combattue en France, on luy fit la guerre iufques en Canadas, La nouuelle que les Hi-roquois, auançoient tous les iours de plus en plus, dans le quartier des François, & que les infirmités de cette bonne mere, croissoient à veüe d'œil, donna tant de crainte à des parens, qui aimoient rendrement vne si sage fille, qu'ils la presserent, & la coniuèrent, par tout ce qu'il auoient de plus cher au monde, de se rendre encor vne fois visible en France. Cette ame courageuse n'auoit garde de descendre de sa Croix; comme elle estoit eloquente sur ce sujet, elle les conuainquit par des raisons si fortes, tirées de la volonté, de celuy qui l'auoit appelée en ce pays de benediction, & de la fidelité qu'elle estoit obligée de luy rendre, qu'ils n'osèrent plus l'attaquer par eux mesmes, demeurans edifiés de son courage, & surpris de la force de son raisonnement.



Monseigneur l'Euesque de la Rochelle, son oncle dit franchement au R. P. Hierôme Lallemant, qui se donna l'honneur, de l'aller saluer, repassant en Canadas; qu'il auoit resolu de la rappeler en France: mais que les lettres l'en auoient empesché, il les voyoit si puissantes en raisons, elles parloient si hautement de la perseuerance qu'on doit auoir en la vocation, qu'il creut, qu'un esprit plus haut que le sien, les auoit dictées: c'est pourquoy il la laissa en paix. Elle aimoit cette chere contrée, comme vn parterre emailé de fleurs, comme vn champ planté de lauriers, comme vn pays, où il y a plus de Dieu, qu'il y a moins de la creature, ce n'est pas qu'il ne soit fort bon, estant parallele à la France; mais n'estant pas encor bien cultiué, il porte plus de fruits pour le Ciel, que pour la terre.

*De sa Patience & de sa mort.*

**I**L me semble qu'on peut dire, que la patience est l'une des plus fortes marques, & des preuues plus antiques de la vertu. Le moyen d'estre humble, d'estre pauvre euangeliquement, d'estre



obeyssant, & de posseder beaucoup d'autres vertus, si on n'est bien armé, & bien couuert du bouclier de la patience? Depuis que Nostre Seigneur eut dit à cette Amazone Canadienne, qu'elle ne viuroit plus que de foy & de croix, elle ne fit plus que languir, elle fut attaquée d'un asme, & d'une maladie de poulmon, & d'une oppression de poitrine, qui la faisoit tousser incessamment: Elle crachoit le sang, & ne se pouuoit quasi mouuoir sans douleur. Elle dit confidemment à la Mere de l'Incarnation, en sa derniere maladie, qu'elle n'auoit point porté de santé depuis ces bienheureuses paroles. La fièvre ne la quittoit quasi iamais, le mal la faisoit souffrir, mais iamais plaindre: Iamais elle ne demandoit de particularitez: Iamais elle ne s'absentoit des obseruances, elle gardoit ses Regles ponctuellement; il ne falloit ny Rome, ny Banquiers, ny dispenses pour elle. Comme elle auoit une belle voix, & qu'elle entendoit bien la Musique, non seulement elle chantoit, & psalmodioit, mais elle conduisoit encore le Chœur, à quoy sans doute elle auoit grace: car elle y reüssissoit à merucille, nonobstant ses difficultez de poulmon. La



perseuerance dans cet exercice iusques à la mort, a fait voir que sa patience estoit heroique : aussi peut-on dire que cette patience s'estoit changée en amour de complaisance aux adorables desseins de Dieu sur sa conduite.

Si on la plaignoit, on luy donnoit de la honte : si on luy vouloit rendre quelque petit seruice, on la iettoit dans la confusion. Les autres, à son dire, auoient bien plus de besoin d'estre soulagée que non pas elle; Lors que le mal estoit si grand, qu'elle estoit contrainte de demeurer au liét, elle rendoit vne si aimable obeissance à ses Infirmieres, elle receuoit leurs seruices avec tant de reconnoissance, elle se rendoit si complaisante à la façon dont elles la gouuernoient, qu'il n'y en auoit aucune dans la maison qui ne se tint heureuse de la seruir. Ayant passé plus de quatre ans en des maladies, qui sembloient luy donner de temps en temps quelque peu de relasche : enfin elle sentit le iour de la Purification de la sainte Vierge de l'année precedente 1652. le coup qui la deuoit emporter.

Tous ses maux redoublerent, elle n'auoit repos ny iour ny nuiét, & cependant



elle ne laissoit pas d'aller au Chœur pour y communier, & pour participer aux conférences saintes qu'on y faisoit de temps en temps. Le quatriesme iour de Mars elle tomba dans vne telle extremité, qu'on luy fit receuoir le Viatique, & l'Extreme-Onction: mais Dieu la laissa encore vn mois en Purgatoire, c'est ainsi que j'appelle les derniers iours de la vie.

Remarquez, s'il vous plaist, que son Monastere ayant esté bruslé, & réduit en cendres l'année qui a precedé sa mort, les pauvres Ursulines estoient logées dans vn trou, pour ainsi dire: leurs lits, ou leurs cabanes estoient les vnes sur les autres, comme on voit ces rayons dans les boutiques des Marchands, où ils rangent leurs marchandises. Elle estoit couchée dans l'un de ces rayons. Le bruit des petites escolieres, le chant & la psalmodie du Chœur dans vne maison toute ramassée: le tintamarre qui se faisoit sur vn plancher d'aix par des sandales de bois dont se seruoient les Religieuses, le feu leur ayant dérobé leurs autres chaussures: la fumée qui se glissoit par tout, & qui n'étoit pas bien propre pour arrester la toux, & guerir son poulmon, & mille autres in-



commoditez qui se rencontrent dans les maisons de ceux qui ont tout perdu par vn grand incendie : toutes ces croix, dis-je, n'ont iamais troublé la serenité de son cœur, ny alteré la douceur de sa patience. Toutes ces incommoditez ne sont encore que des roses, Nostre Seigneur luy a donné les degrez de fer & de souffrance, à proportion qu'il l'a voulu hautement élever dans les Cieux.

Elle apprehendoit vne maladie qui exigeast des seruices fascheux à la malade, & aux Infirmieres : Elle craignoit des douleurs trop aiguës, de peur que sa foiblesse ne fust faire naufrage à sa patience : Elle souhaitoit d'estre libre des grands delaissemens intérieurs qu'elle auoit souffert autrefois, de crainte de ne pas rendre avec amour la fidelité qu'elle auoit vouée à son Seigneur. Elle tomba iustement dans ces trois espreuues : mais celuy qui la ietta dans ces combats, luy fit remporter hautement la victoire.

Elle deuint si fortement & si pleinement hydropique, qu'on prit resolution de luy faire des ouuertures aux iambes pour attirer les eaux qui la vouloient suffoquer. Le Chirurgien luy fit de grandes  
& de



& de profondes incisions dans la chair vive, en sorte qu'on voyoit la membrane: la douleur luy fit prononcer le saint Nom de I E S U S. Puis s'apperceuant de sa plainte fort innocente: Helas! dit-elle, ie suis bien sensible, pardonnez-moy la mauuaise edification que ie vous donne. Ce remede appliqué la sepmaine sainte, n'eut autre effect que de luy faire tenir compagnie à son Redempteur en ce temps de souffrances. Le ne dis rien des douleurs qu'elle souffrit quād on pensoit ses playes. Le Chirurgien, homme experimenté, voyant que la cangrene s'emparoit de ses iambes, appliqua vn appareil dans ces grandes ouuertures, qui luy causa des douleurs si cuisantes, si aiguës, & si continuelles 3. iours durant, qu'on croyoit à tous momens qu'elle allast expirer.

Ces tourmens luy sembloient doux, à comparaison des angoisses interieures, & des abandons qu'elle souffroit en l'ame: Elle auoit ressentý assez souuent ces grandes croix, & ces delaissemēs: mais ce coup, qui fut le dernier, fut le plus violēt de tous, il est croyable qu'il la purifia iusqu'au vif, & qu'il emporta les plus petites taches de son ame. Elle parloit de Dieu incessam-



ment, & il luy sembloit qu'elle ne croyoit quasi pas qu'il fust ny au Ciel, ny en la terre: Elle agissoit, & elle ne le sçauoit pas: elle aimoit, & elle ne le connoissoit pas. Dieu luy auoit osté la veüe & la reflexion sur les saintes operations de son ame. En vn mot, ce coup fut la consommation de sa vie, qu'elle acceptoit avec des soumissions heroïques à sa diuine Majesté, pour honorer le *Consummatum est*, que son bien-aimé Fils prononça sur l'arbre de la Croix. C'est veritablemēt dans ces derniers iours de sa vie, qu'elle ne viuoit plus que de foy, & de croix, & cela estoit si peu connu de ceux à qui elle n'ouuroit pas son cœur, que l'on eut dit qu'elle regorgeoit de delices. Ses colloques avec Dieu n'estoiēt que d'amour, que de soumission, que de resignation à ses adorables volonteiz. Elle ne parloit dans ses entretiens avec les personnes qui la visitoient, que des biens de l'autre vie, des bassesses de tout ce qui est sur la terre, des richesses de la sainte Religion, de la fidelité qu'on doit rendre à sa vocation. Ah! que ie suis heureuse, disoit-elle à ses Sœurs, de mourir en vn lieu pauvre, d'estre priuée des petites delices de la France! Ecriuez, ie vous en prie, à Monsieur de



la Rochelle, à nos cheres Meres de Frâce,  
à mes parens, & les assurez bien que ie  
meurs tres-contente de les auoir tous qui-  
tez. Ah! que ie suis satisfaite d'auoir abā-  
donné ce que ie pouuois pretendre dans le  
monde! Que mon ame est contente d'estre  
venue en ces nouuelles contrées! Faites-  
leur sçauoir, & n'y manquez pas, les grāds  
biens que ie ressens de ma vocation au pais  
des Sauvages. Elle ne se pouuoit lasser de  
benir Dieu des grandes graces qu'il luy  
auoit faites en suite de cette vocation, &  
de cet appel. Elle disoit toutes ces choses  
dans son abandon, iouissant d'une paix se-  
crete, qui n'exclud pas les souffrances:  
Paix qui nage au dessus de tous les sens,  
qui est logée si haut, que toutes les choses  
d'icy bas n'y sçauroient atteindre, & ne la  
sçauroient troubler.

Dieu qui fait tout pour le mieux, ne  
voulut pas accorder à sa fidele Amante la  
grace de passer de cette vie en l'autre dans  
ce saint abandon, il luy donna trois iours  
deuant sa mort, des auant-gousts du Para-  
dis, toutes les veües de ses peines luy furent  
ostées, toutes ses douleurs furent appai-  
sées, ce n'estoit que ioye & que delices dās  
son cœur: Elle dit au R. P. Hier. Lalle-



196 *Relation de la Nouvelle France,*  
mant, qui la dirigeoit depuis quelques années: Je sçay, mon Pere, que Dieu a promis à ceux qui quitteroiēt quelque chose en son nom, le centuple dès cette vie, & la vie eternelle en l'autre. Pour le centuple de cette vie, ie luy en donneray quittance quand il luy plaira, j'en suis tres-abondamment payée: pour la vie eternelle, ie l'attends bien-tost. Elle renouuella ses vœux de Religion, demanda pardon aux Assistans, receut le S. Viatique, remercia bien humblement le R. P. Paul Ragueneau, Supérieur de nos Missions, des grandes assistances qu'il auoit renduës à leur Maison, notamment depuis leur incendie, le suppliant de continuer ses bontez enuers ses cheres Sœurs: Elle rendit ses actions de graces aux Medecins du pais qui l'auoient charitablemēt assistée, les assleurāt qu'elle prieroit Dieu pour eux dans le Ciel, si luy faisoit misericorde. M. le Gouverneur l'enuoya visiter de sa part, pour se recommander à ses prieres, la suppliant en outre, de se souuenir deuant Dieu des grādes necessitez du pais qu'elle quittoit. Sa respōse fut toute pleine de respect & d'humilité.

Encor qu'elle baissāt de momens en momens, elle auoit neantmoins l'esprit si pre-



sent à foy, & si libre, que parlât à ses Sœurs dans le particulier, vn peu de temps auant sa mort, elle les entretenoit de son enterrement. Comme vous estes peu, leur disoit elle, il ne faut pas que vous preniez la peine de me porter en terre, seruez-vous des mains d'autres personnes: Ce travail vous empescheroit de prier, & de louer Dieu, & de bien garder les ceremonies que l'Eglise a ordonnées pour l'enterrement des Religieuses. Et là-dessus comme elle aimoit vniquement l'Eglise, respectant ses plus petites ordonnances, elle leur expliquoit doucement ces ceremonies; & montant de là iusques dans les Cieux, elle rapportoit des merueilles de l'autre vie. Nos cœurs, dit la Mere qui l'a cōnu si particulierement, estoient frappez de deux fortes passions: la ioye de la voir dans ces hautes dispositions, dilatoit leurs cœurs; & à mesme temps, la tristesse de la perte que nous faisons, les resserroit.

Elle fut 24. heures en l'agonie, sans iamais perdre ny le iugement, ny la parole: Elle repōdoit à toutes les questions qu'on luy faisoit, elle formoit tous les actes d'amour, de soumission, de resignation qu'on luy suggeroit, & mesme en expirant elle



198 *Relation de la Nouvelle France,*  
fit connoistre qu'elle estoit presente à soy,  
& attentive à ce qu'on luy disoit.

Enfin le 4. iour d'Avril de l'année  
1652. sur les 8. heures du soir, cette  
ame sainte faisant diuorce avec son corps,  
quitta la terre pour mōter dans les Cieux:  
Sa face en mourant parut si belle, & si An-  
gelique, qu'au lieu de nous donner de la  
douleur de son depart, dit la Mere de l'In-  
carnation, Dieu nous fit sentir vn petit  
eschantillon de sa gloire, par vne onction  
interieure, si douce & si savoureuse, qu'el-  
le remplit tous nos cœurs de ioye: Il n'y  
en eut pas vne de nous qui n'experimentât  
l'effect d'une grace tres-presente, & fort  
extraordinaire, & comme vne certitude  
que nous auions vne bonne Aduocate au-  
pres de Dieu. On se sentoit porté à l'inuo-  
quer, & en l'inuoquant on ressentoit le  
fruit de sa demande. Plusieurs ont fait  
cette experience depuis sa mort.

Son conuoy ne se fit pas avec les pom-  
pes de l'Europe, mais avec tout ce qu'il y  
auoit d'honorable au pais, avec toutes les  
affections, & tous les regrets des François,  
& des Sauvages qui l'aimoient, & qui la  
cherissoient pendant sa vie, & qui la res-  
pectent comme vne sainte apres sa mort.



Vne heure apres, ou environ, que ce sacré depost fut mis en terre, vne personne digne de foy (dit la Mere qui a fait ces remarques) s'en allât pour quelque action de charité, à vne lieüe de Kebec, nostre chere defuncte luy apparut par vne vision intellectuelle: Son port estoit remply de majesté, sa face couuerte de rayons de lumiere & de gloire, ses yeux capables de consommer vn cœur; Il m'a asseuré (ad-joute-elle) que ses regards causerent vn tel assaut d'amour de Dieu au fond de son ame, qu'il en pensa mourir. Elle l'accompagna iusqu'au lieu où sa charité le portoit, & se rendit encor presente au retour, par vne façon fort interieure, mais tres-certaine, traitant avec luy par voye d'intelligence, sur des sujets particuliers dont ie ne puis parler.

Le lendemain, la mesme personne s'en allant à l'Isle d'Orleans sur le grand Fleuve glacé, à deux lieües de Kebec, le flux de la mer qui monte iusques-là, fauorisé de la chaleur du Printéps, auoit destaché, & abysmé quelques-vnes de ces glaces espaissses, qui chargét tous les ans le grand fleuve de S. Laurens, & le froid de la nuict auoit forme vne petite croûte, ou vne pe-



tite glace, sur ces endroits d'où les grandes estoient parties. La personne dont nous parlons, marchant sur cette glace fort mince, sans y faire reflexion, nostre defuncte luy parlant au fond du cœur, luy dit clairement cette parole: Arreste-toy. Il s'arrest, il leue les yeux qu'il tenoit baissiez, & regardant à l'entour de foy, il se vit environné d'eau de tous costez, il perce cette petite glace avec son baston, pour voir s'il n'y en auroit point vne autre plus espaisse au dessous, comme il arrive assez souvent, il ne trouue que des abysses sous foy: Il se recommande à celle qui l'auoit arresté, & tout saisy de crainte, il retourne au plustost sur ses pas. Quand il fut en lieu d'assurance, il reconnut qu'il auoit marché vn long espace de chemin sur les eaux sans enfoncer; aussi ne luy sembloit-il pas qu'il marchât, tât il se sentoit supporté. En fin il a rendu témoignage que la Mere Marie de S. Ioseph luy auoit sauué la vie, qu'il ne pouuoit sortir de ce dâger sans miracle. Il l'appelle maintenât son Ange, assurant qu'il a receu depuis ce temps là de nouvelles faueurs de cette Ame d'élite.


Je trouue icy la fin des Memoires qui sont tombez entre mes mains, encore que ie sçache bien que le pays ne découure les graces & les faueurs extraordinaires qu'il reçoit de Dieu, qu'à tres-peu de personnes; si faut-il qu'il souffre, puis qu'il nous a dōné la peine de dresser en France la Relation, qu'on fasse part au public de ce petit thresor.

F I N.













EA 653'

R145r













HT